

سو پڻ ته سونج

ترلو کي ناتھ در کندن

सोपुन तु सोंच

sópún tû sònch



त्रिलोकी नाथ दर 'कुन्दन'

इंटरनेट देवनागरी एडिशन



म.क.रैना

सितम्बर २००८



मोती लाल साक्री साँबुनि नावु



सोपुन तु सोंच

कॅम्य ताम गाटुल्य छु वोनमुत “तोह्य छिवु वुछान तु दपान क्याज़ि ? बु छुस सोंचान तु दपान क्याज़ि नु ?” शॉयिर छु वुछान ति तु सोंचान ति । वुछान छु अँद्य पँख्य अँछव तु बोज़ान छु कनव । च़ेनान ति छु तु प्रथ कुनि छु साम ह्यवान । अथ मंज़ यि कॅह अँमिस छु स्वंदर बोज़नु यिवान, तथ छु यि पूज़ करान । यि कॅह बद तु बदसूरत छुस बासान, तथ कुन वुछिथ छुस दिलस लगान दकु । तमि पतु छु सोंचुन ह्यवान, सोपुनन हुंद अख नोव सम्सार बनावान । स्वंदर तु रुपठ । सु छु पनुनिस सोपुनस तु सोंचस शकल दिवान । प्रानिच पूर तु नविच तखलीक । यिहोय छु शॉयिरी हुंद फन । यिहोय छु शॉयिरु सुंद कारुबार ।

सम्सारस मंज़ यि कॅह छु तु यि कॅह अँस्य छि यछान जि आसुन गोछ, अथ मंज़ छे स्यठाह फर्क । यिहँय फर्क छि सानि तकलीफुक तु कश्टुक वजह । शॉयिरस छुनु सोन यि तकलीफ बरदाश गछान । तस हय पिलिहे, सु ज़ुरविहे नु ओश टार्यन प्यठ बहारस न काँसि मोसिमस अँछन मंज़ । अमी छु सोपनु सजावान, अकि तिथि समसारुक तसव्वुर करान यथ मंज़ न गम आसन तु न द्वख । यथ मंज़ वरताव आसि लोलुक तु मायि हुंद तु व्यवहार आसि इनसाफुक तु बाँय बंदुत्युक ।

प्रथ कांह शॉयिर छु आसान अकि परम्परा, अकि सिलसिलुक अंग । ति कॅरिथ छु सु आसान ब्योन तु बेजोड । तस छे आसान पनुन्य अख अलग पहचान, अख ब्योन रंग त, हयत । सु छु ती वनान यि तस बोज़नु छु

यिवान । युथ तसुंद सोंच, तिथुय तसुंद ग्यवुन । तसुंदि वुछनुक अंदाज छु आसान ब्योन तु सोंचनुक तँरीकु अलग, तमी छु तसुंद कलाम आसान जुदा तु तसुंद मकाम अलग । सु छु पनुनि वक्तुक राग ग्यवान, पनुनि वक्तुक तकाजु पूर करान तु यिनु वालि वक्तुच शक्ल गरान तु तम्युक वचुन वनुवान ।

मे ति वोत बालु पानु प्यठय वुछान, बोज्ञान तु सोंचान । यि छु, ति वुछुम । यि सूंचुम, ति सौरुम । अथ सॉरिसुय दिचुम विज़ि विज़ि ज्यव । गरा नज़ुमन मंज़ तु गज़ुलन मंज़, गरा बॉतन मंज़ तु गरा वचुनन मंज़ । यि कैह येमि अनवानु शूबिहे, ति थोवुम तमी अनवानु रँछरिथ तु सोंबरिथ । यि शॉयिरी हुंद म्योन सफर छु स्यठाह ज्यूठ । अथ मंज़ गँयि मे वारियाहन शॉयिरन, अदीबन, फनकारन तु ग्वनुमातन हुंज़ ज्ञान । केंचन ज़िठ्यन, केंचन हम-उमर तु केंचन कुंस्यन हुंज़ । दीना नाथ नॉदिम, रहमान राही, अमीन कामिल, गुलाम रसूल संतोश, अर्जुन देव मजबूर, मोती लाल साक्री, मोहन निराश, उमेश कौल, अली मुहम्मद लोन, मोती लाल क्यमू, सोम नाथ जुत्शी, शंभूनाथ भट हलीम, मखन लाल बेकस, चमन लाल चमन, वासदेव रेह नाव छि बेशुमार । काँत्याह गँज़ुरख ?

युहुंद फन तु युहुंद खयाल ति वुछ मे स्यठाह नज़दीखु प्यठु । अमा पोज़, बु पोकुस नु काँसि हुंज़ि वति । मे कँड पनुन्य वथ तु तँथ्य प्यठ रूदुस पकान । बु रूदुस कँशीरि न्यबर ति तु दीशु न्यबर ति । यथ यथ जायि गोस, ततिचि ज़िंदुगी हुंद असर प्यव म्यान्यन नज़ुमन प्यठ । अँर्यनिमालि हुंघ वचन, परमानंद तु कृष्ण राज़दानुनि लीलायि तु महजूरन्य गज़ुल ऑस्य त्वकुचारु

प्यठय मे कनन गॉमुत्य । बँडिथ पोर मे बेयन ग्वनमातन हुंद कलामु, ताहम च़ॉर्य मे पनुन्य मोज़ूह ति पानु तु पनुनि अंदामय कॅरुम तिमन हुंज़ वखनय ।

यि सोरुय सरमायि पनुन छुस बु लोलु तु मायि सान, शोकु तु चावु सान परन वाल्यन ब्रोंह कनि थवान । आश छम तिम ति परन यि कलामु लोलु तु मायि सान, शोकु तु चावु सान तु तव पतु आसन फुरसथ तु फरागतु विज़ि म्यॉन्य शार गुंगुरावान ।

तिमन दोस्तन, यिमव म्यॉनिस यथ शॉरी सफरस मंज़ मे साथ द्युत, म्यान्यन वचुनन दाद द्युत तु म्यॉनिस कलामस कद्र कोर, म्योन शुक्रियाह । म्यॉनिस टॉठिस मोती लाल साकी सॉबस ऑसिन स्वर्ग । सु ओस दिली यछान जि म्योन कलामु गोछ किताबि हुंदिस सूरतस मंज़ पेश सपदुन । तसुंद यि कांछुन कोर पूर तसुंद्य संतान विजय जियन । तस म्योन दन्यवाद तु ऑही । दय दियिन तस स्वख तु शाँती तु तरक्की । तँम्य तुल यथ कामि दस तु वातुनॉवन अंद । बु छुस स्वरगिया साक्री सॉबुनिस शागिर्द वली मुहम्मद ख्वशबाश सॉबुन ति शुक्र गुज़ार तिक्याज़ि यि कॉम अंद वातुनावुनस मंज़ शेहलोव तिमव विजय जियुन अथ ।

बेयि अँक्य गाटुल्य छु वोनमुत “छारुन गव फीरिथ थूरिथ तोतथुय वातुन येति प्यठु सफर शुरू कर्योव तु स्व जाय ज़ानुन्य ग्वडनिचि लटि ।” खबर मे ति मा कोर ती ।

त्रिलोकी नाथ दर 'कुन्दन'

सूची

१. चै द्युतथम दिलासा	०७	२४. अख खयाल	४५
२. साकीयस कुन	०८	२५. पोशि फोट	४७
३. अज्यकि वक्तु	०९	२६. गुल बहारुक गाशि	५०
४. नबुक तारुक	१०	२७. जिन्दुगी हुंद सोंथ	५२
५. ग्वनमाथ	११	२८. फलसफन हुंज छम	५४
६. यि द्रींठ्य आव	१२	२९. टाठ्यो वंदुयो जुव	५६
७. यारन कुन	१४	३०. मति रटुथा नालुमते	५८
८. माजि हँज शेछ	१५	३१. येलि हर्दनि छट्ट छय	६०
९. मुबारक	१७	३२. फवलुन येछिनय	६२
१०. गजल	१८	३३. मदनन कॅर्यनम	६४
११. नजरानु	१९	३४. अख अख कॅर्यन	६६
१२. नूरस मय गॅछ छाय	२१	३५. दूह तु दूह	६९
१३. दिख ना मेति त्युथ	२२	३६. चाव येलि चावय	७१
१४. लवि क्याह सु सोंत	२४	३७. प्रोन पथ त्राँविव	७३
१५. शोक्लम कॅरिथुय	२६	३८. बु फेरान बाज़ुरस छुस	७५
१६. येलि अँस्य समखव	२८	३९. सॉन्य मयकश आयि	८२
१७. यिहय वथ यिहय कथ	२९	४०. नाद लोय आबुशारव	८५
१८. बॉथ तु टुख	३१	४१. पोशि माल	८७
१९. रोव हय करुवय	३३	४२. लाल फोल	९१
२०. मै मा वोन अपुज अज	३४	४३. कनि मोजुरेन्य	९४
२१. तलु सॉ वॅन्यतव	३७	४४. अथुवास	९८
२२. अकत्रुहिम अक्तूबर	४०	४५. शोक तु प्वनुसुन	१०१
२३. खबर कवु	४३	४६. गोश थव म्यान्यन कथन	१०४

४७. म्वख्तु	१०६	७२. चोन तसवीर	१७३
४८. शैछ नितम	११०	७३. सिरु कथ	१७६
४९. दिवान कथ छुख	११२	७४. अख मंज़र अख खयाल	१७८
५०. जवॉनी हिश रवॉनी	११४	७५. थनु प्यव तमि विज़ि	१८०
५१. समयस ज़िठचव छु	११५	७६. कथ हसॉ कथ	१८३
५२. वुछिथ गुलि लालु अंदकुन	११७	७७. वॅन्य तु थॅन्य	१८६
५३. कनन कनु वॉल्य स्वंदर	११८	७८. कुल तु थॅर	१८९
५४. मस चनु रोस्तुय मस्ती	१२०	७९. दिल	१९२
५५. ज़ेनि ऑखुर म्यॉन्य	१२२	८०. इन्कलाब	१९५
५६. आव अज़ सोन	१२४	८१. लोसुवुन अखताबु	१९७
५७. बागन मंज़ मुचरि अँछ	१२६	८२. मे छि यार वनान	२००
५८. रिक्शा वोल	१३०	८३. सिरु कथ	२०३
५९. मुलाकात	१३२	८४. ज़्यव वॅज छम	२०६
६०. नोव वॅरी	१३५	८५. गज़ल - वनय लोलुक	२०९
६१. मुसॉफिर	१३७	८६. गज़ल - अज़ छि म्यॉनी	२११
६२. खबर छय मा ?	१३९		
६३. स्यज़र कोताह च़े छुय ?	१४२		
६४. बु शॉयिर	१४४		
६५. बजर इनसानु सुंद	१४८		
६६. जवॉहिर लाल	१५२		
६७. ल्वक़चार	१५४		
६८. पोज़, रुत तु स्वंदर	१५७		
६९. सोदरुक लाल	१६१		
७०. सोपुन तु सॉच	१६५		
७१. वक्तुक जंग	१७१		

१

त्रे द्युतथम दिलासा

त्रे द्युतथम दिलासा, युहय लसि गिलासा ।
छु बचपन बे-फिकरी, जवॉनी पेप्यासा ।।

अँछव वोन अँछन कुन, करव अथुवासा ।
मे आँस्य यारि जाँनी, कोडुख लचि टासा ।।

ग्वडन्य मामु यारज़, पँतिस करतु त्रासा ।
पनुन वादु मँशरिथ, लोबुथ कुस त्रे लासा ।।

पनुन गव पनुन पान, न मामन्य न मासा ।
अपुज़ छुय पज़ान योद, चंदस आसि सासा ।।

वनेमस मे पँज़ कथ, मे त्रुवुन टपासा ।
छु कुन्दन येमिस मोत, सु कांह आसि खासा ।।



२

साकीयस कुन

द्वहय जॉनिथ च्ने ज़न अँस्य चॉर्य साकी ।
 मगर अँस्य तोति रूदी लॉर्य साकी ।।
 च्ने होवुथ प्यालु असि कुन चोथ पानस ।
 दिच्चुथ मा ज़ांह चनस अनुवॉर्य साकी ।।
 च्ने ब्रोंह युस ओस साकी ओस बेहतर ।
 मगर तँम्य पोतससुय अँस्य मॉर्य साकी ।।
 तँमिस अँस्य मोकु दिमहव साँचनुक नोव ।
 मगर गाशस च्ने थँव्यथस तॉर्य साकी ।।
 नशस मंज़ अँस्य अँस्य, फश हा ओनुथ च्ने ।
 कोरुथ लूठा हरुद्य तय हॉर्य साकी ।।
 मोहबत गव छोरुय रूद कारुबारा ।
 च्नु चाव प्याला, बु कडु चंदु द्यॉर्य साकी ।।
 दप्योव असि प्यालु चावख मोहबतुक मय ।
 मगर द्राख चूर साकी ज़ॉर्य साकी ।।
 तिमय रिद त्रेशि हँत्य छी चानि बर तल ।
 यिमव गोल्यान यवय वछ दॉर्य साकी ।।
 गज़ल अलमस्तनुय ल्यूख दर्दु बोरतुय ।
 मे कुन्दन आयि यँच्च अँश्य टॉर्य साकी ।।



३

अञ्जयकि वक्तु

बु छुस कॉशुर, मे कॉशुर आसनच तेह ।
 बु छुस शॉयिर, मे छुम प्रथ कॉसि हुंद स्नेह ॥
 छु कर्मुन फल, ववौ यूत त्यूत लोनव ।
 मत्यो दुनियाह न छुय ट्यठव्यन न छुय वेह ॥
 न खर रॉञ्जी, न खर वोलुय यिमन ख्वश ।
 वन्यूबा गव अड्यन बाक्युय तिमन हेह ॥
 दञ्जान आलम मगर यिम छी करान ऑश ।
 यिमन क्याह छुय यिमन गोमुत अँकिस सेह ॥
 गॅरीबस सारिवुय वोन नाबुकारुय ।
 अमी किन्थ वोतमुत छुय मा ख्यनस वेह ॥
 स्यज़र यिमनुय तिमय अदु चॉर्य ज़ॉनिख ।
 दूहय हेच़हख अड्यव न्यथ तय अड्यव नेह ॥
 मे वन कुन्दन च़ु कथ सॉचस च़ु कथ कुन ।
 लोगुय मा चारु व्वलु प्युहमुत च़ु बेयि पेह ॥



४

नबुक तारुक

वारिनय मंज टूरिनय अज वुछ मे फवलनुच त्राय हय ।
कोंछिमख यी ऑस्यनख व्वन्य रुमु रेशुन आय हय ॥

जिंदगी हँदे सरुक पम्पोश खसनुच ग्राय ह्यथ ।
आबिडल होख्यतन तँमिस तमिकुय छु मा परवाय हय ॥

दूरि दूरे छुख करान अँछ नाटु नबु कुय तारुखा ।
लाल लूसिम अँछ मे पुन्ननेयि छय न फेरान माय हय ॥

नार सफरुक बोनि शेहजारन ति शेहलोव कुत्यनुय ।
छुस बु बे-गम, छम मे सथ, छुम चानि जुल्फुक सायि हय ॥

गाश चेश्मन हुंद वथुरमख, गोछ नु ऑखुर प्योन वनुन ।
त्राय यिम यवु सुन्ननि बँर्य किन्य, हँस्य बरुन्य अज द्राय हय ॥

राथ शामन प्रुछ मे वॉलिंजि दुबु दुबु कुय मानि क्या ?
तँम्य मे वँन्य कँन्य शेछ दपन छस वाय यूर्य यी नाय हय ॥

व्वन्य छु कुंदन युथ समय येलि मस चवान दयि नाव ह्यथ ।
दय दपान मा आसि मयखानय बन्योव म्यॉन्य जाय हय ॥



५

ग्वनमाथ

बबरि लंजन द्रायि बामन, आयि शामन सॉन्य यार ।
शेछ वॅरिव तोह्य खास आमन, आयि शामन सॉन्य यार ॥

गुल गज़ल फवलि, टुख यँबरज़ल, बेयि रुबॉयी लालु वख ।
गीत सबज़ार बालु दामन, आयि शामन सॉन्य यार ॥

कथु लेखन अँड्य मेछि मेछय, ज़ेछि नावल पेचदार ।
हुर्य वचन तिम शहरु गामन, आयि शामन सॉन्य यार ॥

अँड्य लेखन नाटक ल्वकुट्य बँड्य, गोब्य तु गाटुल्य लेख नँव्य ।
डेर लागि हज़लन तु पामन, आयि शामन सॉन्य यार ॥

सॉन्य चलि येलि वथ तु कथ, अदु न्वकतुचीन मा रोज़ि पथ ।
म्वल तु त्वल लागि बेयि कलामन, आयि शामन सॉन्य यार ॥



६

यि द्रींठ्य आव

ग्वडु ज़ायि च़ु तु बु पतु ज़ाव बब तय ।
द्वह पौशि दब गव ज़ाव बुड्य बब तय ॥

रुदस पतु छय मुश्कस रब तय ।
रबि पतु खुर तय दुस तय दब तय ॥

ओश हॉर्य हॉरी लोच़रुन वॉलिंज ।
राठा वॉजिन नोन गव नब तय ॥

डल दंघसुय तल ख्यल क्याह तंदले ।
ज़ूना असुवन्य तारक नब तय ॥

र्वनि दार आरस डुलु पल मालाह ।
यारन हँज़ ज़न लँजमुच़ सब तय ॥

राम राम बँदरुन्य दून्या द्राये ।
सिरयस किच़ छय रंगुदार डब तय ॥

रुत रुत येछ़्यनख रुच़ छख अमलाह ।
अँक्य दँर आँठम अँक्य दौर शब तय ॥

सगुवनि कनि येम्य लंग लंजि फुटर्यख ।
हॉलिस तस कोर कुलिवुय ज़ब तय ॥
दर दिथ करतख वज़नाह दूक्षुन्य ।
अँक्य ख्योव अँज़्य मँज़्य बेय कोर यब तय ॥

निकु येति आसन हेकि कुस 'कुन्दन' ।
डुल म्योन कति छुय डुल म्योन लब तय ॥



७

यारन कुन

करु हा बु ग्राव यारन हर रंगु तु आनु यारो ।
दूर्यर मगर रटुन ह्योत मेय पॉन्य पानु यारो ॥

दिलु किन्य बु छुस त्वही निश, अँज्य मँज्य अँती बु रूजिथ ।
दूर्यर अगरचि वुन्यक्यन असि दरमियानु यारो ।

तनु किन्य अगर जुदा अँस्य, मनु किन्य ति ज़ांह नु सपनव ।
'पयवंद आदनुक छा शुर्य दोस्तानु यारो ?'

कॉत्यह मे निश तुहिंघ सिर, कॉत्याह छि म्यॉन्य त्वहि निश ।
अँस्य ऑस्य बॉगरावान लोलुक्य फसानु यारो ॥

सॉथी मशन नु हरगिज़, मशि मा तिहिंज़ रफाकत ।
पेच-ने-खमन तिमव कॅर्य विज़ि विज़ि मे शानु यारो ॥

स्वख दूख छे जिंदुगी सॉन्य, सँन्य तय व्वगुन्य छि मंज़िल ।
डुंग दिथ छि असि ति खारुन्य कम म्वख्तु दानु यारो ॥

ऑही कॅरिव जि अरमान अलमन खसन मे सॉरी ।
फेरुन ज़र्या यि कुन्दन ज़ांह वानु वानु यारो ॥

* * *

८

माजि हँज शेछ

बु यारन मंज योतुय अख यार आमुत ।
छु ज़न निशि यावनस ल्वक़चार आमुत ॥

स्यठाह गोस शाद डीशिथ कॉशिर्यन अज़ ।
मे ब्रोंठुय योत छु सुय शेहजार आमुत ॥

फेक्यव पेठ्य माज़ खोत मे साज़ डीशिथ ।
बु छुस संतूरची ह्यथ तार आमुत ॥

बु छुस गुलि लाल, छुम मे दाग जिगरस ।
मगर ह्यथ अज़मुकुय व्वज़जार आमुत ॥

बु सूज़ुस माजि पोत्रन हँज अनुम शेछ ।
छि ज़ानान लारुकुय योत दार आमुत ॥

तँमिस बालन छि लँग्यमुत्य लाल वेरे ।
व्वँलिथ येलि तस योतुय संसार आमुत ॥

छि असि तति वारि सोंतुच आव आवय ।
छु फवलनस सुय पनुन यकरार आमुत ।।

छु कुन्दन रिन्दुनुय निशान चलान शर ।
तमी आशायि छुस बाज़ार आमुत ।।



९

मुबारक

कुल्यन सोंतु फुलयाह तु बामन मुबारक ।
 तु छावुन येछिन खासु आमन मुबारक ॥
 संगर मालु फवलुवन्य खेलिस सुत्य सुती ।
 पँहँल्य यारनुय बालु दामन मुबारक ॥
 करान ती ह्यडान यथ बेयिस दँर्य छि दूश्वय ।
 तिमन दोंकु दोंकन तु पामन मुबारक ॥
 वुछिथ पोशि थँर हर्दु कालय छोरुय कौड ।
 दिवान बुलबुलाह चाक जामन मुबारक ॥
 वुछिथ अज़्म गाशुक तु परतव प्रगाशुक ।
 करान छय सुबहस राथ ज़ामन मुबारक ॥
 कद्र सोन कति ज़ोन अँम्य खामकारन ।
 कंदस मुजि कुनुय साद खामन मुबारक ॥
 छु कुन्दन ग्यवान ज़िंदुगी हँद्य तरानय ।
 तमी नामवर शहरु गामन मुबारक ॥



१०

गज़ल

यिमन रॉन्न ति कांह प्रागाश छारव ।
दिमव ना जॉल्य गाशस आश छारव ॥

अगर बुतरॉन्न प्यठ स्वर्गस दिमव कुन ।
छु मा हाजत जि अँस्य आकाश छारव ॥

खबर मोठमुत छु कवु पनुनुय तमहुन ।
वँलिव बेयि रोवमुत यादाश छारव ॥

ग्रुहुन ज़लि ना तु ग्रहघन छाय डलि ना ।
नोवुय ज़ातुख लेखव नँव राश छारव ॥

तिमन हॉसिल नु केंह गाशी स्वतान छुख ।
यिमव दोप सूर मंज़ु ख़शख़ाश छारव ।

व्वं गछि आसुन्य नँवुय कहवँट तु कुन्दन ।
सँमिथ अज़ पासु स्वनुची चाश छारव ।



११

नज़रानु

येम्य मोहबत कुन तु दुकानाह कोरुन ।
 नाँगरायुन खानु वॉरानाह कोरुन ॥

सानि दर्मुक वुछतु कोताह छुय बजर ।
 येम्य यि कोर तस ती वोनुख जानाह कोरुन ॥

लोलु युस आव, लोलु तस कोर नालुमोत ।
 प्रथ अखाह येति लोलु मस्तानाह कोरुन ॥

शीशु ह्यू ऑव्युल दितुन दिल शॉयिरस ।
 अँश्य फेर्यन ताम कदरि दुरदानाह कोरुन ॥

म्यानि मज़रुक केंह ति मा तकसीर मै ।
 चेश्म अख अख टोट पैमानाह कोरुन ॥

रहमतस छा तँम्य सँदिस अख रछ वॅमी ।
 यूत बोड दुख, त्यूत बोड बानाह कोरुन ॥

लोल थोवुन शायि शाये मायि मोत ।
पूज़ि लायक हुस्न बुतखानाह कोरुन ।।

लोल गव बदनाम लेकिन ज़िंदु रूद ।
हुस्नसुय पथ पान क्वरबानाह कोरुन ।।

क्वदरतुक हुस्ना बोरुन कश्मीरसुय ।
कॉशिर्यन क्युत पॉदु अरमानाह कोरुन ।।

उल्फतुक मय बॉगरोव कुन्दन जीयन ।
ज़िंदु कोलस बॉथ नज़रानाह कोरुन ।।



१२

नूरस मय गॅछ छाय आसुन्यये

नूरस मय गॅछ छाय आसुन्यये
यावनस ज़ज़रन त्राय आसुन्यये

चेश्मन वुछ वुछ चेश्मय लोसन
शूब्या यि च़े माय आसुन्यये

जुव येम्य लालन लोलस आलुव
स्वरुगस गॅछ तस जाय आसुन्यये

बागस ग्वड बरुहव प्रथ कुलिसुय
ग्वडु गॅछ्य अँस्य यक-राय आसुन्यये

अमनुक्य तु सलहुक्य दम दिथ वात्या
इनसानस लायि-लाय आसुन्यये

कॉशरि ज़ेवि युथ मेछर तिछ गॅछ
स्वंदर लेखन त्राय आसुन्यये

कुन्दन छुम यँचकॉल्य अज़ आमुत
तस किच़ गॅछ सोत चाय आसुन्यये



१३

दिख ना मेति त्युथ कांह व्यस्ताराह

दिख ना मेति त्युथ कांह व्यस्ताराह

गंडु हा बु ति युथ बोड दसताराह

केंचन दसतार मलमलि खाराह

केंचन नॅन्य व्वड बोड दसताराह

वॉलिंजि वुहवान छुम ज्यतु नाराह

चेश्मन लॅजिमुच अशिची दाराह

समखी योदवय सुय म्योन याराह

कॅर्यज्यस म्योनुय ज़ाराहपाराह

युस वोथ आबस लोब तॅम्य ताराह

बॅठ्यसुय ब्यूठ युस सुय बे-चाराह

यवु कोर यिमवुय बोड आंकाराह

अज़ कोर तिमवुय च़कि इनकाराह

ज्यव मुचरनुसुय मा छुम वाराह

दय रॅछिनम गोमय कॅह फ्याराह

द्वन लफ़्जन हुंद त्युथ गोछ शाराह
माने यथ ज़न वाराह वाराह

प्रथ अँकिसुय येति ज़न चलु लाराह
सफरस मंज़ छुनु साँथी याराह

ख्वश कोताह छुम लूकु अटुहाराह
ख्वश कोताह छुम खलवक याराह

कुन्दन व्वलु छावव शेहजाराह
गोन सब्जाराह, कथु दरबाराह



१४

लवि क्याह सु सोंत लालो

लवि क्याह सु सोंत लालो, खरि युस गुलन तु सोम्बुलन
परि क्याह सु बॉथ कांछाह, खरि युस गुलन तु सोम्बुलन

कथ किछ छि बॉतु बॉज़ी, यथ प्यठ नु लूख रॉज़ी
स्व ति बोज़ तु जालसॉज़ी, खरि युस गुलन तु सोम्बुलन

वनु क्याह बु मीलि कलमस, बरि र्वपयि म्वहरु हलमस
मंदुछावि तिलु तु स्वलुमस, खरि युस गुलन तु सोम्बुलन

वनु किथु तँमिस बु जानय, करि हीलु तु बहानय
बरि युस पनुन्य खज़ानय, खरि युस गुलन तु सोम्बुलन

युस तुरु च़ानि लालन, टख द्यावि म्वख्तु मालन
तस मा छि जल ति च़ालन, खरि युस गुलन तु सोम्बुलन

बुलबुल ति मोत छु पोशन, ख्वश छुम मे रोज़ि रोशन
करि क्याह सु स्वछ मनोशन, खरि युस गुलन तु सोम्बुलन

योद जल ति पॉज़ लागे, पनुन्यन पखन सु ज़ागे
करि क्याह सु कुकलि रागे, खरि युस गुलन तु सोम्बुलन

वुछतोन यि सोन कुन्दन, ख्वश छुय यिवान यि रिंदन
खरि सुय यिमन परिंदन, खरि युस गुलन तु सोम्बुलन



१५

शोकलम कॅरिथुय हेयिव वनुवोनुय

शोकलम कॅरिथुय हेयिव वनुवोनुय, अदु च़लि गाशस ग़ोनुये
नोव नोट गछि अदु प्रथ कांह प्रोनुय, अदु च़लि गाशस ग़ोनुये

सुबहुक वक्ताह क्याह छु नुंदबोनुय, प्वति प्वति गाशस गॅयि अम्बार
सिरिं बगवान यी सालस सोनुय, अदु च़लि गाशस ग़ोनुये

बागाह वुछतन छुय फवलुवोनुय, पोश फॅल्यमुत्य तलु न्यूल सबज़ार
पनु पोंपुर छुय सुति नचुवोनुय, अदु च़लि गाशस ग़ोनुये

मत्तु साँ कॅर्यतव चोनुय तु म्योनुय, ह्यमुतो समुतो कॅर्यतव कार
अदु वुछतव क्याह फवलि ड्यकु सोनुय, अदु च़लि गाशस ग़ोनुये

पथ कुन त्रॉव्यतव प्रथ कॅह प्रोनुय, नवि सरु दीतव नोव व्यस्तार
कॅर्यनवु यॉरी रेश्य पीर म्योनुय, अदु च़लि गाशस ग़ोनुये

क्याह मे ओसुम करमय लोनुय, अकि लटि होवनम मा दीदार
हाव्यम ना सुय र्वय रम्बुवोनुय, अदु च़लि गाशस ग़ोनुये

व्यसुनुय पूशिन सुय व्यसु तोनुय, यारस मूजूद रूज़िन यार
ब्द गॅयि अँक्य वोन बेय ज़ॅन्य मोनुय, अदु च़लि गाशस ग़ोनुये

मूजूद रूज़्जयनय अकु नंदोनुय, येछिनय अँम्यसुंद वुछुन बहार
तूशनय मालिन्य तु वॉरिव क्रोनुय, अदु चलि गाशस ग्रोनुये



१६

येलि अँस्य समखव

तारख नब असि, येलि अँस्य समखव
अछु रछु यिन व्वसि, येलि अँस्य समखव

हँज कँज सुम गछि, गुमु सँर्य रुम गछि
बुथ छलि थपि थ्वसि, येलि अँस्य समखव

बरतल बुथि नेरि, दवि वसि नवि हेरि
कमि चिकु चावु खसि, येलि अँस्य समखव

कृष्णस नय मशि, गूपियन पय मशि
यूगियन मद वसि, येलि अँस्य समखव

सोंतस ड्यकु पचलि, सुम्बुलस तु मसवलि
पेचानु रज्जि खसि, येलि अँस्य समखव

आरु वसि कमि अमि, म्यवु कुल ब्वन नमि
मोत यावुन लसि, येलि अँस्य समखव

पम्पोश मँत्य करि, ख्यल आलुव्यस नरि
कुन्दन लसि बसि, येलि अँस्य समखव



१७

यिहय वथ यिहय कथ

पोम्पुर करान शमुहस गथ
यिहय वथ यिहय कथ
पकान आयि पतय वथ
यिहय वथ यिहय कथ

ज्यवान सास मरान हथ
दिवान अख अँकिस लथ
कडान खूंत्य कडान रथ
ख्यवान छल ह्यवान न्यथ
खनान मेच चटान जथ
यिहय वथ यिह्य कथ

अँड्य छि त्रेशि हँत्य प्यथ
अँड्यन प्राचु बँरिथ च्यथ
अँड्यन लोगमुत ख्यत तु ख्यत
अँड्यन वोत फाकु र्यथ
खबर पेयख कम हापत
यिहय वथ यिह्य कथ

मनुश मा छु ह्यवान पथ
अँमिस वँरमुच मायि दथ
मरान अख अँकिस पथ
लँगतन जुव व्वथिसा छथ
कँडचन दिवान पोशि प्रथ
यिहय वथ यिह्य कथ

कुन्दन छुम मे यी ताकत
मे छुम गछान मनस मथ
गँछुम पोशुन्य तसंज वथ
पोशुवनी सतुच वथ
पोम्पुर करान शमहस गथ
यिहय वथ यिह्य कथ



१८

बॉथ तु दुख

शाम हय सपनुम रॉस्य
व्वदॉस्य गॅयस बो
व्यसुरेयम मे मस खॉस्य
व्वदॉस्य गॅयस बो

मोत मे लटि यी ना
मटि छस दर्शुन दी ना
अँद्य अँद्य फेरु बु तॉस्य
व्वदॉस्य गॅयस बो

तारुकव खोतु ज़्यादय
तँम्य वॅर्य ना मे वादय
ऑद्य ताम तस याद ऑस्य
व्वदॉस्य गॅयस बो

पादन त्रावस सर
मदन वार यियम कर
हटि ची च़टि हेम फॉस्य
व्वदॉस्य गॅयस बो

मे गॅछ स्यॅज नज़राह
 चलिहेम वॅह्य तु वाह
 पानस छॉव्यतन सॉस्य
 व्वदॉस्य गॅयस बो

छॅर नज़राह मॉनिम
 स्वय गॅनीमथ जॉनिम
 नतु मे ति हावस ऑस्य
 व्वदॉस्य गॅयस बो

वावन कॅर ठसराय
 मे दोप फीरस माय
 नैदुरॅय गॅयि मे पाटॉस्य
 व्वदॉस्य गॅयस बो

कुन्दन फेरानय
 वुछ तोन वानु वानय
 छत गॅयि छल पेयि वॉस्य
 व्वदॉस्य गॅयस बो



१९

रोव हय करुवय

रोव हय करुवय शेहजारस तय, शेहजारस तय
वनवनु सुय तुलिवुय दस तय, तुलिवुय दस तय

बॉथाह तुल तय मोदुराह म्यूठाह, मोदुराह म्यूठाह
दॅर्य गंडुनस युथ असि यी रस तय, असि यी रस तय

लालय गोमुय अनुने बाज़र, अनुने बाज़र
हटि कुय होंज़ुर कनुकुय वस तय, कनुकुय वस तय

हतु बॅद्य दीनस सथ छम तॅम्यसुंज़, सथ छम तॅम्यसुंज़
लगुसय पॉरी दसतारस तय, दसतारस तय

अरशुक कॅर्यनस विज़ि विज़ि रॉछाह, विज़ि विज़ि रॉछाह
लोलुक मस दिथ कॅरुनस मस तय, कॅरुनस मस तय

ज़ी कुल्यसुय तस पॅद्य मा लूसिम, पॅद्य मा लूसिम
यी कर ही कदुमन वथुरस तय, मन वथुरस तय

कुन्दनु सुंद रुत नज़माह बॉथाह, नज़माह बॉथाह
गछ बा मॉलिस माजे लस तय, माजे लस तय



२०

मे मा वोन अपुज़ अज़

मे मा वोन अपुज़ अज़
 छु अज़ सोंत आमृत
 मे अज़ वोंत वृछने
 छु अज़ सोंत आमृत

अगर ज़न वोनूम रोशि चिकु चाव सोंतुक
 अपुज़ योद वोनूम रोशि नोव वाव सोंतुक
 मे मा वोन अपुज़ अज़

चलन जल तु बुलबुल, चमन वारि हँघ गुल
 फुलय डोठ बुज़्य गछि नबस फेरि सोसुन
 मे मा वोन अपुज़ अज़

अपुज़ योद वोनूम सोंत मा रोज़ि सोंतुय
 च़वापोर सोंतुक फकत आसि ब्रोंतुय
 मे मा वोन अपुज़ अज़

छु सोंतस स्यज़र बालु पानुक स्यज़र ह्यू
 छु सोंतस नव्यर ल्वकुचारुक नव्यर ह्यू
 मे मा वोन अपुज़ अज़

लगान सोंतु कालय छु ग्वड ज़िंदुगॉनी
 अँछन गाश ज़ोतान ज़्यवान मीठ वॉनी
 मे मा वोन अपुज़ अज़

छु सोंतय फवलान वारि बादम फुलय नँव
 करान कोरि हिकटा गंडान दँर्य करान रोव
 मे मा वोन अपुज़ अज़

ज़्यवान व्वस्तु हाक वारि मंज़ हाकु कानुल
 करान बोल बोश दारि तल टोठ बुलबुल
 मे मा वोन अपुज़ अज़

छु सोंतस ति अनहार सुबहुक प्रबातुक
 छु सोंतय ल्यखान ज़िंदुगॉनी ति ज़ातुक
 मे मा वोन अपुज़ अज़

छु फेरान स्वंदर मालनुय गाश स्वंदर
 छु सब्ज़ार पिशलान फवलान पोशि ग्वंदर
 मे मा वोन अपुज़ अज़

लिहाज़ा बु वनु पोज़
 पज़ी वातु खनुबल
 अमा पोज़ चु अन कन
 वनय पोज़ कनस तल

मे मा वोन अपुज अज
छु अज सोंत आमुत
लिहाजा बु वनु पोज
मगर वनु कनस तल



२१

तलु साँ वॅन्यतव

कुन्दन छा यथ नाव शॅरीरस
 किनु कलु ख्वपरि अंदर कुनि केंछा
 फुटजि वॅलिथ ज़न चूरि खॅटिथ केंह
 आँकुल यथ ज़न अक्ल वनान छी
 तॅथ्य मा नाव वनान यिम कुन्दन

किनु सीनस खोवर्य किन्य म्याँनिस
 कुछि मंज़ क्याहताम, यथ ज़न आँठन
 पॅहरन दुबु दुबुरारय आसान
 तॅथ्य मा नाव वनान यिम कुन्दन

या मा म्यान्यन तिमन खयालन
 यारन बायन यिम छुस बावान
 या मा सौंचस तिमन दूलाबन
 वॉलिंजि यिम वथुवार करान छिम
 तॅथ्य मा नाव वनान यिम कुन्दन

या अनुहारस कारस म्यॉनिस
 या व्यवहारस नतु वरतावस
 या असुनस या वदुनस म्यॉनिस
 या पकुनस या रुकुनस म्यॉनिस
 तँथ्य मा नाव वनान यिम कुन्दन

अँछ यिमु डेशान तिमु छय म्यान्यय
 कन यिम बोज़ान तिम छी म्यॉनी
 वुठ कुमलान तय दंद ज़ोतान छिम
 ज़ेवि हुंज़ टुकु टुख स्व ति छय म्यॉनी
 तँथ्य मा नाव वनान यिम कुन्दन

रगुनय मंज़ युस खून ग्रकान छुम
 मनुचे मनकलि नार वुहान युस
 बुमनुय म्यान्यन च़ख खसु चॉरिथ
 चेशमन दून युस खश्मु खसान छुम
 तँथ्य मा नाव वनान यिम कुन्दन

म्यॉनिस होशस या एहसासस
 किनु मशरब तय गफलँच़ म्याने
 म्याने मायि तु लोलस म्यॉनिस
 किनु दुय तय बेयि नफरँच़ म्याने
 तँथ्य मा नाव वनान यिम कुन्दन

क्रूदस चुन करान युस शीशस
क्रकि खसु ओबुरस वुज़मलु ज़ालान
शोरस कनुनुय ज़र पावान युस
शाँती खसु ज़न शुनिहिच छ्वपु हिश
तँथ्य मा नाव वनान यिम कुन्दन

वँन्यतव बायव तलु साँ वँन्यतव
कुन्दन छा यथ नाव शँरीरस
दिलस द्यमागस किनु अनुहारस
व्यवहारस छा किनु एहसासस
कथ साँ नाव वनान यिम कुन्दन
कथ बा नाव ह्यवान यिम कुन्दन
कथ छी नाव दिवान यिम कुन्दन
वँन्यतव बायव तलु साँ वँन्यतव



२२

अकत्रुहिम अक्तूबर

येलि व्यपदा वतुनस प्यठ छि यिवान
 तेलि छेपि छु प्यवान द्युन पान पनुन
 क्वरबान करुन जुव जान पनुन

रतु छफ ह्यू वंदनु यिवान वतुनस
 कांह ज़ीवाह, दीवाह या दीवी
 कांह मनुशाह रुत या ज़्युठ कांछा
 कांह लोलु बोछा कांह मायि मोताह
 कांह ड्यकु बोड या कांह बख्तु बोडाह

यस म्वल नु किहिन्य यथ समसारस
 यस छल नु कपट, यस मल नु मनस
 सुय वंदनु यिवान पनुनिस वतुनस
 क्वरबान करान जुव जान पनुन

युथ सूरत बचिनुच बनि कांछा
 सरपोश सिरन प्यठ रोज़ि वुरुन
 युथ रोज़ि अथन अथुवास कॅरिथ

युथ नेकन लागि अमृतकुय सग
 युथ रोज़ि प्रज़लवुन अमनुक रव
 युथ साज़न प्यठ कम सोज़ वज़न
 युथ मायन हुंघ ग्यव चाँग्य दज़न

 यियि कोर्यन हिकटन वार द्वहय
 यियि न्यंदु बाँतन व्यस्तार द्वहय
 युथ ज़ेनि द्वहय येति हक तय पोज़
 युथ ग्वरबत द्वख तय दाँघ चलन
 युथ सीनन हुंघ यिम छ्वख ति बलन

 रतु छफ ह्यू वंदनु यिवान वतुनस
 कांह मनुशाह या कांह मायि मोताह

 युथ दूर्यर च़लि बेयि च़लि क्रीर्यर
 द्रुह गेन्य च़लि ड्यकुची बेयि पँह्यर्यर
 युथ साँरी येति बेयि मँत्य करुनय
 वसमँच़ हुंघ युथ बेयि पँत्य बरुनय

 युथ साँरी शेरन रँछुरन व्वन्य
 युथ लूहरुन फुटरुन साँचि नु कांह
 अँस्य माय बरव प्रथ इनसानस
 अँस्य राँछ करव अमुनस वतुनस

बस यी ऑस सोंचान इन्द्राजी
बस यी ऑस कांछान इन्द्राजी

तमि पान वोंदुय अँथ्य आदर्शस
छेपि पान दितुय पनुनिस वतुनस

यिनु राव्यव तँम्य सुंज क्वरबॉनी
यिनु पान वंदुन गछि बे-मानी
अथुवास कॅरिव बेयि लोल बॅरिव
यथ अमुनस वतुनस रॉछ कॅरिव

प्रथ कांह बॅनिन येति लोलु बोछा
प्रथ कांह बॅनिन येति मायि मोता



२३

खबर कवु

खबर कवु छख खयालन मंज़ चु रावान ?

अँती आसख बिहिथ वातख खबर कोत
 कमन ताम हॉरिसातन मंज़ सनेमुच
 ग्वतन गॉमुच, कमन सोंचन चु पेमुच
 चिहिस अंदर छंडान छख मील काँत्याह
 खबर कम गम पखन प्यठ निथ गछान छी
 खबर कम फिकरु छय व्यसुतोन हावान

मे वोनूमय बार हा गम गछि नु ह्योन ज़ांह
 छु सोंचुन पोज़ अमा पोज़ सोंच क्युथ ह्यू ?
 छि आसान प्रथ अँकिस कथि वख दु-तरफय
 अगर गाशुक च़े सूंचुथ सोंच बर-हक
 अगर ज़न सोंच गटि हुंद तेलि नज़र छोट
 छु सोंचुन पोज़ अमा पोज़ सोंच त्युथ ह्यू
 सनेयस यस पँदिस म्वंजि काँठ रथ आस
 दोपुन 'द्रामुत बु ज़ंगि ओसुस रुची अज़
 खबर ड्यकि मा मे ओसुम वॉरदाताह
 अंगुय मा राविहेम फुटिहेम मे नॅर ज़ंग

खबर बतु थाल कॅम्यसुंद ब्रूँक्य मे आम
यिथय रतु रछ मे आयम, दॅय रोछुस अज़'

नतय तॅम्य दिच उचकस चँड पान मोरुन
'मे कस बद बख्तुसुय बुथ ओस वुछमुत'
रतस चॅर चॅर वुज़िन्य लागि नागु रादुच
हुर्यस दग तलु पॅदिस थवि चीरु थफ दिथ
कॅमी क्या तस गछी दौदिस तु दगि वन
कोरुस ज़न पकुवन्यव वति त्राहि त्राहे



२४

अख खयाल

अख खयालाह ब्यॉल्य फोल अख
 वोव तु खोत मनि ज़्यूठ कुल
 सोंचि समजुक बेयि व्यचारुक
 द्रायि बामन लँज फुलय, बागस
 च़वापोर मुश्कि अदफर
 बुलबुलव तुज शोख कँत्यजव बेयि जलव
 नी ज़न पखन प्यठ
 वातुनाँविख तरफु तरफय कूनु कूनस
 रेह हेचुन लोलस जनूनस
 नाव प्यव तस खूनु मजनून

लॉलि पथ देवानु सपन्यव
 वँन्य दिच़न तस नजदु वनसुय
 मोत मत्यव ज़न यथ जहानस
 वँन्य दिवान गव बे-निशानस
 छ़ाँड दिच़ तँम्य ज़ान प्रॉवुन
 वोत सुय अदु ला-मकानस

कर खयालाह
अख खयालाह
द्राव कति तय
वोत कोत !



२५

पोशि फोत

व्वलु यारु रछव अमारु पनुन
 दिलुक्यन अरमानन रॉछ करव
 आशन अछिदार्यन रख लागव
 ह्यस होशस पॉराव करव

दिलि जिगरस मंज थॉविथ ख्वशबू
 गिलु टूर्यन हुंद अनहार रटव

व्वलु यारु दिमव अज्ज चुख चांग्यन
 कथु पनुने नवि सरु परखावव
 शोलुनावव सॉचिच नॅव महफिल
 व्वज्जलावव लॉव्य खयाल पनुन्य

ह्यथ दज्जवुनि व्वज्जि मशालि पकव
 गुलि लालन हुंद व्यवहार रटव

व्वलु अॅस्य ति रटव अज्ज थज्जुरुच वथ
 व्वलु अज्जुमस सुत्य यारानु करव
 दी दय असि कदुमन नॅव बरकत
 युद पॅद्य त्रावव कोहु बालन कुन

व्वलु अँस्य ति लमव थोद ह्योर ह्योर कुन
येमि पेचानुक अनहार रटव

व्वलु यज़तुक बोड दसतार गंडव
बेयि शान पनुन्य थावव कौयिम
लछि लूकु मंज़य अँस्य नँन्य नेरव
तिथ्य ग्वन तय तिथ्य अवसाफ थवव

व्वलु अँस्य ति द्यमागाह त्युथ थावव
जाफूर्य सुंद अँस्य व्यवहार रटव

व्वलु नेरव डल सॉलस मॉलस
ज़िंदुगी हुंज़ थावव अलम रँटिथ
ख्यल वँथुरन त्रावव थज़रु नज़र
सुबह शामन हावव जलवु पनुन

अँस्य अख अँकिसुय मँत्य मीठ्य करव
पम्पोशन हुंद अनहार रटव

व्वलु अँस्य ति थवव ख्वय सिरियस कुन
बेयि नूरस गाशस कव थावव
ज़ुचि वाने हेरि ब्वनु श्रान करव
प्रव गाशिक्य वस्त्र लागव नँव्य

अँस्य रोज़व मुदय गँडिथ सिरियस
गुलि अखताबुक व्यवहार रटव

प्रथ गाचि व्वलो अँस्य पोश बनव
विरिक्योम सोम्बुल मदहोश बनव
शोलुनावव ज़गतुच बागु बबुर
मस चावव बेयि म्वय नोश बनव

यि छु कुन्दन अज़लय पोशि मोताह
व्वलु अँम्यसुंघ अँस्य अनहार रटव

अनहार रटव व्यवहार रटव
व्यवहार रटव अनहार रटव



२६

गुल बहारुक गाशि तारुख

गुल बहारुक गाशि तारुख आशिनय छुम रॉछदर
ल्वकुचार यस सुत्य गुजर्यव सुत्य यस गुजर्यम बुजर

हरनु चेशमव छुम वुछान याम तिम छि शूबान क्या वनय
ज़न तु छी तिम ज़ून गाशस प्यठ लेखिथ बस ज़ुय अछर

चाल क्या छस राज़ होंज़ुन्य, फाल वुछिथुय आव याम
तँम्य रँछिम च्यथ सथ मे दिचुनम गटु ति चलि व्वन्य फ्वलि सहर

वेरि तँम्य संज़ि सेरि फम्बुचे कॉर मे लूसम कतान
ओम अबसुम खाम व्येछुनुम ज़ांह मे नॅर मा थॅव पथर

हुर्य बु वनुहस शुर्य ति प्रारान छिस बु प्रारान पानु छस
ओश गव यिम वादु वॅर्य वॅर्य तिम मे गछुनम पूर कर ?

योद बु डीशिथ काँसि हुंद कॅह क्रेशुहा, व्वश त्रावुहा
ओस मे सुय दोस लॉगिथ यी वनान ज़न छुय मच़र

वुन्यक्यनस तस लोलु फोटिसुय मारु मॅत्यसुय लॅज खबर
ही थर्यन हुंद अॅरनि रंग क्या गव बजर क्या गव ल्वचर

अज़ तॅमिस क्याहताम बास्यव कलु छु कोडमुत कॅम्य गुलन
कुस सना कोस्तूर बोल्योव, नूर फोल कुस क्या खबर ?

कम संगर मालय वुछम तॅम्य अज़ असान कुमलान वुठ
वावनुय यी बोवनस तथ मा वुन्युक ताम द्राव तर

वादु छुम कोरमुत मे **कुन्दन** याम शेछ ह्यथ योर यी
ज़ी कुलिस तस ही बु वथुरस पादनुय त्रावस बु सर



२७

जिन्दगी हुंद सोंथ

जिन्दगी हुंद सोंथ मो व्वन्य रावुराव
चाव मति अज़ चाव प्यालाह चावुनाव

आसि हे युद लोल बरुनस म्वल तु बाव
बिलुहनस तेलि क्याज़ि पेयिहे चूर नाव

कालिदासन सूज़ कवु शेछ ह्यथ ओबुर
यस मँतिस यिथु वँन्य दिलुक अरमान द्राव

पोशि टूर्यो! फवलनु रोस छुय क्या हसर
रंग रूपाह हाव नोन कड नेछुनाव

हवनुकुय होतुशीश ज़न लागन अँछन
व्वथ तिथुय पनुन्यव अथव कैह ख्यावुनाव

लोलु वुछुनस तँम्यसुंदिस वंदु जुव पनुन
दोलु वुछुनस जिगरुकुय तोत आमताव

लालु सुंद्य पॉठ्यन कोडुम मा दाग नोन
दोप मे व्वसतादन गमस खंगालु त्राव

वॅरिणि कौत्याह खॅत्य मे अज़ ताम क्याह अंद्योव
चॅद्रमय बेहतर द्वहन मंज़ माह बन्याव
द्राव कुन्दन लोलु बाज़ुर्य चावु सान
काहवॅनी आनन पेयस ग्वरदौल्य पाव



२८

फलसफन हुंज़ छम नु लालो कैह खबर

फलसफन हुंज़ छम नु लालो कैह खबर
रुत यि बासान छुम वनान छुस तँथ्य ज़बर

नेरुवुन पोत नज़रि वुछ मे चेश्मु जूर्य
टॉर्य बॅर्य बॅर्य हॉर्य तिम ज़न पोशि सर

सेद्य वँथुर पम्पोशिकी येति म्वखतु द्राव
दुब थविथ वँथरव प्यठन कोर तँम्य सफर

सुब दमस च़लि यार सपुनान सीनु चाक
शामु शामय च़ोल सु योद बासान कहर

ज़ून पछ गट पछ मे मोनुम ब्योन हना
राथ गँयि राथुय सहर ऑखुर सहर

आमुतावन हुंद वुहन छुम कम हना
बेह हना, ब्रुंज़ा, च्युहा, साथा, पँहँर

रातु म्वगुलस यस दूहय गोट द्रींठ्य आव
ज़िंदगी हुंद कंद लगान तस छुय ज़हर

मोत गुलालाह शॉयिराह कुन्दन दपान
दीनु सीनुक्य छी कुनी यिम नामवर



२९

टाळ्यो वंद्यो जुव जान

टाळ्यो वंद्यो जुव जान, पदमान छसय पेशकश
श्वन्य श्वन्य वनिदार दामान, जानान छसय पेशकश

यिनु चानि गटु ज़ोल च़ोल तय, आकाशन गाश वोल तय
खोत नोन प्रवु त्रावान, प्रज़लान छसय पेशकश

सोंतन बागस कोर जोट, बोम्बुर्य पोशाह मति रोट
बुलबुल गुल क्याह छावान, पेचान छसय पेशकश

पां-चादर गॅयि गॅल्य गॅल्य, वछि वॉलिंजि वॅछ वॅल्य वॅल्य
गिल क्या दिल फवलुरावान, शिलुपान छसय पेशकश

नीजर फ्यूर सबज़ारस, तन वॅथरुन दिलदारस
नेत्रन नूर हुररावान, जानान छसय पेशकश

करतो मति म्योन चारय, बलु युथ बु ति बेमारय
दाद्यन करतम दरमान, अरमान छसय पेशकश

चमका पॅरयाह लालो, गॉमुच छस बे-हालो
ह्यसु छुहॅमो व्यसुरावान, जुव जान छसय पेशकश

हाँगनि रोट चावु पां फ्योर, लोलन म्वखताह सुय कोर
यँच काल मे ति वोत प्रारान, दुरदान छसय पेशकश

मोम बँत्य ओश क्याज़ि हारान, पोम्पुर छुस गथ मारान
वति चानि नूर छँकुरावान, ज़ोतान छसय पेशकश

कथि चानि मेछर तु बेयि रस, चोन क्युत छुम अंगूर्य मस
मेछर छुम मँचुरावान, तम्बुलान छसय पेशकश

कुन्दन छुख चिकुचावय, स्वनु तन क्या बु थ्यकुनावय
मँत्य मुर ज़न छुस मँदुछान, व्वशलान छसय पेशकश



३०

मति रटुथा नालुमते

मति रटुथा नालुमते, कति कते छोरमख
मत्या म्यानि तापु तते, कति कते छोरमख

गोमुत युस ज़न लछि तु लते, बाँतस किथुक्कन्य थाव्यम कन
वाह वाह करि क्याह वाह यस स्वते, कति कते छोरमख

अनिरस मंज़ वन क्या करु येते, मटि येम्य हेचमुच म्याँनी नाव
सुय येलि गिँदि येति ज़ारस पते, कति कते छोरमख

वथ क्या हाव्यम सुय मंज़ वते, असि कुन येम्य ज़न थर फिरनॉव
तापुनि तावय मस यस छते, कति कते छोरमख

मत्या वनतम ओसुख कते, त्रॉविथ कवु सनु गोमुत मे
रस कुस ओसुय लोगमुत तते, कति कते छोरमख

मति म्याने नैदरि हते, नज़राह करतो पूरिस कुन
गाशाह यिवुन वुछ फवति फवते, कति कते छोरमख

सूरत मा छय च़े ति हति शते, नतय ओसुख चु ति ख्वाजाह
चंदु छरिनय किच जाय छा येते, कति कते छोरमख

व्वलु सॉ बायो चु ति ल्वति ल्वते, वॉलिंजि हुंज़ुय बोज़ दुबुराय
युथ नो अरमान गछन ख्वते, कति कते छोरमख

सॉरी पॅक्यतव तोह्य म्यानि वते, वुछ तव बोठ किथु वात्यव नाव
बरकत आस्यव त्वहि हरकते, कति कते छोरमख

रहबर यस गव कातय क्वते, कुन्दन क्यथु करि सुय अथुरोट
येति गछि आसुन मोत युस मते, कति कते छोरमख



३१

येलि हर्दनि छटु छय ग्रायि छटन

येलि हर्दनि छटु छय ग्रायि छटन
 गगरायि फटन येलि रूदु त्रटन
 तेलि नील गछन छय नीलु वटन
 ख्यलु वँथुरन हुंद मति हाल मु पृछ

येलि कालु ओबुर खसि असमानन
 वुजि वुजुमलु बुजि खसु बुस्तानन
 तेलि अलु अलु अचि ना कोहु बालन
 ही थरिनय हुंद मति हाल मु पृछ

येलि मायि मशन ज़न छायि बँनिथ
 पेयि लोलुय ज़न मुलु मायि छोनिथ
 प्यन आशि हँरिथ बेयि रायि छेनिथ
 मचि वाँलिजि हुंद मति हाल मु पृछ

येलि स्यज़ुरस चार्यर नाव करन
 येलि पज़रुक मोत चिकुचाव खरन
 येलि बुलबुलनुय क्युत पंजरु गरन
 अदु गुलुनँय हुंद मति हाल मु पृछ

येलि लोलस मॅल्य कांह हेयि द्यारन
 येलि हुस्नस तामथ कॅड्य चारन
 तेलि बोन्न्यन हुंघ ताम ग्वड थारन
 क्वंगु पोशन हुंद मति हाल मु पृछ

तिम आरन ठ्वलि दिन आरु पलन
 ज़न नारस पुरु दसतार वलन
 अदु ग्रज़ व्वथि आबस आरुवलन
 तमि सॅहलाबुक मति हाल मु पृछ

य्वसु हालत कुन्दन लालस छम
 स्वय ग्रख यथ मसुकिस प्यालस छम
 या खबराह ज़ूनि गुलालस छम
 छ्यतु चेश्मन हुंद मति हाल मु पृछ



३२

फवलुन येछिनय

फवलुन येछिनय च़े गुलि दूराह
 नचुन येछिनय च़े बम्बूराह
 तु पोशाह ह्यू असुन येछिनय
 लसुन येछिनय बसुन येछिनय

च़े वावुक्य पॉठ्य वुफ निन्य छय
 तु बावुक्य पॉठ्य वॅन्य दिन्य छय
 च़ु पेचानाह खसुन येछिनय
 लसुन येछिनय बसुन येछिनय

दोपुख अँशकस दूलाबाह छुय
 यि हुस्नस युस हिजाबाह छुय
 दूलाबन मंज़ फसुन येछिनय
 लसुन येछिनय बसुन येछिनय

दोपुख हुस्नस न्यबर मो पख
 बे-परदय नेरनुक छा वख
 दिलन अंदर बसुन येछिनय
 लसुन येछिनय बसुन येछिनय

नैदुर तारक नबस यी कर
व्वमेज़न नेरि किथु वॅकन्य तर
यिमन सनिरन वसुन येछिनय
लसुन येछिनय बसुन येछिनय

प्रबातुक्य पॉठ्य नोवुरावी
तु सोंतुक्य पॉठ्य फोलुरावी
डलुक्य पॉठ्यन चसुन येछिनय
लसुन येछिनय बसुन येछिनय

चु कुन्दन ताज़ु बाँथाह पर
तु आरुक्य पॉठ्य ग्यवुनाह कर
चे रासस मंज़ रसुन येछिनय
लसुन येछिनय बसुन येछिनय



३३

मदनन कॅर्यनम जिगरस पारो

मदनन कॅर्यनम जिगरस पारो
 यारो तॉय तु हॉय
 हायि तु ज़ायि मोत ल्वकुचारो
 यारो तॉय तु हॉय

चमुनन च़ायोव लोलु बेमारो
 लालस ति डीशिन छ्वकुलद तन
 दूशवय तिम छी अकि अनहारो
 यारो तॉय तु हॉय

सोदुरस तरुनस गछु तयारो
 हम तुल पानय वायुन नाव
 पर रटि नम कर लोगमुत छु तारो
 यारो तॉय तु हॉय

जाफुर्य गौडमुत बोड दसतारो
 पोशि थॅर माहरेन्य मंदुछान ज़न
 रंगु रंगु पोश छिस यनि वॉल्य यारो
 यारो तॉय तु हॉय

छोकनुय लागान छुम शुमारो
 तारक ग्रेंदि कस आयि अज़ ताम
 दरशुन दी सुय बनि बुलगारो
 यारो तॉय तु हॉय

बे-आर प्योमुत छुम मदनवारो
 बदनस कोरुनम क्वंग ह्यू रंग
 छॅत्य गोम पॅत्य सुय व्वशलुन्य नारो
 यारो तॉय तु हॉय

मोत मनसूर खोत ना प्यठ दारो
 पज़रुचि लंजि मा थफ त्रॉवन
 मे ति कोरमुत छुय सुय यकरारो
 यारो तॉय तु हॉय

कुन्दन गोमुत छुय गिरिफ्तारो
 हुस्नन कॅरमुच छस हाँकल
 तॅस्य पतु छुन त्रोवुमुत कारुबारो
 यारो तॉय तु हॉय



३४

अख अख कॅन्य लॉग्यतोस गॅर्य गॅरिये

अख अख कॅन्य लॉग्यतोस गॅर्य गॅरिये
 पॅरिये मॅहलस दीतव कुन
 रंगु रंगु बोलन जानावॅरिये
 पॅरिये मॅहलस दीतव कुन

स्वनु लाँकि तामथ अँस्य हसाँ तॅरिये
 शालुमॉर तामथ रूद कोताह
 युस यूत पोक तस तीत्य कोठ्य दॅरिये
 पॅरिये मॅहलस दीतव कुन

कोड युस दार्यव सुय च़ाव बरुये
 बरु कोड तु दार्यव बेयि पोत च़ाव
 अथ तूफ़ानस थँव्यतव ठॅरिये
 पॅरिये मॅहलस दीतव कुन

मन गॅछ्य आसुन्य कनि खोतु दॅरिये
 कन गॅछ्य कावय शुप्य सपनुन्य
 हेह युथनु गछिहे कम कम पॅरिये
 पॅरिये मॅहलस दीतव कुन

मत्तु रावुर्यतोन कथु कॅर्यकॅरिये
 वाँस छवु न्यामथ रथि खॉर्यून
 रोव कॅर्यतव गँड्यतव तोह्य दॅरिये
 पॅरिये मँहलस दीतव कुन

काँसि गँछ्य नु आसुन्य येति छोट्य नॅरिये
 ज़ेठ्यव नरिवुय छु ख्योमुत साल
 प्रथ कुनि नालस जॅर्य तव जॅरिये
 पॅरिये मँहलस दीतव कुन

वावन लुहरॉव्य साँन्य स्वनु मॅरिये
 तुजि तुजि हेत्य असि बेयि सोम्बरुन्य
 पूर गँछि तु बाँगरव अँस्यति च्वचि वॅरिये
 पॅरिये मँहलस दीतव कुन

प्रथ नवरेह छुय खसान नोव वॅरिये
 ज़िंदु रूद सुय यस कैह हाँसिल
 बाक्य आयि यिथ्य गॅयि तिथी छॅरिये
 पॅरिये मँहलस दीतव कुन

हर्दनि वावय काँत्याह हँरिये
हँर्यमँत्य छि आसान खँर मँत्य ज़न
तिमनुय छु बोश येति यिम छि दँर्य अँरिये
पँरिये मँहलस दीतव कुन

कुन्दन छुय वनान म्यॉन्त्य रंगु चँरिये
चोनुय मोहबत छु वुफुनावान
विजि वावस नतु वनतु कम दँरिये
पँरिये मँहलस दीतव कुन



३५

द्वह तु द्वह

द्वह तु द्वह, द्वह तु द्वह
 लूक ति द्वह तु बोड ति द्वह
 रुदु द्वह तु तापु द्वह
 द्वह तु द्वह, द्वह तु द्वह

अँती प्यवान पेठ्य तु कोह
 अँती गछान वुडिथ तोह
 द्वह तु द्वह, द्वह तु द्वह
 वुशुन वुशुन हारु द्वह

लँजिस तुर तु बन्योव पोह
 सोंतु मारान फुलयि छोह
 हर्द करान हो तु हो
 द्वह तु द्वह, द्वह तु द्वह

द्वह तु द्वह, द्वह तु द्वह
 हिकट करव चु तु बो
 चकुट्य हरव चु तु बो
 ह्यमत करव चु तु बो

माय बरव चु तु बो
द्वह तु द्वह, द्वह तु द्वह

अँड्य छि तुकान व्वस्तस द्वह
अँड्यन वती लोसान द्वह
लोलु मत्यो फुटर कोह
कुन्दन रँटिथ कलम लोह

द्वह तु द्वह, द्वह तु द्वह
द्वहय द्वह द्वहय द्वह
तापु द्वह तु रूदु द्वह



३६

चाव येलि चावय सॉनिस दारस

चाव येलि चावय सॉनिस दारस
 यारस पनुनिस पुशरुम पान
 थलि थलि वुछुमय तस दसतारस
 यारस पनुनिस पुशरुम पान

यिनु तॅम्य सुंदि फोल्थ गुल गुलज़ारस
 पोशव शबनमु सुत्य कोर श्रान
 बोम्बुर लोग बेयि पनुनिस कारस
 यारस पनुनिस पुशरुम पान

ज़गतन क्रख तुज नरि दिचु नारस
 जानन मतुसॉ कॅर्यतव फान
 कन मा थोव काँसि ज़ारस पारस
 यारस पनुनिस पुशरुम पान

नीजर कॅम्य द्युत यथ सब्ज़ारस
 रज़ि कॅम्य खोरुय मोत पेचान
 ग्रख कॅम्य दिचुनय र्वपु आबुशारस
 यारस पनुनिस पुशरुम पान

चॅर काँटुर लॅग्य कथु दरबारस
 अख अँक्यसुय छी लोल बावान
 मँत्य करुहख अथ मँत्य अनुहारस
 यारस पनुनिस पुशरुम पान

मनसूर येलि ज़न खोरुख दारस
 तँम्य तति सोरनय सुय बगवान
 मोतन कोर क्याह तस म्वखतारस
 यारस पनुनिस पुशरुम पान

पज़रुच त्यम्बुराह पेयि अम्बारस
 सूर गव अपज़िस नोन द्राव पान
 पूज़ा कॅर मे पनुनिस यारस
 यारस पनुनिस पुशरुम पान

खोच़ मो व्वलुरस या विजि वावस
 तारन वोल छुय सुय नारान
 रुच़ अमलाह छय उजरत तारस
 यारस पनुनिस पुशरुम पान

रॉछ कर पछि तय बेयि एतिबारस
 बॉगर लोल तय बन इनसान
 कुन्दन मानि छुय चॉनिस शारस
 यारस पनुनिस पुशरुम पान



३७

प्रोन पथ त्रॉविव

प्रोन पथ त्रॉविव नोव नेछिनाँविव
 लोल बाँगुराँविव छाँविव पोश
 पोशे बागुक्य गुल छिवु साँरी
 मिलुचार थाँविव छाँविव पोश

ललि हुंघ वाख तय श्रुख नुंदु रेश्यनी
 तोह्य व्यछुनाँविव छाँविव पोश
 व्वलुरुक बाडव डलुची रोनक
 यिनु मँशिराँविव छाँविव पोश

अभिनव ममट कल्हन तु कैयट
 तोह्य याद पाँविव छाँविव पोश
 अँक्य सुंद आँगरुन बेयि सुंद बाँगरुन
 यिनु गँज़ुराँविव छाँविव पोश

फुटरान बेकुल लुहरान नादान
 तोह्य गरुनाँविव छाँविव पोश
 साँनी वसमथ साँनी दौलथ
 अथ पुशुराँविव छाँविव पोश

अथु रटि सुत्यन चलि गोट सोरुय
प्रागाश प्रॉविव छॉविव पोश
तोह्य छिवु ऑकुल तोह्य छिवु ऑलिम
जोदथ हॉविव छॉविव पोश

वॅर्यनवु यॉरी त्वहि म्यॉन्य हॉरी
अथु मिलुनॉविव छॉविव पोश

कुन्दन चॉनी रुच रुच वॉनी
बेयि बोज़ुनॉविव छॉविव पोश



३८

बु फेरान बाज़ुरस छुस वानु वानय

(१)

बु फेरान बाज़ुरस छुस वानु वानय
 मे गॉमुच बतु फल्यन छम आनु मानय
 रटान छुस छाय पनुनी वुछ मचर वुछ
 दवस पतु यूत त्यूताह छम चलानय

(२)

गरज़ छुय प्रथ अँकिस येति वुनु वालान
 करान खम कारि ख्वद-दॉरी छु गालान
 गरज़-मंद ख्वर छलान ह्वंगुन्यन करान थफ
 ति ऑसिथ छुय पतव लाकन सु नालान

(३)

अबख छॉनुय प्योमुत येलि राज़दाने
 तु लल छँन्य नँन्य स्व दियि क्याह नावि तारस
 चु वनुहस म्वख्तु जोरमुत प्वख्तु कारन
 मे बासान ओश छु टार्यन प्यठ बहारस

(४)

शुरिस सॉविथ कलस तल लूंग्य थॉवुन
 मछव म्वखु व्वडि हुंजुय तस पूच त्रॉवुन
 गॅछिथ कॅह काल कॅरुनस प्यांपुरारय
 कॅडिथ बब नालु किन्य तस आपुरॉवुन

(५)

यि मा गव जान वोनूनस ओमुनि माजे
 वॅछुस स्व ति योद करान छख कालु काजे
 शुर्यव कॅर हर तु माजव टॅप्य कडय कॅर
 गिंदान तिम द्राबि हुंदे गोरु माजे

(६)

मोजूरव पॅत्यलु लोग इस्टेशनस प्यठ
 तिमन ऑस येति ति आमुच चायि हुंजु ट्यठ
 चॅलिथ यिम लारु की दारस दिवान फ्युर
 अमा कुनि वानु चलि ना म्यादुची स्यठ

(७)

‘सरायाह छुय यि दुनिया’ यी वनान काख
 बबन वोन ‘कारखानाह येति छु अख ब्याख’
 मे वोनूमख हर्दुची छम वॉर येमि किन्य
 कंडचन प्यठ जामुनय बुलबुल दिवान चाख

(८)

वुछुन सुबहस कोहव पॅत्य किन्य खसान रव
 येम्बुरज़लि चेश्मनय शबनम होखिथ गव
 शबस ऑसिन नबुक्य तारख गँज़ुरमुत्य
 छु ऑखुर मोहबतस हुस्नस कुनुय पव

(९)

चुकुट्य चामुत्य परिन्य गॉमुत्य मे अंदुवंद
 छि मा तानस अँकिस क्यथ बो ह्यमख ग्रंद
 चु सुवहख चाख जिगरुक्य ब्याख कथ ऑस
 दिवान तुर तुर व्वपर सुवनुक्य करान फंद

(१०)

म्वलुल म्वख्ताय मे चेश्मन हुंद हॅरिथ प्यव
 दिचम क्रकु ह्युर होखुम तालस लॅजिम ज्यव
 लोदुर मा आम अथि पेयि डुंगि मे खारुन
 अमा अज़ ताम सेज़ि ऑगुजे खोताह ग्यव

(११)

छुसन बो करु फल्यव सुत्य रंज़ुनावान
 क्वठ्यन हुंद ह्यस अँछन हुंद गाश संतान
 फवलान छम ब्वकु तु वॉलिंजि वॅथ्य गछान बर
 युथुय चॉपिथ मे वापस आपुरावान

(१२)

वुठस दूद फ्यरनु नालस बतु फॅली लॉर्य
 हतो कावो व्वं छी ज़ुय मॅड्य लगय पॉर्य
 वन्योस माजे यि क्या बोज़्यस ति गव
 अँमिस छय मास आमुच गोब्य गॅमुत्य टॉर्य

(१३)

मे छोव अँछ गाश पश्मीनस तु रफुलस
 लोगुम खम कारि वँह्य ख्रोब च़ाम पुशतस
 थोवुम येछि सान ब्रोंह कनि गाशुदारस
 र्वपुल दाह बूज़्यथुय तस तालि खँच नस

(१४)

दिवान ओस अख शुराह अख बतखनुय छग
 हता दिग हा दियी थँच माजि हँट्य रग
 बनॉविथ लोरि कुटनस गुर दवान शुर
 तँमिस गिंदु बाशि ज़न होति माजि डँब्य दग

(१५)

छे होकुन चाँद्य योकुन छिम मे अरमान
 हु छुम वॉलिंग रँटिथ यि छुम अँछ नाटु हावान
 दपान छुस होर गछुहा योर मा वोतुस
 व्वं गछुहा तूर्य नफुसस छुस नु पोशान

(१६)

दप्योनम यि मो फुटरुन यि छुय वोंठ
 मे मा मोनुस कोरुम ब्योन खोंट तय खोंट
 छोचुय ड्युंठुम मे अँम्यसुंद पान सोरुय
 वुठन फश फश दिवान रुज्ज ज्यव तु होख चोंठ

(१७)

मे मा छुम राह राहस छम रॉश कुन थर
 शनश्चर छुम बिहिथ ज़न तौर्य दिथ बर
 मे ते आँखुर छि पॅरमुच शारदा ज्यव
 बु ह्यमु व्वन्य कॉम कलुमस होख्य करख तर

(१८)

वछस तल दिल दिलस मंज़ जाय चॉनी
 अँछन मंज़ लाल लालन छाय चॉनी
 दिलुच दुबराय चोनुय बास द्यावान
 अँछन मंज़ रंग रुपुच जाय चॉनी

(१९)

प्रबातुक गाश चोनुय म्वख प्रज़लवुन
 छु चोन आसुन डलुक पम्पोश फवलुवुन
 च्ववापोर सोंत चोनुय रुप तय रंग
 मे छम मस्ती अमिच अथ क्याह छु म्वलवुन

(२०)

ख्यलव पेठ्य मे दिचुमय छाँड डलनुय
 वोथुस सनिरन खोतुस बालन तु पलनुय
 मे काँत्याह डीँठ्य स्वंदर त्रॉव्य पथ कुन
 दिवान गोसय बु वॅन्य च़े सँदरबलनुय

(२१)

मे छिम ख्वश यिवान शोख फॅल्यमुत्य गुलालय
 कडाम्न मा ज़ुहुन्य क्रुथ रटान मा मलालय
 यिहय नारु छट ज़न यिमय खून मजनून
 करान सासु बज़ लॉलु छख दिल हवालय

(२२)

दिल छु येम्य सुंद सोन समंदर छुस गवाह
 ब्वद छि यस आकाश बोड तय बे-पनाह
 छय नज़र सथ परदु च़ॅट्य च़ॅट्य यस पिलान
 पाद छलहोस आसि ना त्युथ आदुमाह

(२३)

यि कोर सान्यव ज़िठ्यव त्युतुय अगर असि कोर तु क्याह कोर
 कोरय तमि निशि बतर त्यलि चॉर्य अँस्य पानस दगाह कोर
 तेली गँयि कथ अगर असि तँज कडुन्य वथ यथ जहानस
 अगर बुतरॉच़ कोर जनत अगर प्रथ कांह गदा शाह कोर

(२४)

अँछन सोदा छु दीदाराह नज़ाराह
 अथन सोदा छु दसबूस्याह कराराह
 दिलन सोदा पकुन चोनुय तिरथ कुन
 दिलन सोदा छ्वखाह यादाह तु याराह

(२५)

हँटिस हाँकल छुनुन्य छय सँहल आसान
 हच्यन हथवैर्य छुनुन्य मुमकिन छि बासान
 बु लगुहॉ पॉर्य चॉनिस ज़ोरु ज़बुरस
 करख क्याह छुम खयालन हुंद मे तूफान

(२६)

शमाह दोद रॉत्य रातस ख्योन अनि गोट
 सुबुह यामथ सपुद तस क्याह म्वच्योव लोट
 छि यिम गाशस पथुय मारान पनुन पान
 तिमन क्याह वाँस आसुन्य ज़ीठ या छोट



३९

सॉन्य मयकश आयि अज़ सालस

सॉन्य मयकश आयि अज़ सालस
 कलुवालस पृछतु म्योन हाल
 कलुवालस टॉठिस लालस
 कलुवालस पृछतु म्योन हाल

कारि पॅत्य वोन दारितल लालस
 तला दिलुकुय वनतु अहवाल
 कांह ति वोतुय नु छ्वकुलद हालस
 कलुवालस पृछतु म्योन हाल

चेरु नॅम्य गॉम चेश्मु गुलालस
 मस मलुर्यन प्यव कुस शाल
 श्रोप्या शीशस किनु श्रेपि प्यालस
 कलुवालस पृछतु म्योन हाल

मीठ्य दिनि लोग ओबुराह बालस
 चे ति किथु कनि मॉरुथ छाल
 बु सॉ अज़मन खोरुस पांचालस
 कलुवालस पृछतु म्योन हाल

सीनु मुचरिथ वुछतु परगालस
 ज़खन छुम वुनि सुय हाल
 सुय फ्यरन नॉल्य टूफोल नालस
 कलवालस पृछतु म्योन हाल

यनु लोगुनस लोलु जंजालस
 कनि फलिनुय वुछमस फाल
 ह्युर होखुम तय ज्यव लॅजिम तालस
 कलवालस पृछतु म्योन हाल

प्रॉर्य प्रॉरी यीतिस कालस
 मोठुमुत छुम प्रोन खतु खाल
 गाश सोर्योम अथु बो डालस
 कलवालस पृछतु म्योन हाल

लोलन वोन जुल्फुकिस वालस
 छोर आसुन छनु कांह गाल
 नॉग्य राय क्याज़ि वोथ पातालस
 कलवालस पृछतु म्योन हाल

जुव बु वंदुहा कुन्दन लालस
कोस्तूरन्य छस बोल चाल
खिर तु खंड बो शेरस थालस
कलुवालस पृष्ठतु म्योन हाल

कलुवालस पथ बु जुव गालस
कलुवालस पृष्ठतु म्योन हाल



४०

नाद लोय आबुशारव

नाद लोय आबुशारव व्वलु वेस्य
 साल कोर शालुमारव व्वलु वेस्य
 छिरुकोव फम्वारव व्वलु वेस्य
 वथुरोव सब्जारव! व्वलु वेस्य

यनु कोर असि म्युल तु अथुवास
 वुछनि लॅग्य असि लछ तय सास
 व्वपुरव योदवय द्युत नु असि बास
 कथु करि ज़ॉन्य कारव! व्वलु वेस्य

असि योछ यी ती मा सपुन्योव
 गमु पतु गम असि च़ालुन प्योव
 व्वन्य द्युत वाँलिंजि नोव आलव
 कोताह काल प्रारव! व्वलु वेस्य

हुस्नस डीशिथ यॅच़ तडपान
 लोलन आसिहे मोरमुत पान
 आशन प्यठ कोर तॅम्य गुज़रान
 दिल रोछ दिलदारव! व्वलु वेस्य

कुकिलव कोर कुल्य लंजि कू कू
 पोशुनूलव कोर गूव्यंद गू
 पोंपर्य कोर पानस पॅन्य फू
 दित्य मा तॅम्य बारव ! व्वलु वेस्य

संगरमालन प्योव नोव गाश
 येलि ज़न समयस वोथ परखाश
 ग्रहनु लद सिरिधि छुनु असि बरदाश
 गटि मंज़ गाश सारव ! व्वलु वेस्य

ड्यकु सुय दिमुये माह तय मीठ्य
 अडुवति प्यठनुय मा अँस्य बीठ्य
 पॅद्य त्रावव व्वन्य वॅल्य वॅल्य ज़ीठ्य
 ब्रौह कुन अँस्य लारव ! व्वलु वेस्य

असि येमिकुय शर ती प्रावव
 लोलस लोलाह अँस्य बावव
 वति वति नागु वानि तन नावव
 हुस्नस बोश खारव ! व्वलु वेस्य

कुन्दन मा यिधि लोलु निशि बाज़
 तुलमुत तॅम्य छुय सनुवुन साज़
 वोनमुत तस छुय अँदरिम राज़
 अहरबलु आबुशारव ! व्वलु वेस्य



४१

पोशि माल
(महजूरस खराजे अकीदत)

राथ शामन स्वर्गसुय मॉरुम मे छाल
श्वन्य करान ऑस वन्य, वज़ान ऑस मीठ ताल

शॉयिरन हुंज़ ऑस लॅजमुच महफिलाह
ऑस ज़न ब्योन ब्योन रंगन हुंज़ पोशि माल

मीर ऑसुख लल तु सॉरी तंदलि ऑस्य
सूफियानु ऑस ग्येवन अॅर्यनिमाल

तमि यि वोन छम यारु सुंजुय येति ति शय
कर सना यी बालुनुय लॅग्यमुत्य मे लाल

नूर दीनाह सूर मॅल्यथुय ड्यूठ मे
तस अॅछन मंज़ सुय जमालाह सुय जलाल

ज़ूनि डेश्यम चूनि दामानस जॅरिथ
क्वंगु टूर्यन हुंद मे पृछुनम वारु हाल

ऑस आज़ादस ड्यकस प्यठ फिक्र हिश
क्या सना कॉशुर ति आस्या बा-जमाल

मीर मकबूलस वुछिम कोबुल्य दछ
वुछनि लोगमुत यारु सुंदय खद खाल

मस्त ओस महमूद गॉमी रस लोगुम
तॅम्य कलामाह बोज़नोवुस बे-ज़वाल

अँशुकुनुय साज़ाह ह्यथन ओस रसुल मीर
शाह बादुक सुय गज़ल गो बे-मिसाल

सूफियन लय दय स्वरान ऑस्य मायि सान
शॉयिरन शय लोत रुवान ऑस्य म्वख्तु माल

कॉतिहन डीठम मे व्वपरन कुन नज़र
कॉशिर्यन कोस्तूरनुय ईरॉन्य चाल

माजि हुंद ओसुख युहुय द्वद प्राचि लोर
याम वुछहस लोलु वोलहम ताम नाल

इन्कलाबव बानु यिहुंदी पानु रँछ
ज्रांह ति मशुना काँर्यगर यिथ्य प्रॉन्य क्राल

आलुथाह कँडुमख तु दित्यमख मीठ्य मे
डॉल्य थँवमख ब्रोंठु कनि मे मेवु थाल

ग्राव कँरुमख ह्यथ चँलिव महजूर सोन
ज्रानि दय वोनुवोस क्याह त्वहि ज्राल ताल

ताम वोथ महजूर अँस्य साँरी छि तँत्य
योत यिनस मंज़ मीर कैह युद कैह फ़च़ाल

पोशनुय मंज़ गोशनुय मंज़ रोशि आँस्य
सोन यावुन लालु सोन अज़मुय छि बाल

शाँयिरन कोर पाँदु नसुलाह शूबुवुन
मोथ वाँयिन नय तु तथ ज्रांह यी नु काल

सर मे नोमुरिथ वोन छु यी सथ, हक तु पोज़
वारि मंज़ महजूरनुय तुल अलु फाल

शॉयिरी हुंज़ वॉर तॅम्य हमवार वॅर
लॉव दिचुनस लय तु द्युतुनस रुत खयाल

तॅथ्य छि वुन्यक्यन अँस्य छकान रुत्य म्वख्तु फॅल्य
युथ छु मूसिम तिछ दिवान छिस ब्यॉल्य च़ाल

अँथ्य खसन असि अँशकु पेचान आशि हुंद्य
गाश फवलि व्वन्य वोत प्रारान कूत काल

कॉशिर्यन सॉराब करि सुय मस मोदुर
ब्याख अद कुन्दन वुछख च़ु ति नेक फाल



४२

लालु फोल

मे वुछ ऊतरु तमि ऊतरु बेयि राथ शामन
 शुराह अख मंगान पोंसु खासन तु आमन
 गंडान गुल्य रटान ख्वर रटान ओस दामन

करान विलुज्जोरी करान आह व ज्जोरी
 दियिव पोंसु कदुमन लगेवु पौर्य पौरी
 तु दस्तगीर म्योनुय कर्यव त्वहि ति यौरी

तँमिस नॉल्य कुरतन्य फ्यरन जोरु मा ओस
 ख्वरन तस ति पॉजार पुलुहोर मा ओस
 बिहुन क्युत तँमिस ख्वपरि अख पोर मा ओस

तँमिस ज्जॉट ति कामुन्य तँमिस मेट ति कामुन्य
 वुछान नारु तँत्य वारु कुरतनि दामुन्य
 थकान पोंसु मँग्य मँग्य करान ओस ज़ामन्य

सुबुह फोल तु क्वकरन दिचुय बांग यामथ
 तँमिस नाल अथि मा ज़चन आव तामथ
 गछान छा अँमिस तौर छु वातान योतुय न्यथ

छयनान छिम अँमिस दूरिथुय पँक्य पँकी पँद्य
 मे वॉलिंजि हालन अँम्य सुंद्य वँरिम गँद्य
 तिथी यिथ्य अँमिस तल-पद्यन छी गँमुत्य जँद्य

छलस ना बु बुथ अथु छलस ना बु अँछ कन
 चलयस कालु तमुनुय नन्यस टॉठ र्वपु तन
 बु डेशन स्वंदर-माल ह्यू कामु दिव ज़न

तिथुय युथ छु आसान ख्वनि ख्वनि ललुवमुत
 गरुक खानु मोल लालु-फोल माजि रोछमुत
 च्वंजव मंज़लि तुलमुत तु दायव फिरुवमुत

यि छुम गुल वनन मंज़ छु युस पानु फोलमुत
 ज़ंड्यव तय कंड्यव युस छु अँद्य पँख्य ति वोलमुत
 अमी किन्य बुथ्युक रंग अँमिस ज़न छु डोलमुत

यिवान आश अँम्यसुंद वुछान याम बु केशुन
 गिंदान बालि शुर्य येलि मशान छुस यि बेछुन
 व्वकान नरि तु ज़ंगु याम ह्यवान बालि डेशुन

अँमिस लाल दोरान छि प्येंदि सुतय सुती
 गछान गोल चरि पोप करान यि ति छु कुती
 फवलान ब्वकु वुछान येलि गिंदान शुर्य छि कुती

तिथुय ह्यस प्यवान छुस तु बेछुन ह्यवान बेयि
 वुछान चूरि छेपि मॉल्य संज्र मा नज़र पेयि
 अँमिस बय छु खूंत्यन तलय जुव सु मा हेयि

अमी किन्य यि बेचारु बेछान छु हरदम
 नतय पोज़ चु बोज़ख अम्युक छुस स्यठाह गम
 यि ज़न पानु मोठमुत मे पानस खबर छम

यि नम माज़ म्योनुय अँमिस निश लग्या छ्यन
 मे अँम्य संद्य स्यठाह र्यन तु अँम्य संद्य छि बंदन
 गलान कलि छु अँम्य संज़ि ज्यतु नारु कुन्दन

युहय लालु फोल खानु मोल म्योन ति वुछतोन
 तला बद तु रद हालु येमि निश यि रँछतोन

जिगर गोश पम्पोश लेम्बि ज़न छु फोटमुत
 अँमिस हायि तय छायि द्दु पान खोटमुत

मे वॉलिंजि छ्वख छिम तु सीनस स्यठाह दग
 अँमिस नव बहारस बु दिमु खूनकुय सग



४३

कनि मोज़ुरेन्य

कनि मोज़ुरेन्य हिश्य कांह मा वुछवोन
कांह मा वुछवोन, ज़ांह मा वुछवोन

कनि मोज़ुरेन्य य्वसु तनि वछु त्रॉविथ
फरि तलु आमुच ह्यडुरस सॉविथ
ह्यडुरस सॉविथ ऑफीम ख्यॉविथ
बाम्बरि आमुच रतु फेर्य चॉविथ
सीनुक ऑरख वति छँकुरावान
कनि मोज़ुरेन्य हिश्य कांह मा वुछवोन

कनि मोज़ुरेनि हुंद युस छुय लोनुय
सु ति ओस वक्ताह अकि नुंदबोनुय
अर्कस तु खूनस म्युल करुवोनुय
म्युल करुवोनुय ज़ी कुल प्रोनुय
सुय दर-बिस्तर दम गँज़ुरावान
कनि मोज़ुरेन्य हिश्य कांह मा वुछवोन

सु ति च्रोपमुत ओस येलि नादोरी
 अमि नादोरी तु बेयि लाचोरी
 करि क्याह पानस करि क्वसु योरी
 बजि गरदोरी तु बेयि खानुदोरी
 फलि फलि तँस्य कित्य पँल्य सोम्बुरावान
 कनि मोज़ुरेन्य हिश्य कांह मा वुछवोन

कनि मोज़ुरेनि छुय बनि डेर खारुन
 बनि डेर खारुन तु टोठ जुव गालुन
 सितुमन लँजमुच जुलमाह चालुन
 सम्सार ज़ोर येलि करि क्या नालुन
 ड्वकुर्यव सुत्यन कनि फुटुरावान
 कनि मोज़ुरेन्य हिश्य कांह मा वुछवोन

अखताबस ब्रोंह हॉज़िर सपदिथ
 ऑगुजन दालुव्य वेठ्य अदु खॉरिथ
 दिल छुस गरि तय वॉचुय लॉरिथ
 वॉचुय लॉरिथ तु वति पँद्य सॉरिथ
 च़लु लारि थँक्यमुत्य पँद्य वति त्रावान
 कनि मोज़ुरेन्य हिश्य कांह मा वुछवोन

कनि फॅल्य फुटरिन वॅरिनख रेज़य
 वॅरिनख रेज़य तु च़ोलुन तेज़य
 च्वचि फलिनय छय तोति आवेज़य
 सहि कुस ननि तनि प्यठ यिम नेज़य
 बॉर्य व्यपुरावान तु कॉर फुटुरावान
 कनि मोज़ुरेन्य हिश्य कांह मा वुछवोन

कनि मोज़ुरेनि गँड्य गुल्य ठेकुदरसुय
 तस ठेकुदरसुय तु नामावरसुय
 फुटुवॉटिस वनतम क्या करसुय
 अमि सुत्य लगी मा वाठ यथ गरसुय
 जुव जान च़ॅट्य च़ॅट्य फुटुवोट प्रावान
 कनि मोज़ुरेन्य हिश्य कांह मा वुछवोन

यि ति छय बेनि तय यि ति छय मोजी
 यि ति खानुदारेन्य यि ति खानुमोजी
 फाकन शूब्या कालु तु कॉजी
 कालु तु कॉजी सितुमव ज़ॉजी
 वक्तुक्य हॉकिम यस मॅशुरावान
 कनि मोज़ुरेन्य हिश्य कांह मा वुछवोन

वक्तुक माने च़ारी बेनिये
 मेहनतकशु संज़ ह्यमुती रँनिये
 कोताह रोज़ख छँनिये नँनिये
 नँनिये ननिनुय करतल प्यनिये
 कवु छख च़ालान जुव सौचुरावान
 कनि मोज़रेन्य हिश्य कांह मा वुछवोन

दब दिथ अँड्यजन ओँगुजन सूराह
 सेकि मंज़ तकदीरस द्युन च़ूराह
 जिगरस च़ँड छम पचलि कर नूराह
 पचलि कर नूराह नोव दस्तूराह
 बोश असि खारान ड्यकु पचलुरावान
 कनि मोज़रेन्य हिश्य कांह मा वुछवोन



४४

अथवास

तिमय चेश्म येति बालु यारन छि छारान
 तिमय पॅद्य वतन तस छि छारान तु गारान
 तिथय ज़ागि रूज़िथ छि लुख नव बहारन
 तिमय नगमु गामन तिमय हुर्य शहारन
 मे कुस छुम परुद, च़म तु नम छि मे साँरी

तिथय कॅन्य शुर्यन माजि ख्यावन तु चावन
 सियाह सर छि, सर-पोशनय सीर बावन
 बेन्यन बाँय समखन लगन तिम छि ग्रावन
 गॅछिथ यार यारस तसुंज़ चिठ्य छु हावन
 मे कुस छुम परुद, च़म तु नम छि मे साँरी

मोज़ूरस मछन मंज़ तिछुय त्राय डीठम
 तु लूकन तिछुय अमनुची माय डीठम
 च़लान प्रानि ओबुरच स्व पर-छाय डीठम
 कुनी ग्रज़ कुनी क्रख तु गगराय डीठम
 मे कुस छुम परुद, च़म तु नम छि मे साँरी

गुलालन तिमय दाग, चंद्रम ति छ्वकुलद
 तिथय कॅन्य छि येति रुत्य तिथी ही छि येति बद
 तिमय सॉन्य बुड्य बब तिमय सॉन्य बॅड्य जद
 तिथय कॅन्य छु पेचानु छारान थोदुय कद
 मे कुस छुम परुद, च़म तु नम छि मे सॉरी

तिमय युप्य खसान यिम यिवान सानि वारे
 तिथय कॅन्य गॅमुच़ अख बेयिस पथ छि तारे
 स्वंदर माल मसवल स्वंदर वाँकु पारे
 तु अक्लन तिथय कॅन्य छि बेकुल सवारे
 मे कुस छुम परुद, च़म तु नम छि मे सॉरी

जनूनन अंदर नव-जवानन वनुन क्या
 तु अज़ुमस अंदर बालु पानन वनुन क्या
 तु कोर्यन कचन क्युत ति तानन वनुन क्या
 तु पॅछ्य लॉज़्य मंज़ म्यज़ुबानन वनुन क्या
 मे कुस छुम परुद, च़म तु नम छि मे सॉरी

येतिक्य लुख ति कॅशिर्य हिवी सेद्य तु सादय
 तिथय कॅन्य अँकिस कम बेयिस हर ति ज़्यादय
 सवाराह अँकिथ कुन अँकिथ कुन छु प्यादय
 तिथय कॅन्य छि बाकुय यिमन कुत्य वादय
 मे कुस छुम परुद, च़म तु नम छि मे सॉरी

यिमन काम-गारन स्यठाह कामि वॅर्य वॅर्य
 तु चेश्मन अंदर छख स्यठाह आशि बॅर्य बॅर्य
 ह्यमत ज़ांह ति हॉरुख नु लॅस्य लॅस्य तु मॅर्य मॅर्य
 ज़मानस छि पॉरान स्वंदर वस गॅर्य गॅर्य
 मे कुस छुम परुद, च़म तु नम छि मे साँरी

अमी किन्य यिमन सुत्य छु अथुवास सोनुय
 कुनुय सोन रोव तय कुनुय रास सोनुय
 छु द्वह राथ सोनुय पहर मास सोनुय
 कुनी जॅन्य छि मा, लूकु अटुहास सोनुय
 मे कुस छुम परुद, च़म तु नम छि मे साँरी

यिमन कुन वुछिथ छुम हुरान नूर चेश्मन
 यिमन शूबि शाबश छि फवलुरान तन मन
 यिहुंज़ माय मोहबत छि नफरत ति गालन
 यिहुंघ आसुनन पॉदु वॅर्य कृत्य कुन्दन
 मे कुस छुम परुद, च़म तु नम छि मे साँरी



४५

शोक तु प्वनुसुन

थ्यकुर्वेन्य ब्रूठ्य आयि, शोक तु प्वनुसुन
पॅत्य आयि ब्रूठ्य आयि, शोक तु प्वनुसुन

वदवन थक छा, बाक्य अख मा
भानु बायि दर बायि, शोक तु प्वनुसुन

छायक बॅव्यनय, अँछ पूर थवनय
रनु प्यव बे-वायि, शोक तु प्वनुसुन

दॅप्यतव राजस, सय दियि वाजस
करि काहनाँव्य चायि, शोक तु प्वनुसुन

नाथु साँब केशन, ख्रेपि किन्य डेशन
बाँचन छायि छायि, शोक तु प्वनुसुन

न्वशि हन म्याँनी, स्वनु म्वगुलॉनी
छम पोशि तुल डायि, शोक तु प्वनुसुन

नोकॅर्य ति नाथस, वॅक्य हन ति जायस
न्वशि हन फ्रीच द्रायि, शोक तु प्वनुसुन

बुरज़य मेचि ह्यथ, कडुने आलथ
मासु आयि प्वफु आयि, शोक तु प्वनुसुन

पँडितन गोंड ना, बोड दसताराह
वुछतन कमि आयि, शोक तु प्वनुसुन

बजि माजि गोंडुनय, पूच तु तरंगय
द्यदु नुय मंज़ चायि, शोक तु प्वनुसुन

ख्वनि ख्वनि ललवन, कोछि कोछि फिरवन
कुजि सानि म्यवु द्रायि, शोक तु प्वनुसुन

स्वंदर करसय, वचुना परसय
रछिनस च्वंज़ु दायि, शोक तु प्वनुसुन

रुत रुत हाव्यम, रुम शेहलाव्यम
आस्यम बडि पायि, शोक तु प्वनुसुन

नेत्रन नूराह, नोव दस्तूराह
नोवरावि जायि जायि, शोक तु प्वनुसुन

ह्यथ दयि नावाह, गंडतस टेकिन्याह
मदुसुदन बायि, शोक तु प्वनुसुन

कमि लोलु वुछुनस, तु रतु छेपि लगुनस
माजि हुंजि अथ मायि, शोक तु प्वनुसुन

म्वमु गोल चावुनस, जुव वथुरावुनस
पूच थावुनस छायि, शोक तु प्वनुसुन

पॉरी लगुनस तु यॉरी मंगुनस
पोत छायि ब्रोंह ग्रायि, शोक तु प्वनुसुन

निकु सुंजि आयि ग्रायि, वदुनस त प्यांपुरायि
माजि हुंजि ममतायि, शोक तु प्वनुसुन

कुन्दन चॉनी, रुच क्या वॉनी
ग्योवथम प्वत्रु ज़ायि, शोक तु प्वनुसुन



४६

गोश थव म्यान्यन कथन

लोलु मस की प्यालु बॅर्य बॅर्य लालु चावुन बॉलिये
रोश मय अज़ गोश थव म्यान्यन कथन कुकॉलिये

डॉल्य ह्यथ यॅन्नकॉल्य आमुत छुय बरस तल नॉगराय
हाय च़लि अज़ वाय गलि अज़ बर मुन्नर ही मॉलिये

कॉसि हुंद ज़ांह केंह वुछिथ योद ती च़ु मे ऑसुख मंगान
यी वॅनिथ टालान ज़ि च़ठ कथ, यिम छि आसन वॉलिये

ग्रावु सारेय त्रावुनॉविथ, यी मंगख व्वन्य वाति ती
खॉल्य माला, बुंगरि श्वनिदार बेयि कनन कनु वॉलिये

वॉसि हुंघ हर कॉसि अरमान नेरनुक्य सामां सपुन्य
वादु सॉरी आदनुक्य व्वन्य पूरु गछ़नख कॉलिये

अॅस्य तुलव व्वन्य ग्यूर जुल्मस अज़मुकुय रस फ्यूर व्वन्य
अज़ च़टव हाँकल गॅरीबी हुंज़ गॅमुन्न योसु नॉलिये

हालुवन अथि वॉर ख्यावुन्य वन तु अॅस्य ज़ांह मा ज़ुरव
हालिवुय हालव दूहय पथ कुन ति मूलय गॉलिये

वारि साने गुल फवलन बुलबुल ग्यवन व्वन्य कुत्य कौल्य
जल तु कस्तूर रंगु रंगय लोलु मँत्य यिन सौलिये

सोसुन्यार च्रलि योस्मनसुय गुल तु बुलबुल फौँफलन
शबनमुक मस पोशि टूर्यन ह्यन फिरुन कलवौलिये

अशकुपेचान म्यानि अरमानुक ति खसि अलमन स्यठाह
जोति कुन्दन येम्य वुन्युक ताम नार तय गार च्रौलिये



४७

म्वख्तु

म्वख्तु छु शबनम वुर मा मालन
 स्वंदर मालव तोर पनस मा ?
 अटहोरा मा गोरनस काँसे ?
 कनु वाजन, कनु दूरन खोत मा ?
 येलि व्वपद्योव यिमनुय वँथरन प्यठ
 पोशन, टूर्यन बेयि पँत्रन प्यठ
 सुबहुक्य वावन छुन छँकुराँविथ
 मेच्चि मिलनाँविथ, लछि मंज त्राँविथ
 यँम्बुरजलि बोर पनप्रनिस फोटिसुय
 वाँह्य सिरियन मा दिचनस फुरसथ !
 पोशव जिगरुक वथरुन कोरहस
 वावन दिचनस ब्रुंजा महलथ
 पोशन हुंद यावुन नँनिरोवुन
 गिलुटूर्यन हुंज त्रेश मिटाँवुन
 ब्रुंजा, च्युहा छे अँम्यसंज ज़िंदगी
 म्वख्तु छु शबनम, म्वख्तु छु शबनम
 म्वख्तु छु पां फ्योर, साफ तु प्रोन प्रोन
 ख्यलु वँथरन प्यठ युस ज़न यीरान

नीजर तमिकुय येम्य प्रजुलुवुय
 युस पम्पोशन ऑनु छु हावान
 गाह छु कुनुय ज़ोन, गाहे पंगत
 यारन हुंज़ सब ख्यलप्रकिस सीनस
 नालु रटान मँज़्य बेयि बेयि फेरिन्य
 दून फेरिन्य येलि अख फ्योर सपनान
 ज़न तु छि दिल मेलान दिलदारन
 ज़न तु चलान छे दुय दून यारन
 मंज़ छु प्यवान वँस्य डल वॉनिस मंज़
 अख छु बनान कुल, रावान बिलकुल
 फिर्य फिर्य छुय ब्योन गँछ्य गँछ्य शॉमिल
 अटु हारस मंज़ यि ति अख याराह
 ब्रुंजा च्युहा छे अँम्यसंज़ ज़िंदगी
 म्वख्तु छु पां फ्योर, म्वख्तु छु पां फ्योर

 म्वख्तु छु अँश्य फ्योर, नून बोरुत सुय
 चेश्मव किन्त्य युस बुकु बुकु नेरान
 दारि वसान ओश, दारि अँछव किन्त्य
 ज़न तु छु हारस टख दिनु आमुत
 बुथ्य लबुवुय पेठ्य प्राचन तामथ
 दार लगान अँश्य दार वसान छ्य

हलमा ज़ांह मा दोरुस काँसे ?
 हलमस मंज़ मा सोम्बुर व्यसुवय
 जोर मा नालस दामानस ज़ांह
 ओस गमुक या शॉदी हुंद ओश
 अथ म्वख्तस गॅछ प्वख्तु नज़र कांह
 वुछिहय जिगरुक्य चाख यिमव ज़न
 वुछिहय दिलुकी आख यिमव ज़न
 अथ म्वख्तस अँश्य दारि ज़नम द्युत
 ब्रुंज़ा च्युहा छि अँम्य संज़ ज़िंदगी
 म्वख्तु छु अँश्य पयोर, म्वख्तु छु अँश्य पयोर
 म्वख्तु छु पारुद, छूट छूठ करवुन
 युस मिलनोवुख शेंकराचारुचि श्रूचि मेचे मंज़
 पूज़ करुन्य तस
 युस ज़न लोलुक तडपुन काँपुन
 युस ज़न वॉलिंजि हुंज़ दुब्रारय
 तुर येमिस ज़न लँजमुन्न पानस
 अलु अलु मदुनस बदनस च़ामुत
 युस ज़न वाँसन हुंज़ बेकरॉरी
 तुर्योमुत हुंदर्योमुत यावुन
 थालन बॅर्यतोन या तोह्य रँट्यतोन
 मंज़ अथुसय प्यठ

तँम्य संज छूट छूट कम मा सपनान
 तँम्य सुंद काँपुन रोंटु सपुद मा ?
 च्युहा ब्रुंजा छे अँम्यसंज जिंदगी
 म्वख्तु छु पारुद, म्वख्तु छु पारुद

म्वख्तु छु म्वख्तय , क्याह छुस म्वलवुन
 अँश्य फ्योर, पां फ्योर, पारुद शबनम
 यथ रुपस मंज, तथ मंज स्वंदर
 मँहलस मंज, छेयि पाहर्यन अंदर
 म्वख्तु छु मेलान, म्वख्तु मय्यसर
 तन तु मन तस साफ तु श्रूच्य
 बदनस योद तस नज़राह त्रावख
 डेशख ब्योन अख ब्याख जहानाह
 वारु वुछख योद गाटुल्य चेशमव
 फेरिसुय मंज डेशख तूफानाह
 चिह्यसुय मंज छु बंद जमानाह
 मलरि अँकिस मंज बोरमुत व्वलुराह
 अँक्यसुय सोंचस साँरी फलसफु
 जित्यनि अँकिस मंज नारु अलावाह
 च्युहा ब्रुंजा छे अँम्यसंज जिंदगी
 म्वख्तु छु म्वख्तय, क्याह छुस म्वलवुन ?



४८

शेछ नितम

बायि म्याने छाये छाये सायिदारस शेछ नितम ।
त्रायि कमि ताम ग्रायि मारान, आबशारस शेछ नितम ।।

पाद छलने परबतव प्यठु छूलु पानिक्य छिस वसान ।
तँथ्य शहारस लालु ज़ारस, स्वरगु दारस शेछ नितम ।।

तिहरि प्यठुकी फेर्य प्यवान येलि पोशि वँथरन प्यठ छि ब्वन ।
छ्यन लगान ज़न म्वख्तु हारस, प्वख्तु कारस शेछ नितम ।।

डल छु पम्पोशव बँरिथ तय ख्यल छि पारुद्य म्वख्तु ह्यथ ।
डॉल्य क्या क्या छन मे थँवमुन्न, साँतु जारस शेछ नितम ।।

वीरि वारन लोव ल्वकुचार आबुशारन ज़िंदगी ।
वाँसि हुंद तजरुबु छु बोन्न्यन, बेद जारस शेछ नितम ।।

वाव सुबहुक च़ाव बागस छारुने दिलदारसुय ।
व्वलसनस यिथ ख्वखशि द्रामुत, ल्वकुचारस शेछ नितम ।।

खूर तुल म्यान्यव रँफीकव, आबु मलखन काँफ च़ाव ।
मीठ्य दिनि यिथि बोठ ति पानय, नावि तारस शेछ नितम ॥

मागुकिस तथ दबदबस असि डून्य फुटरॉव्य तालि प्यठ ।
त्रापुजार व्वन्य रोज़ि मा, तापस तु हारस शेछ नितम ॥

यारु संज़न चेश्मनुय हुंद मे ति छु चेश्मन मंज़ खुमार ।
प्यालु बॅर्य बॅर्य चोवनस तॅम्य लोलु नारस शेछ नितम ॥

त्रेनुवन कुन्दन मे लॅज, पज़ि मा स्वखन लागुन कुनुन ।
ह्यस मे येम्य द्युत तॅम्यसुंदिस तथ गाटुजारस शेछ नितम ॥

★★★

४९

दिवान कथ छुख बेयन निश म्यॉन्य बारव

दिवान कथ छुख बेयन निश म्यॉन्य बारव ।
बु बदलौवुस मेहरबानव तु यारव ॥

छौतुय प्योम बॉथ येलि येलि वॉर्य वॉचुम ।
दितुम मा ज़ांह ति बॉथाह म्वंजटु हारव ॥

बे-ज़ान्यन क्या, तिमव विज़ि विज़ि बोरुम लोल ।
अमा पोज़ काँपुनोवुस ज़ॉन्य कारव ॥

गरा शेहजार ज़न छुम नारु मनकल ।
गरा ज़ोलुस बहारव आबुशारव ॥

र्वन्यन हुंद श्र्वन्य गछान, तंबुलान छुम मन ।
यि मा मँचुरोवुहस हारव तु द्यारव ॥

व्वलो बागस अच़व, पोशन करव गँद्य ।
व्वलो पेचानुनय अँस्य वॉकु पारव ॥

औतामथ अँस्य गटि मंज़ गाश छारान ।
वँलिव गाशस अंदर व्वन्य आश छारव ।।

यिमव सोवुस बु तिमवुय वुज़ुनोवुस ।
खबर कोरुहम यि क्या बाँतव तु शारव ।।

छु कुन कुन्दन तु अँद्य पँख्य फितनु वाराह ।
कमन गोश दिथ कमन अँस्य सीनु दारव ।।



५०

जवॉनी हिश रवॉनी आबुशारन

जवॉनी हिश रवॉनी आबुशारन
अँछन मँस्ती यिवॉनी दोसदारन

यँबरज़ल म्वख्तु फोट ह्यथ ब्रॉठु द्रायस
दितुस म्यूठा ड्यकस अँम्य नव बहारन

थज़र दीनख कुल्यन खँत्य अँशकु पेचान
थज़र तिमनय नज़र थँज़ छख छि लारन

थँकिथ प्योमुत बुजर प्रथ कथ खरन छस
कोडुस मा लोलु आलव ल्वकुचारन

कथन तहँज़न ति नेरी वाश योदवय
कथन म्यान्यन सनन बेयि मानि न्नारन

छ्वकव सुत्यन दरेमुन्न तन छि सॉनी
तमी बे-वायि ज़ख्मन सीनु दारन

सन्यर कोताह छु कुन्दन चानि वॉनी
ब्रिज़िस मंज़ छुख समंदर फिकरि तारन

★ ★ ★

५१

समयस ज़िठ्यव छु वोनमुत

समयस ज़िठ्यव छु वोनमुत चलवुन छु वाव वेसिये
वक्तुक ग्यवुन ग्यवुन छुय, नतु टाव टाव वेसिये

शायद छे छाय गटि हुंज़ व्वन्य काँपुवान खयालन
नतु टूरिनय प्रबातस ओश क्याज़ि आव वेसिये

व्वशलुन बुथिस ग्वलाबस, सोसन छि योसमन थँर
कुस बे-अदब फेशुल कठ मंज़ बाग चाव वेसिये

रस्मव तु बेयि र्यवाजव खोटमुत पज़र तु ईश्वर
येमि किन्य करान छु गॉफिल तस ग्रावु ग्राव वेसिये

काँत्याह मरान जि यँच छुख, काँत्याह मरान छि छेन्य नँन्य
हाँसिल अँकिस छि न्यामथ, बेय च़ोल ताव वेसिये

यथ रॉच मंज़ ति ताँजुब मा चोन ज़ून हिश युन
काँदस अंदर न्यसुब शब श्री कृष्ण ज़ाव वेसिये

पम्पोश चेश्मु कूंजल, ड्यकु शीशु ज़न प्रज़लवुन
असुवुन यि रोय डीशिथ च़लि आमताव वेसिये

व्वलु पख च़ु बोनि शिहलिस, लोलुच कथाह करव कांह
खसुवुन छु सोन यावुन लसुवुन छु चाव वेसिये

मँस्ती मे छम तुफानन, छुस दोलु नाव त्रावान
नतु छा सँहल कथाह केंह ह्योन चोन नाव वेसिये

कुन्दन छु लोलु मस चथ, शाबश तँमिस छु हथ हथ
लोलुक शराब येम्य चव, सुय माजि ज़ाव वेसिये



५२

वुछिथ गुलि लालु अंदकुन

वुछिथ गुलि लालु अंदकुन हुंदर्योमुत ।
 च्ने आसी नाव म्योनुय याद प्योमुत ।।
 कोरुय येम्य बेकलन यछि नाव ही थॅर ।
 ज़जुर चोनुय वुछिथ मा मंदछोमुत ।।
 च्चु फिर्य फिर्य अँछ वुछन छुख लालु मेय कुन ।
 वनय क्याह हाल अँदर्युम यी मे गोमुत ।।
 मे आँसुम ख्वय किताबन मीलि कलमस ।
 मे थोवनम नफसनय वँह्य ओम ज़ोमुत ।।
 पलव च्रॅट्य च्रॅट्य जवॉनी द्रायि तस नॅन्य ।
 गॅरीबस छा बिचॉरिस कांह पच्योमुत ।।
 छु युथ अंदकार पॉज़न नाव प्यव जल ।
 बहारस रॉछ सुय येम्य माछ ख्योमुत ।।
 मे कथ छुख हॉज बावन्य सोंथ हावन ।
 मे छुम सतुवन्य क्वलन हुंद आब चोमुत ।।
 छु कुन्दन युस वनान पज़रुच शेछा कांह ।
 वनान छिस मोत छु च़ोर पहानथ मत्योमुत



५३

कनन कनु वॉल्य स्वंदर

कनन कनु वॉल्य स्वंदर, पलव छिस नॉल्य स्वंदर
 हॅटिस खसु माल लॉगिथ, तमिक्य छिस खॉल्य स्वंदर
 मे वोनूमस मायि सानुय, छिहम ना बॉल्य स्वंदर
 रटन बो नॉल्य नालय, अनन अज़ सॉल्य स्वंदर
 बु छारन जायि जाये, वसस पातॉल्य स्वंदर
 करस म्यूठा बु लालस, दप्यम छख लॉल्य स्वंदर
 असुन मॉसुम वुठन प्यठ, तॅमिस क्या चॉल्य स्वंदर
 अगर ओकचॉर्य मानन, तेली हाकॉल्य स्वंदर
 यिमव लून खॉरु बोद फल, तिमय गॅयि हॉल्य स्वंदर
 अड्यव शुर्य रॅछ ह्यडर ही, अड्यव कॅट्य पॉल्य स्वंदर
 अगर शुर्य द्रायि गाटल्य, तेली छिय मॉल्य स्वंदर
 वतन अछुवॅल्य अनंतनॉग्य, मटुन तय त्रॉल्य स्वंदर
 असान आसान छु च्रॅद्र, खसान येलि बॉल्य स्वंदर
 यिवान येलि सोंत वार्यन, लगान तेलि ऑल्य स्वंदर
 गॅरिथ नक्शाह वुरूसी, छे पंजरन जॉल्य स्वंदर
 येतिक्य चनु वॉल्य स्वंदर, ततिक्य कलु वॉल्य स्वंदर
 ने-दोराह नाबुकाराह, वुछन ना कॉल्य स्वंदर

गुल्यन दिमुहख बु म्यूठा, यिमव अथु डॉल्य स्वंदर
न रोजस ज़ांह सवॉली, न नेरस खॉल्य स्वंदर
तिमय दुश्मन छि बागुक्य, यिमव गुल गॉल्य स्वंदर
परान कुन्दन छु बॉथाह, दिवान क्याह डॉल्य स्वंदर



५४

मस चनु रोस्तुय मस्ती छम मे

मस चनु रोस्तुय मस्ती छम मे, मेति गँजरिव मस्तानन मंज ।
दिल छुम मोत गोमुत देवानय, जाय दियिव देवानन मंज ॥

वतनुचि ख्वशहॉली हुंघ कॉत्याह, सोपनु सजॉविम रॉचन मंज ।
सुबहुकि यिनुकय अख अरमानाह, वुनि सान्यन अरमानन मंज ॥

बुतरॉच हंघ खँत्य जंडु असमानन, वुनि छुनु बानन सान्यन वय ।
चेशमव किन्य असि डोठ वसान गव, अख फ्योर छुनु पैमानन मंज ॥

बेयि वँथ्य दीनुक्य तु दर्मुक्य फितनय, बेयि गव ब्योन अँलिफस निशि बे ।
गोछ नु यि रावुन हॉसिल कोर युस, दशि थँव्य थँव्य असतानन मंज ॥

दजवुनि मोम बति राहबर गँछ्य ना, गथ करुहँन लुख तिमनुय पथ ।
यिम लेखुहोख जानानन मंज तय, हुम थवुहोख परवानन मंज ॥

साकी वोन्याह मय मैचि मजु ह्यू, पयमानन रुम, चांग्यन नु गाश ।
म्वलुवन्य तु फवलुवन्य जिंदगी मा रूज, बाक्य येति मैखानन मंज ॥

मेनुक्य तु तोलुक्य मीजान बदलेयि, बदलेयि पजरुक्य तु अपजिक्य रंग ।
रॉयिज मा रूज नँव अज फरकाह, नाकारन बेयि जानन मंज ॥

ऑकलन खँत्य बेकल अटबारे, त्रँक्य गँयि गाटल्य प्रोवुख बोश ।
हैवानन खोत कूत अलकाबय, लँग्य इनसान हयवानन मंज़ ॥

येम्य रोछ सुबहुक गाश तु मोसुम, पोशिक्य टूर्य तु ग्यवनुक सोज़ ।
सुय इनसानाह सुय जानानाह, दुरदानाह दुरदानन मंज़ ॥

व्वन्य ल्वकृचारन नोव ह्योत सोंचुन, यावुन गव बुथ्य फ्युर ह्यू अज़ ।
वक्तुच मंग बॉविव सुलतानन, शेछ कॅर्यतव ऐवानन मंज़ ॥

कुन्दन चान्यन शानन प्यठ छुय, मुल्कुक तु ज़गतुक बाराह गोब ।
क्रख दि तु ग्रज़ तुल त्युथ लाय नादाह, बोज़न युथ असमानन मंज़ ॥



५५

जेनि ऑखुर म्यॉन्य सारंग्य

जेनि ऑखुर म्यॉन्य सारंग्य साज तय सेतार म्योन ।
जान गछिहे अँज्यकि प्यठनुय बोज़हख योद तार म्योन ॥

कँड्य खसन यथ वारि तथ वन दांद वॉयिथ नेरि क्या ।
लोलु बागस ब्योल वव अदु फवलि दिलुक वुजारु म्योन ॥

बूज़मुत छुम ब्रोंठ ओस गुलि लालु व्वज़लुय हेरि ब्वन ।
वाय यनु प्यठ लोल बोर अँम्य तनु रोटुन अनहार म्योन ॥

छोव अँम्य कलु डुलु पलन सुत्य त्रोव मा अँम्य काँसि प्यठ ।
शोकु कमि ताम ब्रोंह पकन गव ज़िंदुगी हुंद आरु म्योन ॥

ख्वश कोरुय पकनोवुथस अज़ ख्वश कोरुय वति त्रोवुथस ।
आरु रोसत्यो अख लठाह ज़ांह वुछज़िहे व्यस्तार म्योन ॥

सारिवुय खोतु सोन कोरुथ युस छ्वख मे वॉलिंजि सुय रोछुम ।
आश थॉवम आर मा यी ज़ांह करख मा चारु म्योन ॥

चेशु वंदुयो लालु म्यान्यो गाश वथरावय वतन ।
यख्तियार छुय रछतु या अदु तछतु दिल दिलदारु म्योन ॥

ओस कुन्दन मायि वोलमुत छायि नीरिथ गव समय ।
वॉर्य ख्यॉविथ तॉर्य थॉविथ छुम दपन कर चारु म्योन ॥



५६

आव अज़ सोन

सोन आव सालस तु गरु सोन चावय
 स्वख तय सावय आव अज़ सोन
 र्वनि दामानस म्वख्तु तस छावय
 स्वख तय सावय आव अज़ सोन

वॉछि वॉल्लिंजि तस शेछ बो बावय
 कछि बो दिमुसो मोहबत प्रोन
 यछि बो करु सो लछि बज़ु ग्रावय
 स्वख तय सावय आव अज़ सोन

व्यसु येलि समुखन लोलु तु बावय
 नोन नेरि नवि सरु सुय व्यसुतोन
 मुचरनु यिन तिम बेयि दूद दावय
 स्वख तय सावय आव अज़ सोन

चॅकरीशोर पॅत्य चॅद्रमु ज़ावय
 सॅम्यतव अॅस्य ति अज़ ख्वनि ललवोन
 छेत्य म्वख्तुव्य तस फेत्य अॅलुरावय
 स्वख तय सावय आव अज़ सोन

अँद्य अँद्य लॅर तु जाय रचि रचि नावय
 चोंग दोद ज़ूरे मे ति आव म्योन
 दग ल्वति शेहलन मे ति आमु तावय
 स्वख तय सावय आव अज़ सोन

सुबहस पोशि मालु नॉल्य तस त्रावय
 शामस श्वंगवुन असुनावोन
 द्वहलि तस ऑलु नाबद बु आपुरावय
 स्वख तय सावय आव अज़ सोन

तस सुत्य सुत्यन कूत बो प्रावय
 फेकि कुय माज़ सुय मुशिक चंदोन
कुन्दन बु ति तस शार बोज़ुनावय
 स्वख तय सावय आव अज़ सोन



५७

बागन मंज़ मुचरि अँछ गुलि लालव

बागन मंज़ मुचरि अँछ गुलि लालव
 बालव पेठ्य हय सोंथ असि आव
 वछि वॉलिंजि असि द्युत तस आलव
 बालव पेठ्य हय सोंथ असि आव

वंदुनय जंदु लॉग्यमुत्य ऑस्य नॉली
 ऑली ननि सानि तनि कॅर्यमुत्य
 येमि किन्य अँछ आसु लॅजिमचु तालव
 बालव पेठ्य हय सोंथ असि आव

गिंदुनस तु ग्यवनस कति ओस वारुय
 कॉरुय अथु मंज़ु व्यसुरेमुत्य
 वॉन्य ओस वानन द्युतमुत फालव
 बालव पेठ्य हय सोंथ असि आव

अँदरी अज़ ताम गोमुत असि च़स
 वस ऑस च़हमुच़ नादॉरी
 ऑखुर रंग होव सीनु परगालव
 बालव पेठ्य हय सोंथ असि आव

सौतन बुलगार करनुक तुल दस
 तस अँस्य रोज़व नालो नॉल्य
 ल्वकुचारुक्य सॉर्य प्रन अँस्य पालव
 बालव पेठ्य हय सोंथ असि आव

वावुय शेछ ह्यथ आव असि कालय
 सालय सोंथ याम बर तल वोत
 गाह ह्योत त्रावुन संगरमालव
 बालव पेठ्य हय सोंथ असि आव

सॉनिस चमुनस रंगु रंगु खोत बोश
 ओश याम सोंथ तस आंगन च़ाव
 गुलवुय दोप किथु दृह ग्यन्य च़ालव
 बालव पेठ्य हय सोंथ असि आव

अथु डोल सौतन थॉविन शीरिथ
 नीरिथ आयि व्वन्य पनु बुबराय
 मस बॉगुरोव नरगिसु क्यव प्यालव
 बालव पेठ्य हय सोंथ असि आव

पोशि महारेनि बोश खोर स्वनु वस्तन
 फ़स्तन गौड शोकु फ़म्बु दसतार
 व्वशलुन खोत याम दाग होव लालव
 बालव पेठ्य हय सोंथ असि आव

गम ग्वसु व्वन्य लुख यस तस बावन
 नावन डल कुन लॅज मानु मान
 डूंगन बॅर्य बॅर्य नम तय गालव
 बालव पेठ्य हय सोंथ असि आव

पां चादर वॅछ श्वन्य श्वन्य वॅरिथुय
 हॅरिथुय द्वख तय छॅलिथुय छ्वख
 बुकु आयि बॅर्य बॅर्य छिकु तुजि नालव
 बालव पेठ्य हय सोंथ असि आव

बामन अॅछ आयि मुचरनु कुलिनुय
 गुलनुय मॅस्ती तु क्याह चिकु चाव
 यावुन तु सोंथ अॅस्य रथि हो खालव
 बालव पेठ्य हय सोंथ असि आव

विरिक्थोम फोल ट्येकु बटुन्यन छाये
 माये यॅबरज़लि होव रोय
 कन्दि दार चादर वॅज हीमालव
 बालव पेठ्य हय सोंथ असि आव

बादाम वारे छावुनि फुलुये
 सुलिये गॅयि लुख त्राँविथ कार
 वॉलिंजि गुल फवलु नोव शुर्य छालव
 बालव पेठ्य हय सोंथ असि आव

आकाश रूद प्यठु सरपोश सीरन
पीरन तु हरम्बखनुय वॅर रॉछ
लालव दोप अँस्य मशालि ज़ालव
बालव पेठ्य हय सोंथ असि आव

ज़मिनुय सॉन्य आयि सोंतस बागुनि
मागुनि दूर्यरु निशि म्वकुलेय
पोशि मुश्खा नियि शर्तल द्रालव
बालव पेठ्य हय सोंथ असि आव

कुन्दन रटि कुत्य सोंतुक्य नामय
गामय प्यठु पॉगामय आय
तंग ओन सु ति दूहदिशु क्यव सालव
बालव पेठ्य हय सोंथ असि आव



५८

रिक्शा वोल

रिक्शा वोलाह - काँसि हुंद गोबुराह, काँसि हुंद मोलाह
रिक्शा वोलाह - दिनि छुय लोगमुत सँदिज्यन ज़ोलाह

हलु कर, हसु कर, ह्यमुथाह समुथाह, खसुनस खसतो यॉरी मरदाह
मछु मा लोसय गछु गछु कॅर्य कॅर्य, मँदिन्यन शामन लॅस्य लॅस्य मॅर्य मॅर्य
नॉरन चान्यन लोगमुत चारो, सेतारन ज़न चार्यख तारो
नीजर छुयि किनु सोसुन पानस, दग मा चॉनिस टॉठिस जानस
चॉनी सदुमन कोरुनम होलाह, रिक्शा वोलाह

चे ति मा छय कांह मसवल प्रारान, चे ति मा माँजाह वति वति छारान
काका वॅन्य वॅन्य गोबुराह गारान, स्वनु कूराह मा ओश छय हारान
यितुमो काको, हा बबु लालो, हटिके म्वख्तु तु मुनि फलि लालो
बॅर्य बॅर्य थवयो अशुकी प्यालो, कोत कुन लोगमुत मारान छालो
मज़दूराह बेयि कॅमुल्याह होलाह, रिक्शा वोलाह

ज़ंगु मा दूदुरान सॉनिस लालस, गुलु क्या ज़ानी तस क्याह मालस
लिथुवुनि द्रामुत तसँदिस दालस, अथु छुय व्वथुरान कुरतनि नालस
लालय डेश्यस कोलस गाल्यस, त्योंगुलव सुत्यन तन ताम ज़ाल्यस
बरकरि लोग मा पॉसु ति ज़ेनान, वनतस गोय क्याह वतु छुख मेनान
मन खंड दीतोस चनु तय छोलाह, रिक्शा वोलाह

अड रातन येलि गढ गँयि बेदार, होटल टाकी सतु गँज्य शिलवार
 रिन्द येलि गिंघ गिंघ वँथ्य अति वापस, रिक्शा वोलाह छु लोगमुत शापस
 इनसानन क्यो हयवानन ह्यथ, सडुकन प्यठ छे अँम्य संज वतु गथ
 कारस अटि खँचमुच बेकॉरी, अक्लन रँट्यथुय होट ज़न चॉरी
 तल गछू यारो लबि रोज़ू दोलाह, रिक्शा वोलाह

दिग्यने लोगुन वँहरॉच रुदाह, त्रन त्रन ह्यथ गव यिति अज़ बूदाह
 मँज़िलस वॉतिथ कुरतँन्य चीरान, खयलु पेठ्य पानस पां फेर्य यीरान
 चादर बॉबिस रँटसुय थॉवन, मंज़ुलस मंज़ तस नँदुराह पॉवन
 पानस गँछ्यतन हेरि ब्वनु श्रानाह, ज़ोनून बानाह यिति गव जानाह
 असि रोस कँम्य सनु जुल्माह चोलाह, रिक्शा वोलाह

डबुलाह शामन दिन्य छस आगस, हारुनि ग्रेकि तय तुरुनिस मागस
 चुनि रुख कँरिथुय मोतस खेलान, वस ताम दँजमुच छुम यी तेलान
 इनसॉनियँच येलि यिथ्य दाग आसन, आजॉदी हुंघ स्वछ कस बासन
 ज़ोंग लँग्यतन व्वन्य यिथ्यनुय कारन, तिलु सडुकन येति तलपँद्य लारन
 यँड छस चोट तय नॉल्य छुस जोलाह, रिक्शा वोलाह

मछु अँम्य संजु येलि वछु वछु करुनय, नॉरन कॉली वज़ि येलि स्वरुनय
 अँछ त्रकुरॉविथ वुछि कलुवालस, स्योद नय मान्यस थफ दिधि प्यालस
 इनसॉनियँच हुंद खसि पेचानाह, नोन नेरि पज़ुराह रुत तय जानाह
 फ्रख त्रॉविथ अदु बु ति त्रावु शाहाह, यि ति मा कम कँह यि ति ननि शाहाह
 बाज़स मंज़ येलि यिति दिधि खोलाह, रिक्शा वोलाह



५९

मुलाकात

टेलिफोनस प्यठ आलव द्युतुनम
 आलव द्युतुनम लोलुक लालन
 येछि तय पछि सान द्युतुमस कन मे
 टूफॅल्य वॅथ्य गॉम सीनस नालन

टार्यन प्यठ मे सारुन्य हेतिनम
 वेठ्य वेठ्य अॅश फेर्य पारुद्य फेर्य ज़न
 दूर्यरुसुय ओस पूर्यर गोमुत
 मीलु बद्यन ओस शून्य मच्योमुत

फेकि पेठ्य माज़ खोतुम आवाज़ गॅयम यामथ
 साज़ वज़न ज़न
 नयि कुनि मंज़ अंदगाम कुनथ कांह
 कोहु दामुन्य ज़न पोहुला अख म्वरली वायान
 दिल वुज़ुनावान
 यारस पनुनिस नादाह लायान

शोकन म्याँनी थनु प्यवुनुय, खखजि लमुन ह्योत
 काश कि पखु यिहन म्यान्यन फेकिनुय म्यान्यन शानन
 वुफ निथ गछु हा, शोख परिंदा
 यारस पनुनिस मँत्य करुहा बो
 अकि फेकि बेयि फेकि गरदन लॉगिथ

वाँलिंजि हुंज़ दुबुराय हुरेयम
 टुख निथ गछुहा शोख परिन्दा
 यारस पनुनिस
 बुथि बुथि वुछुहा

व्वशलुन मा गव कम गुलि लालस
 अज़मुच रेह मा कम गँयि बालस
 वुनि छा तिम अरमान बुथिस प्यठ खेलु करन तस
 वुनि छा तस ज़ोतान इरादन हुंद व्वज़ुजाराह

वुनि छा दिल दुबुराय करन तस
 ब्रॉह पकनुच स्वय शेछ बावॉनी
 तिछ मँस्ती तय तिछ शॉदी मा भरतस आसिहे
 यैलि ज़न रामु चँदुर वनु वासव पतु तस समख्यव

तिष्ठ मँस्ती तय तिष्ठ शॉदी ह्यथ तस येलि समखय
सौँतस गछि अदु रंग वुछुन
क्यथु प्रजुलान आसी
अरुमानन यियि अंग नोवुय नोव
बेयि प्वखुतन तिम सौँन्य इरादय

त्युथ समखुन मा नज़रि गोमुत ज़ांह
चँद्रमसुय या तारक नबुसुय ?



६०

नोव वॅरी

नवि वॅरियुक प्यव अज़ परतव तय, अज़ परतव तय
तलय देदय चु ति व्वथ दानस प्यव तय, दानस प्यव तय

बे-फुक रोन येम्य म्वख मा गँज़रिन, तस क्याह गँज़रुन
वॅम्य ख्योव कोताह वॅम्य क्या ख्योव तय, दानस प्यव तय

ज़गतुक्य लुख गॅयि ब्रोंह वुछ कॅत्याह, वुछतख कॅत्याह
खाह मिलुवन छय चु ति तुल दव तय, दानस प्यव तय

हरदस तु मागस क्युत छुय थावुन, प्रथ कांह ख्यावुन
सौंतस मंज़ रुत रुत चु ति वव तय, दानस प्यव तय

तलय वन रामुन्य तु कृष्णुन्य गाथाह, कथाह तु बाथाह
राक्षसन हुंज़ प्रॉन्य कथ बाथ थव तय, दानस प्यव तय

तलय तुल क्वछि तय, तलय कर हो हो, वाह वाह लो लो
अडु कलिनुय युथ ब्येयि यी ज़यव तय, दानस प्यव तय

हुतिक्यन तु येतिक्यन दूर्यर च़लि ना, क्रेर्यर च़लि ना
स्वय क्वछ सॉनी, सुय म्वमु चव तय, दानस प्यव तय

गटुकारस अज़ फ़टुतम गछि ना, दूर गम गछि ना
रसु रसु अमनुक खोत नौव रव तय, दानस प्यव तय

सुबहस वॅथ्यथुय देदि कॅर ऑही, रुच रुच ऑही
कुलु क्यन गुलनुय ह्यथ फवल नव तय, दानस प्यव तय

द्यवु स्वय ऑही असि गटु कासे, ज़गुतस कासे
तलय वेस्य संगुरन चु ति थव कव तय, बुति थवु कव तय

सोंतुक वाह वाह बादाम फुलयाह, रंगु रंगु फुलयाह
कुन्दन सॉबो बॉथाह ग्यव तय, वंदु मंदुछव तय



६१ मुसाँफिर

म्यॉन्य हालथ तस मोजूर संज हिश
 युस पडावस वॉतिथ नखु तल
 शोकु पनुने बार गोब अटि ह्यथ
 टुख निवान तय पोद तुलान जल जल

हॉर्य म्यॉन्यी चेरु नॅम्य चेश्मन
 मीठ्य दिनि छुस दोरान छम कल
 चेर गॅछि मे योद म्यॉन्य हॉरी
 दारि बरुनुय थॅव्यजि नय हाँकल
 अज पगाह या कॉल्यक्यथ तामथ
 वातुवुन छुस प्रॉर्यज्यम बर तल
 चानि दिलुची दुब दुबरारय
 म्यानि कर्मुक छॅकरिथ अन्न जल

योद चेर प्रारुन कूठ ह्यू बासी
 चॉर्य चॉरी थॅव्यजि ब्यल मादल
 क्याह छु ताँजुब सफुरस मंज ज़ांह
 द्रींठ्य मा यियी शंकर सुंद पल
 पूजि लागव तमिक्यन अछुरन
 पम्पोश तय लोलुक्य ही ब्यल

अदु प्रारुन क्रूठ मा बासी
अदु लोलस वनि कुस हांचल
येलि मँज़िलुक शेहजार हॉसिल
तेलि सफरुक्य कँड्य ताम कोमल



६२

खबर छय मा ?

खबर छय मा चु कॉचाह टॉठ छख मे
 मे ज़न वौनुमय नु वनुनुक छा ज़रूरथ
 यि ज़न वक्तस यि गव नतु चॉन्य द्रुय छम
 चे नय अतलास तय ज़रबाफ जरु हय
 मे ज़न वौनुमय नु वनुनुक छा ज़रूरथ

वसन येलि वारि मंज़ छख जामु लॉगिथ
 ऑकिस कूंजस अंदर ही थॅर छि व्वशुलन
 वुछिथ यिम चानि वेछि वेछि चेश्मु जोराह
 सरुक पम्पोश ब्वन कुन कॉर नोमुरन
 खबर छम चानि पकनुच त्राय डींशिथ
 पकुन ह्योछ मस्त हॅस्यतिनि राज़ु होंज़न
 तिथय कॅन्य चानि स्यज़रुक शोचरुक रंग
 छचर लोब म्यानि वतनुक्य छेत्य ग्वलाबन
 यि ज़न वक्तस यि गव नतु चॉन्य द्रुय छम
 चे नय अम्बार स्वनु संद्य वस गरुहय
 मे ज़न वौनुमय नु वनुनुक छा ज़रूरथ।

नन्यव मे चॉन्य ह्यमथ डीश येम्य येम्य
 तिमव टेंगव ति बालन हुंद थज़र लोब
 नन्यव मे चॉन्य दूख तय दॉद्य डीशिथ
 सुबहुक शबनम ति पोशन बार तय गोब
 सरस सनिराह तु आरस बे-करॉरी
 मच़र गिर्दाबसुय चोन हाल डीशिथ
 मगर वख वोत फचलि चोन ड्यकु ति वॅल्य वॅल्य
 मे वोनुमय समयिकुय अज़ फाल डीशिथ
 यि ज़न वक्तस यि गव नतु चॉन्य द्रुय छम
 बु नय कम गीत ग्यवुहय बॉथ परुहय
 मे ज़न वोनुमय नु वनुनुक छा ज़रूरथ ।

मे प्यव परतव तु हेत्य मे बॉथ लेखुन्य
 मे बोर शब्दन अंदर चोन लोल च़ेनुन
 थज़र बोज़ तय दिलस सनिराह च़े द्युतुथम
 मे ह्योत येमि कायनातुक वॉत मेनुन
 छु मुमकिन वक्त सपनी अज़ पगाह रुत
 बजर डीशिथ यि चॉनी शानदॉरी
 तमी किन्य छुम मे बासान सहल आसान
 पज़र डीशिथ पज़र लबि पायदॉरी

यि ज़न वक्तस यि गव नतु चॉन्य द्रुय छम
बु कुन्दन चानि बापथ क्याह नु करुहय
मे ज़न वोनुमय नु वनुनुक छा ज़रूरथ।।



६३

स्यज़र कोताह च़े छुय ?

चमन ज़ाराह तु फम्बाराह तु आराह
 शिहिज बून्याह तु वनुकुय देवदाराह
 मलख डलकी, निशातुक आबुशाराह
 संगर फॉल्यमुत्य तु शामुक तेज़ नाराह

स्यज़र कोताह च़े छुय डीशिथ यि सोरुय
 पृछन छुख दोस कुस छुय यार कुस छुय

च़र्यन हुंद बोल बोशाह वारि म्याने
 हिकट करवुनि थर्यन तल कोरि दाने
 छकर चाने वुचन वनुवान साने
 करान रोफ जायि जाये बोज़ लाने

स्यज़र कोताह च़े छुय बूज़िथ यि सोरुय
 पृछन छुख बाँथ कम छी गीत कुस छुय

शुर्यन हुंज़ छाल तय फुटबालि खेलुन
 अड्यन हुंद अख अँकिस ह्यडुना तु गेलुन
 अड्यन हुंद पानुवँन्य समखुन तु मेलुन
 अँती तोशुन अँती रोशुन तु तेलुन

स्यज़र कोताह च़े छुय ज़ॉनिथ यि सोरुय
पृछन छुख टोठ कुस छुय प्योर कुस छुय

डबन प्यठ नक्श गीरन नक्शु गोरमुत
हचन प्यठ त्वरकु छानन पोश कोरमुत
यि शालस सुच़नि सुत्यन सोंत जोरमुत
रंगा रंग पोट छॉविथ लोल बोरमुत

स्यज़र कोताह च़े छुय ऑसिथ यि सोरुय
पृछन छुख शूब क्या छय नूर कुस छुय

वचुन छुम अँर्यनि हुंद ज़न पोश फवलवुन
तु छोट छोट वाख ललि हुंद क्या छु म्वलवुन
यि लोलुक बॉथ महजूरुन प्रज़लवुन
तु कुन्दन गीत चोनुय विगनि वनुवुन

स्यज़र कोताह च़े छुय मॉज़िथ यि सोरुय
पृछन छुख शान क्वसु छय मान कुस छुय
स्यज़र कोताह च़े छुय अनज़ानु लालय
यि सोरुय गाचि तय अनहारु म्याने
अमी छम चेश्मनुय मंज़ यीच़ मँस्ती
अमी छुस ज़िंदु रूज़िथ यारु म्याने



६४

बु शॉयिर

बु शॉयिर, कॅवी, जान हुस्नुक व्पासक
 ग्यवान गीत हुस्नुक्य वनान राज अँशुकुन्य
 व्वशान योद वुछान ओश अँछन प्यठ बहारस
 जुवान आश डीशिथ तु प्रागाश डीशिथ
 करान ज़ूनि हँज़ गथ यथ कायनातस
 वुछान दाग लालस ह्यवान सीनु चेटुन
 यँबरज़ल असान योद, खसान माज़ शानन
 करान पूज़ प्रॉनिस तु तखलीक नविरुच

बु शॉयिर, कॅवी, जान हुस्नुक व्पासक
 तुजिम मील कागज़ कलम ह्यथ अथस मंज़
 दप्योम बॉथ लेखन रँस्युल म्यूठ कांछाह

मोदुर मांछ ह्योतमुत मँगिथ ताज़ु पोशन
 तु पेडान प्रगाशाह, प्रबातुक नवीदाह
 नव्यर ज़न तु सौंतुक, नतय ल्वकुचारुक
 रवॉनी यिथ्यन आसि पां च़ादुरन हुंज़
 येमिक्य शब्द आसन स्वंदर दॉन फॅल्य हिव्य
 तु माने म्वलुल म्वख्तु ज़न हाँगिन्यन मंज़
 दप्योम बॉथ लेखन रँस्युल म्यूठ कांछाह

सुबहुक वाव डलवुन तु शबनम ति ज़लवुन
 यछोम नालु रटहन बु गेव्य गेव्य तु नॅच्य नॅच्य
 दप्योम सोंथ अनुहन बु सालस यपॉरी
 गुलव सान बुलबुल ह्यथन बाशि करुवुन
 तु शब्दन अंदर लोलु अनुहन बु मॉसुम
 तिहुंज माय मोहबथ, असुनाह तु गिंदुनाह
 दप्योम पेश करुहन बु नज़ुमन अंदर अज़

दप्योम साज़ु संतूरची तारु चॉरिथ
 ग्यवन बॉतुकी ताज़ु सामानु करुहा
 शकार्येच़ तु ग्रावन ज़्यवाह पूर अनुहा
 व्वमेज़न तु आशन हुंदिस ऑनु पॅटिसुय
 गर्द साफ़ कॅरिथुय शक्ल वारु वुछुहा
 तु बॉथाह बु ल्यखुहा जवान जोशि बोरतुय
 च़ववापोर अज़मुक्य दज़न च़ांग्य सॉरी
 तु सॉरी दपन अॅथ्य दपन दीपु माला
 ग्यवन गीतुकुय ताज़ु सामानु करुहा

छु क्या गम छु योदुवय स्यटाह पेश मुश्किल
 कॅमी योद छि आशक परन वालिनुय हुंज़
 स्वराह ज़ांह बु लेखुन गज़ल वोरु ज़ेवि मंज़
 मे नय पनुनि ज़ेवि हॅदय ति शोकीन मेलन

शहन हुंज मे खसवस योतथ ताम पोशम
 ग्यवान गछु पनुन बाँथ पानय च्वपॉरी
 सुबहुक शेंख ह्यु ग्रज बु तुलु प्रथ गरस मंज
 कनन मा थवन थॅप्य, पेयख बोज़नुय अज़
 वॅमी योद छि आशक परन वालिनय हुंज

बु ओसुस यि सोंचन तिथुय आयि ब्रोंह कुन
 मे दोपुनम थवी आय, अख करतु कॉमाह
 कलम छुय अथस मंज तु कागज़ ति ब्रोंह कनि
 चु निख ना बनाँविथ बजट खरचिकुय अज़
 वुछव क्या म्वच्यस क्या फल्यस क्या छ्वन्यस अज़
 हरन मा ज़ु या त्र बन्यस मा गुंजाँयिश
 दप्योम पानुसुय किच अनख अख वॅमीज़ाह
 रुनेमचु छि सार्यय फेक्यन प्यठ हॅचिस निश
 चु निख ना बनाँविथ बजट खरचिकुय अज़

शॅरीरस कोडुम वाश, ब्यूतुस हना स्योद
 र्यतुक ह्योत बजट कागुज़स प्यठ मे सावुन
 तलब शांद थोवुमस वुरुन खरचिकुय ह्यथ
 हिसाबाह लगोवुम मे होंजुक तु रादुक
 ह्यवान लमु कलस कुन तु रोज़ान नॅनी ख्वर
 दिवान द्रसु ख्वरन कुन तु रोज़ान नॅनी व्वड

पनुन्य किन्त्य थवेमस मे चौरिथ तनाबय
मचर वोथ द्यमागस हुरान गव अजाबय

र्यतुक ह्योत बजट कागुजस प्यठ मे सावुन
अमी किन्त्य दूहय खद दिलस तय द्यमागस
यिमन कागुजन प्यठ नज्म शूबहन रुत्य
तिमन प्यठ छि तलबुच तु खरचुच जफा जेफ्य

अमा पोज बु शौरि, परस्तार हुस्नुक
दप्योम बॉथ ल्यखुहा रँस्युल म्यूठ कांछा
दप्योम पेश करुहन बु नज्मन अंदर अज
ग्यवन गीतुकुय ताजु सामानु करुहा

मगर ह्योत बजट कागुजस प्यठ मे सावुन
अमी किन्त्य दूहय खद दिलस तय द्यमागस ।।



६५

बजर इनसानु सुंद

सखर लेंज जिंदगी ह्योत पान हावुन
हवस सपनुस जहानुक बोश वुछि हा

सुसर सेयि लेंज जलस जलजल तुथुय आव
हवावस तुर खँच जँमनस दुनन गँय
गवडन्य पॉनिस अंदर तव पतु बँठिस प्यठ
गँछिथ समयाह वुडव लोग आस्मॉनी

यिथय कँन्य जिंदगी हुंद क्रम चलान गव
कमव शकलव कमव मुरचव ज़नम ह्योत
कमव मँजिलव पडावव कुस सफर कोर
व्वटल छांटल चु-पंजल आयि ज़नुमस
पँतिस लाकन ज़नम ह्योत अदु मनोशन

अमा पोज़ अस मनोशस नव जवानस
खसुन सनिरन वसुन व्वगुन्यारुनुय प्यव
अँमिस पेयि क्वदुरतस सुत्यन करुन्य लड
अँमिस पेयि क्वदुरतस हावुन्य पनुन्य मछ

अँगुन ज़्योवुरुन तु छेवरुन नार चोपुन
 कोरुन शेस्तुर ति कोबू कॉम हेचुनस
 बनाव्यन मकुच तीरो डाल खंजर
 सुहन सुत्यन वेंरुन लडु पान वुठनक
 खँसिथ गरदनि यिमन त्रोवुन गुगूसा
 खँसिथ थँर प्यठ यिमन आव सॉर कॅर्य कॅर्य
 खाहन वॉलिन तु केंचन ज़ीन कोरुनख
 अड्यन दूद ह्यथ अड्यन प्यठ बोर सोरुन
 ज़मीनस दांद वॉयिन ब्योल वोवुनस
 कमन बंजुरन बनोवुन बागि जनथ
 सथुर खोरुन वेंरुन तथ जोरु कपटन
 वेंवुन अन्न म्वठ कोरुन पानस व्वदुर पुर
 कुल्यन हुंघ म्यवु चॉपिन साद वुछनख
 क्वलन हुंद आब चथ शेहजार छोवुन

यिथय कॅन्य वक्तु वक्तय बख्त बदलुन
 हुरान गोस नज़रि हुंद बोड आरु क्वंडुल
 हगुर गोर तँम्य तु लोग गॅर्यन्यन नोवुय ग्वड
 थखुय मा लोग वुन्युक तामथ चिहिस ज़ांह
 गरुन्य कॉचाह सपुज़ कम चीज़ व्वपदेयि

गरी बीह बीह जहानुक सॉर सपनान
 नबस खँस्यतव तु तारक यार कॅर्यतोख
 वॅसिथ सोदुरन चक्युक ताम हाल वुछतव
 गरज़ सरपोश गॅयि सीरन व्वथान थोद
 नव्यर सोंतस बजर लोग ज़िंदुगॉनी
 ल्वकट्य बँड्य गॅयि, बड्यव लॅब जाविदॉनी

बजर ओस मनशु सुंदुय पूज़ि लायक
 अमा पोज़ चानि द्रुह छम काँपुनावान

बु छुस ज़ानान पेयी होकुन नज़र व्वन्य
 येत्यन मोतुक्य छि नॅव्य सामानु सपनान
 दपान आसख, मच़र कुस आव मनुशस
 यि कथ नॉरस ह्योतुन तस जुव अचुन व्वन्य

यपॉर्य हय ज़िंदुगी नॅव्य साज़ लागान
 हुपॉर्य कवु मोतुसुय आवाज़ लायान
 यपॉर्य किन्य सोंतु वावस शानु कॅर्यनय
 हुपॉर्य कवु ज़हरुका यिम प्यालु बॅर्यनय

लदावुक यूत ज़न वेख़ार होवुन
तिथुय ह्यू लूहरनुक रफ़तार त्रोवुन
कॅरिन अँड्य कार सेद्य तय अँड्य कॅरिन हँल्य
यि नय करिहे बु चमुहस खोर छँल्य छँल्य



६६

जवॉहिर लाल

गुल छि आसान कुत्य तय गुलज़ार आसान खाल कांह
दिल छु आसान सारिनय दिलदार आसान खाल कांह

कुत्य रहबर डींठ्य अज़ ताम बेयि ति डेशोख ब्रोंठ कुन
लूकु मँत्यसुय सुत्य म्युल यकबार आसान खाल कांह

सथ समंदर छँड्य तु येम्य सतुवन्य क्वलन हुंद आब चव
तोति रूद युस ताज़ु सुय ल्वकुचार आसान खाल कांह

कथ यसंज़ प्रथ कांह मसल तय वथ यसंज़ प्रथ काँसि रँट
त्युथ यज़थ बेयि त्यूत बोड दसतार आसान खाल खांह

येम्य ग्वलॉमी दूर कॅर इनसानियतुकुय हक बुलंद
सुय पज़र वरतावुन अवतार आसान खाल कांह

छल कपट या ज़ाल ताल मा ज़ानिहे पज़रुक पुज़ॉर्य
प्रथ अँकिस येम्य वातुनोव शेहजार, आसान खाल कांह

वतनुकुय हुब ओस तस ज़गतुक ति ओसुस श्रेह स्यठाह
नालु दिवुनोव दुस्त यँम्य संसार आसान खाल कांह

लय तँमिस ऑस मॉसुमन सुत्यन ग्वलाबुक्य दूर्य टॉठ्य
लूबुवन वय शूबुवन गुप्तार आसान खाल कांह

येम्य वतन गँजरोव जुव तय पान गँजरोवन वतन
सारिनय हुंद ओस यस अमार आसान खाल कांह

इतिहासुच साईन्सुच प्रथ अँलिमुची तस ज्ञान ऑस
लेखनस मंज भानु भटुनुय यार आसान खाल कांह

मोतुकुय मा रछ गुमान पँत्यमिस चिहिस ताम ओस तस
जिंदगी हुंद युथ अलमबरदार आसान खाल कांह

लछ वँरी तेय पोशिहे सुय तोति ऑसुस वाँस कम
गाठ खसु ज़न वाति ऑखुर खार आसान खाल कांह

सतु रेश्यन हुंद सथ सिफत यकजा सँमिथ अँक्यसुय अंदर
त्युथ जवॉहिर लाल हू किरदार आसान खाल कांह

गँयि पशेमान तिम ति कुन्दन ऑस्य यिम तस कुठ कडान
सीरुनुय सरपोश त्युथ सरदार आसान खाल कांह



६७

ल्वकुचार

क्या सना यी ना सना ल्वकुचार पोत ?
नव बहारुक यार मॉसुम मायि मोत

वतनि गुर यथ प्यठ गॅयम पकुनुच मे ज्ञान
लोरि कुटनस गुर बनावुन शानु सान
टिकु वावुज ह्यथ करुन्य दवि मानु मान
वुठु फल्यन प्यठ ओस असुनाह ज्ञन फवलान
जूनु गाशाह जुचु ख्वना या पोशि फोत
क्या सना यी ना सना ल्वकुचार पोत ?

शीनु बगुवानाह बनोव मंज आंगुनस
क्या वनस रेय कॅर्यतनस फटु वांगुनस
वुछ तु हुंदुरेस कन तु तुरेयस यि नस
लारि तस ज्ञन छुय यिवान पतु चोप ह्यनस
कांगुर्यव वुशनोवमुत सुय लेफि गोत
क्या सना यी ना सना ल्वकुचार पोत ?

ज़ोजि वोलमुत ग्रिशु कोरमुत पूचि वाव
 पछि तु यछि कोरमुत येमिस निकु लाल नाव
 शानु व्वगुनेस पानु यनु ज़न कृष्ण ज़ाव
 आपुरावान बतु करान छस कावु काव
 माजि ह्योतमुत क्वछि अंदर सुय नैदरि होत
 क्या सना यी ना सना ल्वकुचार पोत ?

शीनु रज़नुय दूज तय जुज़दानु ह्यथ
 ब्बछि हँतिस क्रपु हाख तय बतु गूज्य ख्यथ
 वारि मुठ्य खोसा नतय शीर्य चाय चथ
 ल्वकुचारस मंज़ कसंज़ ऑसुम मे सथ
 म्यानि देदि हुंद शालु फाह बेयि नालु मोत
 क्या सना यी ना सना ल्वकुचार पोत ?

ल्वकुचाराह ज़ाव संगुरन गाश ज़न
 च़रि बचन द्राव फम्बु फेकिनुय वाश ज़न
 ज़्यवुनुय चँद्राह योहय अख काश ज़न
 फ्यूरमुत ग्रुहदाह यिहय रुच़ राश ज़न
 पूर्य किन्त्य ज़न नूरि नूरान सिरिं खोत
 क्या सना यी ना सना ल्वकुचार पोत ?

ल्वकुचारस पॉर्य लगुहॉ नावुसुय
 लोल बॅर्यतिस म्वलुलिस शुर्य बावुसुय
 बे गमस, बे फिक्रुसुय, तस वावुसुय
 ऑविलिस तय जॉविलिस चिकु चावसुय
 ऑंगजि पुचनिथ गॅर्यबिन्यव ज़न यँदुर कोत
 क्या सना यी ना सना ल्वकुचार पोत ?

ख्वखशि करवुन गूकलुक नंद लाल सुय
 सतु रेश्यन निश द्राव परबतु फाल सुय
 आश दिलुची बेयि अँछन हुंद लाल सुय
 वाय रटुहन लोलु नॉली नाल सुय
 लोलु मचि माजे छु बासान ह्योत तु द्योत
 क्या सना यी ना सना ल्वकुचार पोत ?

क्या सना यी ना सना, यी मा मगर
 तोति हय पोशिहे मे सुय श्रोचर स्यज़र
 ल्वकुचारुक्य पॉठ्य आसुन बे खबर
 बालु पानुच मीठ स्वय माँसुम नज़र
 लालु फोल कुन्दन डलुक पम्पोश छोट
 क्या सना यी ना सना ल्वकुचार पोत ?



६८

पोज़, रुत तु स्वंदर

(पोज़)

फोतु फोल हू ब्याँल्य फोल
 जूर्य यथ मंज़ दालि फॅल्य
 वछ वछस सुत्यन रॅलिथ
 जिंदुगी हुंद वेर नाग
 कानुजा ऑविज पिशिज
 उल्फतुक आलम मोदुर
 द्यल वॅलिथ सीरन वुरुन
 जामुसुय छुस सूफ्य रंग
 शोख लोलस रोय छोट
 मोहबतुक आलम खॅटिथ

अख अजूबा छुय मत्यो
 ब्यालि फलिकुय कारुबार
 अथ अंदर सम्सार बंद
 अथ अंदर छुय तेज़ नार
 चूरि अथ मंज़ सब्ज़ु ज़ार
 अँथ्य अंदर कुल सायिदार

रेश्य वनान अथ अख तु कुल
 ब्यॉल्य फॅलिसुय मंज़ छु कुल
 अज़ वुछख गॅयि अँछ सफल
 कॉल्य योद डेशख तु क्या
 लोलु म्याने अँछ मुच़र
 यी छु हक तय यी पज़र

(रुत)

कॉल्य नेरन म्येवु फल
 फल मोदुर्य रसदार मीठ्य
 फल रँसिल्य मज़ुदार मीठ्य
 रस येम्युक च़रनामृत
 त्रेशि हतिनुय खॉस्य मस
 ब्विछि हत्यन किच़ न्यामुथाह

कुल्य खसन कम सायिदार
 वँथरुनस कम सब्ज़ुज़ार
 थँक्यमुत्यन शेहजार दिन
 गुमु हत्यन वावाह करन
 थाँथुरेमुत्य थख कडन
 लूस्यमुत्य प्रावन जिलव

दूरि सफरुक फ्रख च़ल्यख
 मँज़िलन हुंद पय लबन
 श्रोकुन्यारुक जंग च़ल्यख
 ल्वकुचारुक रंग लग्यख
 बोनि शेहजाराह शुहुल
 नागुबल कुय पोन्य श्रूच
 रुत मोहबत बाँगराव
 आस रुत तय बास रुत
 लोलु म्याने अँछ मुच़र
 आलुमस क्युत यी रुच़र

(स्वंदर)

पोशि वार्यन बोश रुत
 टूर्य फँल्यमुत्य रोश नोव
 रंग व्वज़ल्य मखमँल्य ग्वलॉब्य
 योस्मन, विरि क्योम तु ही
 जोशु आमत्य जामु पॉर्य
 नूर फोत ज़न पोशि डॉल्य

हुस्नुकुय बाज़र सँजिथ
 नूर अंबाराह लँगिथ

शोलुवन्य महारेन्य वुछान
 शूबुवन महाराज़ मोंद
 ही छे व्वशलान परदु तँल्य
 जाफरिस शूबान गोंद
 ब्यल तु ख्यल नीजर अँछन
 ज़िंदगी पम्पोश फोल
 रंग रोयुक जोट च़र्पोर्य
 क्वदरतुक हुस्नाह म्वलुल
 बेद मुश्कन हुंज़ स्वगंद
 अँत्रि छिरकावाह करान
 नूर नेत्रन क्युत वफूर
 मुश्क हरनन नाफ़ ज़न
 लोलु म्याने अँछ मुच़र
 वुछतु आलम क्याह स्वंदर

पोज़ तु रुत स्वंदर रँलिथ
 ज़िंदगी मेछर बरान
 तेलि छु कुन्दन सुबु दमस
 मायि होत बॉथाह परान



६९

सौदरुक लाल

मुबारक छु अज़ जिंदुगी ज़्यून ज़ॉहिर
मुबारक छु अज़ मोतुसुय फ़ूर मोतुन

युथुय अँछ मे मुचर्यम कुल्यन द्रायि बामन
हेतिन पोशि टूर्य पोश सपनुन्य च्वापोर
लयव काल कुठर्यन ह्योतुन गाश वातुन
तु आल्यन अंदर जानुवारव चिरिव तुल

दोपुख रेडियो खबरनुय मंज़ मुबारक
ज़ि सौदरुक हसॉ लाल अथि आव ऑखुर

दपान, ओस जवानाह तवानाह बहोदुर
तँमी दोप बु करु मान समंदर्य शिकार्यन
वुछव नाव कॅम्य सुंज़ मँज़िल प्रावि ग्वडुन्यथ
वुछव तार कुस लबि सोदुरस ब्रुंज़िस मंज़

यरादाह कोरुन द्राव मुल्खन मुकाबलु
समंदर छौंडुन सीनु द्युत तँम्य तुफानन
अमा पोज़ छु जिंदुगी दूहय मोत लारान
यिमन दून लडॉया छि पतु वथ चलॉनी

अँमिस वाव फोर ज़न तु विजि वाव व्वलुरुक
कजन पाशि पटसुय तु हमुतुल ति फुटरुन

जवॉनी मगर आशि हुंद च़ोंग दज़वुन
अलम ज़िंदगी हुंज़ अथन मंज़ मशॉल्या
तिथुय नावि गँयि छलु शुन्या ताम काँप्योव
खबर क्वसु छला तँम्य ति रँट यीरु साँपुन

दपान ज़िंदगी हुंज़ अलम थँज़ अथस क्यथ
पुशुर पान तँम्य आशि हुंदिनुय जहाज़न

खबर कस छि कर वाति शेछ म्यानि लोलुच
खबर हंगु तु मंगु मा मे बंद बॉय वातन
खबर म्यॉन्य कल मा कर्यख बे-करॉरी
सुसर मा लग्यख सीनु शेहजार राव्यख
ग्रक्यख खून रगुनुय मछन माज़ फोर्यख

अँती ओस सोंचान तडपान तु काँपान
'फरुन गोछ नु मोथुय मे यथ सागुरस मंज़'
अँती प्योस ह्यस लोलु सुंज़ याद आयस
स्व विज़, येलि वन्योमस 'मे मा सोंथ पोशम

हरुद्य कॉल्य रोऽ्या युथुय रंग च़े लोलस'
 मगर लोलु वार्यन हरुद छा यिवान ज़ांह
 अमा आशि हुंदि च़ांगिकुय गाश पोशा
 दर्या ज़िंदुगी हुंज़ मशॉल्या तुफानन ?

यपॉर्य किन्य तलोटुम तुलुन ज़िंदुगॉनी
 दूहन कुत्यनुय शोर फ़हल्योव च़ववापॉर्य
 तु लोग तस जवानस च़ववापोर छांडव
 हवॉयी जहाज़न समंदर्य जहाज़न

सुसर लॅज तु ग्रख खूनसुय खॅच़ जवानन
 अॅकिस रछनु बापथ हतन बे करॉरी
 वुछुक याम ड़ूतुख अलम ह्यथ बराबर
 करान मोतुसुय मलखनुय सुत्य मुकाबल
 तुलुख नावि मंज़ वातुनोवुख बॅठिस प्यठ

दोपुख रेडियो खबरनुय मंज़ मुबारक
 ज़ि सोदरुक हसॉ लाल अथि आव ऑखुर
 समंदर मँदिथ अमृता दिवताहन
 दज़ान ज़िंदुगी हुंज़ मशॉल्या बराबर
 हरान गाश आशन हुंदिस ज़ितनि च़ांगिस

वोनुख रेडियो खबरनुय मंज़ मुबारक
 जि सोदरुक हसॉ लाल अथि आव ऑखुर
 खबर म्यानि ऑही ति मा कॉल्य फल द्युत
 खबर म्योन कांछुन ति मा खोत चिकारस
 वं लारन नु मारन नु इनसान ज़ादन
 नु ज़रवन वुवन्य शोरु रंगीन वार्यन
 अँकिस रछनु बापत हतन बे-करॉरी
 हतन रछनु बापत ति सासन सुसर लगी
 तु सासन लछन लछि बद्यन बेयि करोरन
 वछस व्वथि तछुन सीनु सपन्यख परिन्य च़र

हतन गॅछ्य नु मारुन्य रतस गॅछ्य नु लारुन्य
 नॅहॅज फीर अमिची च़वापोर शायद
 तु शायद अमी मायि वोल इबने आदम
 यिहय ग्रख सुसर लॅज च़वापोर मनुशस

मुबारक छु अज़ जिंदुगी ज़्यून ज़ॉहिर
 मुबारक छु अज़ जिंदुगी ज़्यून ज़ॉहिर
 अँकिस रछनु बापत हतन बे-करॉरी



७०

सोपुन तु सौंच

विज़ि विज़ि छुस सोपुनस मंज़ डेशान
 तापु द्वहा मँज़्य रूदु लवाह मँज़्य
 तापु द्वहा युस रू रू गालान
 रूदु लवाह य्वसु तन शेहलावान
 विज़ि विज़ि छुस सोपुनस मंज़ डेशान
 शामुच रंगुताह, सुबहुक गाशाह
 सुबहुच सेंदुराह शामुच माँज़ाह
 तापु द्वहा मँज़्य रूदु लवाह मँज़्य
 विज़ि विज़ि छुस सोपुनस मंज़ डेशान
 सोपुनस मंज़ क्या द्वहली बिह्य बिह्य
 चेशमन ब्रोंह कनि द्रींठ यिवान छुम
 छाँफ गछान छम अँछ टिटुरारय
 तारक नबुची गुलि टूर्यन हुंज़
 मँज़्य मँज़्य डेशान म्वख्तु ख्यलन प्यठ
 पिशल्यन पम्पोशन हुंज़ तंदुलाह
 च़म ज़न स्वंदर मसवलनुय हुंज़
 छाँफ गछान छम छा़य यिवान छम
 नँन्य तय प्रेन्य फेक्थ संगर मालन

ढुटु ढररु ढररु ङन ढुङुरेनर कस तलढ
 तनर वँछु गँढुढु, ढेकथ नँन्य दुरलढुतु
 संगर ढलन गलश ढवलन येरु
 सररुखर खसन येरु ढुरङुरलन ङुतलन
 नूर ढवलन तेलर सँररररर ङुरगुतस
 अँतु छुढ ह्यस ह्यू ढेरलन ढँङुय ढँङुय
 दरलसुय ङुरर दरवलन दुडुरलररु
 कतर छुख अढुत कुत कुन ललरलन
 कस छुख छलरलन, ढुरलरलन ढल छुय
 कलंढ ढलशुकलह, नुश लडलह कलंढ
 ङुरनर डडे ढुथ चूनर ङुरररुथ ढल
 नुश लडलह कलंढ हुश रुडल कलंढ
 ङुरर दरवलन छढ दरल दुडुरलररु
 ङुरलंढ छल ढे तर अथ ढुथ चुथ दररुढुढु
 कतर छुस अढुत कुत छुस ललरलन
 कस छुस छलरलन क्यल छुस गलरलन
 हुश छुढल कनरु छरढ ढँदुढ ढलनय
 अँकुवने कनरु डुरुंढ डुरुंढ ललरलन
 नतु ढल वेङुर अलसुख वथ ढनुनी
 यल ढल ढँङुरलल अलसुख गलरलन
 ढरकनलतीसुचर रङुर लढु लढु ह्यथ
 ढँन्य ढलनय डुरुंढ डुरुंढ ललरलन

आँकुवने किन्च योद मँज़िलस कुन
 दूहली बिह्य बिह्य यी छुस सोंचान
 द्रींठ्य यिवान छुम छांफ गछान छम
 तापु दूहा मँज़्य रूदु लवाह मँज़्य
 स्वंदर कोताह लूबान शूबान
 सूचिथ छा किनु हंगतु मंगय यिम
 अँड्य क्रक लायान शोर तुलान अँड्य
 जंग करान यिम टुंगि वदुनावान
 मॉसुम लालन स्वंदर मालन
 हूल्य गिंदान यिम आदम रतुसुय
 सूचिथ छा किनु हंगु तु मंगय यिम
 दिल फुटुरावान, आशन हुंघ तिलु
 चाँग्य करान छ्यतु, गटु नोवुरावान
 तारक नबुसुय शाहिद थँव्य थँव्य
 वादु करान यिम यारन सुती
 तिम फुटुरावान, बेयि मंदुछावान
 लोलस, मजनूनस, नॉग्यरायस
 रांझस, महिवालस, मन्सूरस
 दारस युस खोत पज़रुकि बापथ
 यी छुस सोंचान दूहली बिह्य बिह्य
 यी छुम द्रींठ यिवान, अँछ गाशुक
 वथरुन छुस यारस क्युत शेरान

पॉरान, डेशन ब्योन ब्योन रंगुवय
 शक्लु बनावान लोलस पनुनिस
 जिंदुगी दिथ नॅन्य पॉठ्य नॅनुरावान
 सूंचिथ छा किनु हंगु तु मंगय यिम
 जुव गालान शॉयिर शारस प्यठ
 फनसुय पथ फनकार मरान बेयि
 रॉचन हुंद आराम छि त्रावान
 छांफ गछान छम द्रींठ यिवान छुम
 तापु द्वहा मंजु रूदु लवाह मंजु
 तापु द्वहा युस रू रू गालान
 रूदु लवाह खसु तन शेहलावान
 याद यिवान छिम वॅनि श्वन्य करवुन्य
 नचुनस मंजु मस अख मस्तूराह
 या साजंदर ह्यथ संतूराह
 छोट छोट वाख परान लल देदि हुंद
 या गजुलाह या वचुनाह, भजुनाह
 अॅक्य कॅर हिकटा, अॅक्य कोर नचुनाह
 ब्राँत्य गछान छिम याद यिवान छुम
 वीगिस प्यठ मासन हुंद नचुनाह
 सोदुरन व्यसुनुय हुंद अख असुनाह
 याद यिवान छुम गामन शामन

मस मलुर्यन हुंद कछुकर नरिवुय
 दानि मुनुन मुहल्यव अकि ताले
 याद यिवान ब्योन ब्योन दीशन हुंद
 हॉकी गिंदुनाह या फुटबाले
 येति ज़न अख अँक्यसुंद्य जंडु ज़ालान
 येति ज़न मुल्कन हुंद दुश्मनुथाह
 खेलन मंज़ ताम छी वरतावान
 याद यिवान छुम छांफ गछान छम
 कॅड्य कॅड्य यिवान खुर्य येति डेंजन
 सॉचस बेयि बोज़ ग्यूर व्वथान छुम
 नतु क्या वाठ छु लोलस गोल्यन
 वीगिस नचुनस जगडु लडायन
 नतु क्या वाठ छु सोपुनस सॉचस
 सुबकिस नूरस या फुटबाले
 वलनु यिवान छुम खुर पनु डेंज्यन
 शोर कॅरिव कम, कथ ल्वति पहानथ
 द्यवु मे ति अथि यी अंद यथ कुनि किन्थ
 द्यवु बु ति नवि सरु सूंचिथ ह्यकु कैह
 द्वहली छुस कवु फिर्य फिर्य डेशान
 रूदु लवाह मँज्य, तापु द्वहा मँज्य
 रूदु लवाह ख्वसु तन शैहलावान

तापु द्वहा युस तुरन गालान
विज़ि विज़ि छुस सोपुनस मंज़ डेशान



७१

वक्तुक जंग

अज़ छु लोगमुत पोशिनूलन वारिल्यन हुंद जंग तय
वाय लगी ना ज़िंदुगॉनी नव बहारुक रंग तय

पानुवँन्य आँस ल्वकुचारस बालु यारस बाँज बठ
व्वन्य छि साँज़िश हर्द वावस थथरि नारस बाँज बठ

अज़ छि कुकिलन बुलबुलन बेयि कँतिजि ख्यजिनय लारु लार
बेयि हिशर अज़ ग्रद तु गाँटन, वारिल्यन छी पाँज़ यार

कुच मेहनत कँर तु असि पँज़ीन तु जाफुर्य तंदलि लाँग्य
कँतिजनय हुंज़ लँट सजाँव रँछ्य बुलबुलन हुंघ यावु छॉग्य

क्या खबर आँस कँड्य खसन बेयि स्वयि नवन यथ वारि मंज़
क्या खबर आँस जागि रुज़िथ कुस स्वरुफ वन यारि मंज़

गम मु बर दिलदारु म्याने वुनि छि असि ह्यमथ जवान
वुनि छु लालन खून ग्रेकि तय वुनि छु पोंपुर येति नचान

वुनि छु आरन जोश यारन होश कौत्याह शेरि नर
वुनि छु दिल पम्पोश यस छी ख्यल च्वपासे रौँछदर

योद चु ह्यस तय होश थावख दिल रछख बोज़ कौम ह्यख
योद कदम थावख चु पज़ि वति ज़ांह अगर नय बांबुरख

वुछ तु तेलि यँच च़ाँग्य छ्यतु गँयि तीत्य तारख शोलुनय
यीत्य बे ज़्यव कँल्य सपुन्य अदु तीत्य कोस्तूर बोलुनय

पोशिनूलय ज़ेनि येलि अंद वाति वक्तुक जंग तय
वुछतु कुन्दन ज़िंदुगी लागि नव बहारुक रंग तय



७२

चोन तसवीर

दोपुम अज़ बनावय बु तसवीर चोनुय
तु ज़गुतस ति हावय बु तसवीर चोनुय

गुलालस ह्योतुम रंग व्वज़ुल नारु तिख ह्यू
सब्ज़ रंग मे द्युतुनम डलुक्य लॉव्य ख्यलनुय
ह्योतुम न्यूल रंग यथ नबस मायि सानुय
सफेदी दिचुम ज़ून गाशन प्रगाशुच

रंगन डेर गॉयि आयि कम टूर्य बॅर्य बॅर्य
अॅरिन्य आयि, ही आयि, विरि क्योम तु सुम्बल
तु जीलान तु प्रज़लान तु व्वशलान ति कम गुल

क्रुहुन रंग ति गोछ चानि अमि जुल्फु बापथ
तमी किन्य गँडिम गुल्य यिमन कालु रॉचन
खबर छय छु मा नतु मे गटुकार रोचान

ग्वलाबन दोपुम बुथ्य लबन लॉग्यज़्यम मे
सुबुक्य नूरनुय चोन ड्यकु छोर माये
तु शामन कोहन पॅत्य छि खसु माँज़ आसान
सु ऑडुर मे टूर्यन नमन चानिनुय किच

बनावुन ह्योतुम अद् मे तसवीर चोनुय
 ड्यकस निश मे पम्पोश फोलमुत थवुन प्यव
 अँछन निश ति पम्पोश वँथरुय सजॉविम
 वँथर दुब थँविथ बुथ्य लबन हुंद थज़र नोन

अथन दून ति पम्पोशिवुय नाप ह्योतुहय
 खरन हुंज़ ति पम्पोशि चॉलय मे डीठुम
 रंगस मंज़ ति पम्पोशिची स्वय ग्वलॉली
 तु होट ज़न तु डलु वानि पम्पोश छोलमुत

स्वंदर च़म तु पिशजार पम्पोशिकुय छुस
 बोरुत वछ तु शेहजार पम्पोशिकुय छुस
 पवलान मोर अनहार पम्पोशिकुय छुस
 असान वुठ तु व्यवहार पम्पोशिकुय छुस

खबर बिह्य बिही कथ जहानस बु वोतुस
 खबर म्यॉन्य बुरशन कत्यथ क्या च़े ड्यूतुय
 अँछन दिच़ मे मूरन तु डेशान क्या छुस
 बन्योमुत छु पम्पोशि गौंद वारु कारय

बनावुन ह्यवान येलि बु तसवीर चोनुय
 खबर क्याज़ि पम्पोशि गौंद छुस बनावान
 चु मा ज़िंदुगी हुंद यि आकार असली
 तमी मा छु पम्पोश ह्यू रोय चोनुय

बनावुन ह्यवान येलि बु तसवीर चोनुय
खबर क्याज़ि पम्पोशि गोंद छुस बनावान
खबर क्याज़ि पम्पोशि गोंद छुस बनावान



७३

सिरु कथ

ब्रोंहय ओसुय मे वोनमुत यारु म्याने
 ज़ि ऑखुर कॉल्य ज़ेनी म्यॉन्य सारंग्य
 ज़ि ऑखुर कॉल्य नेरन म्यॉन्य अरमान
 ज़ि ऑखुर कॉल्य प्रज़ुलन सॉन्य तारख

मे मा ओसुम ज़ुहुन्य बयि रोट कालुक
 बु मा खूचुस ज़ुहुन्य नारस अलावस
 मे मा खँच तुर ज़ांह डीशिथ तुफानन
 बु मा रोवुस ज़ुहुन्य अखताबु लूसिथ

मे ओसुम गाश अज़मुक, आश सुबहुच
 बु ओसुस कव थँविथ कथ सोंतु कालस
 असूलव म्योन कोरमुत सीनु शेस्तुर
 तु आदर्शव मछन बोरमुत कुवत नोव

मे ऑस वीदन अंदर पॅरमुच़ यिहय कथ
 पोज़ुय पज़ि ऑखुरस अपज़िच मु रठ वथ
 पनुन्य किन्य आलुमस ओसुस वनान यी
 दूहय अज़ ताम यिहँय शेछ वँन्य मे ज़गुतस

अमा पोज़ रोट मोकल द्रोंत ह्यथ रूद्य
 तिमव कोर खंदु म्यॉनिस एतिबारस
 तिमव वोन मोत छु मचुरस, छुस हुर्यर अज़
 तिमव दोप दूहलि डेशान खाब बेकुल

मगर अज़ बाज़ वक्तुक ज़्यून येलि मे
 गँयख पोत छाय फीरिथ हेसु बेसय
 दोपुख अफसूस अज़ यथ क्याह सना गव
 रवुच प्रवु गँयि अँछन तँर्य तँर्य यिमन अज़

बु छुस अज़ बेयि तिथय कँन्य लोलु चेशमव
 वुछान हर काँसि लोलुक मस अथस ह्यथ
 अगर ज़न च्यन, शिलुक शेहजार प्रावन
 नतय छँकरुख बन्यख वेह ताल ज़ाल्यख

छुसय अज़ बेयि वनान दिलदारु म्याने
 दूहय ज़ेनी यि म्यॉनी टॉठ सारँग्य
 यि कुन्दन गीत परि लोलुक्य तु प्रेमुक्य
 चु गछ मिज़राबु सुत्य सेतारु वायान



७४

अख मंजर अख खयाल

रॉत्य रातस ओस तारख नब पवलान
 बिंदरि ज़न कुनि डुपटु दामानस जॅरिथ
 कालु गटुकारस करान अँछ नाटु नब
 प्यव चिहिस मंज़ वुछतु गटुकारुय हॅरिथ

गाश फोल अदु रोगि रोगे सिरिं ज़ाव
 परनि छॉन्याह गाशि फोत्य थॅव्य अँम्य बॅरिथ
 जायि जाये आसमानस ओबरु लंग
 नक्श गीरन ज़न तु छुय थोवमुत गॅरिथ

न्यूल आकाशाह प्रज़लवन्य ओबरु थोस्य
 फम्बु तूदन र्वपु वरक ज़न छी मॅरिथ
 शेर गाहे मँज्य गछान छख ब्रॉर ज़न
 छटु शिकॉर्याह मँज्य तु गॅयि आबस तॅरिथ

ओबरु तूदस मँज्य बनान ज़न शुरु तु मॉज
 छुस वछस तल मायि छस दूदु बब बॅरिथ
 या यिहोय राज़ाह तु रॅन्य कांह थामि ज़न
 बॉज्यगारन ज़न तु थॅव माँथुर पॅरिथ

पहरि बर तल वहरि कचि ताम नारु छप
वाय कुस सनु गव अँमिस यावुन फँरिथ
युन ह्योतुन आकॉश्य ज़न क्रकु नाद ह्यू
टासु रारय छम गछान वॉलिंजि तँरिथ

कर चलन सम्सारु मंजु यिम दूख तु दॉद्य
युथ यि कुन्दन हेकिहा येतिनस दँरिथ



७५

थनु प्यव तमि विज़ि श्रूकाह शाराह

ओबुरन वोल येलि नाल आकाशस
 क्रेहन्यर चोट फ्यूर पूरिस पछिमिस
 गगुरायव ठसुराय करुन्य हेच
 द्रायि चॅटिथ येलि ओबुरस वुज़मल
 थनु प्यव तमि विज़ि श्रूकाह शाराह

गुलि दूरिस म्वख छोल शबनमुनुय
 पोम्पुर मोत गव प्रक्रम दी दी
 पनु वॅथुरन प्यठु नीजर पिशल्यव
 दूर बुडुख दिथ फोल येलि पोशाह
 थनु प्यव तमि विज़ि श्रूकाह शाराह

चरि ऑलिस मंज़ चरि बचु जोराह
 चॅर छख आंपु दिवान कमि माये
 काँटुर लंजि प्यठु रॉछ दरा ह्यु
 याम चिरिव वोथ फम्बु फेक्य वुशनेय
 थनु प्यव तमि विज़ि श्रूकाह शाराह

बालस प्यठ गुजराह अख थामे
 आशन मोयूसी खुर आमुत
 कोठस कुन तस लाल दरस लॅग्य
 ज़ा शुर्य सुंद चिकुन्यार युथुय गव
 थनु प्यव तमि विज़ि श्रूकाह शाराह

महारेन्य येलि लॅगुनस प्यठ खॉरुख
 ऑनु अँदर्य तस होवुख नोशाह
 दयि बतु ख्यवान व्वशलुन खोत तस
 अथुवासस मंज़ अथु येलि कुमलेय
 थनु प्यव तमि विज़ि श्रूकाह शाराह

क्रीचम क्रीचम कोर येलि खपुचव
 यँदुरन येलि ज़न कॅर गुंगुरारय
 कनुर्यन येलि ज़न मॅलिलय लोगुख
 फम्बु कान्यन येलि वार खसान गॅय
 थनु प्यव तमि विज़ि श्रूकाह शाराह

निगियि अंदर येलि चाँठ्य वसान गॅय
 दार दूदस लॅज च़डु वार्यन मंज़
 वॅछिनुय फेक्य येलि खॉरिख ल्वंगुन्यव
 वछरि युथुय चुह चुह द्युत बबुनय
 थनु प्यव तमि विज़ि श्रूकाह शाराह

येलि गव कू कू गोव्यंद गू गू
 चिरिव चिरिव गव टिटू टिटू टू
 वॅत्यजन लॅट रूज़ शीरिथ पॉरिथ
 बुलबुलनुय येलि छोग बडान गव
 थनु प्यव तमि विज़ि श्रूकाह शाराह

माजि शुरिस येलि दूद बतु आपुर
 मायि वुछान गॅय अँछ गॅयि रूज़िथ
 ज़ाल्यव किन्त्य दूद पोन्य वसान गव
 दुनन दिचुन अँछ गॅय टिटुरारय
 थनु प्यव तमि विज़ि श्रूकाह शाराह

म्वख्तु छँकुर येलि सुबहुक्य वावन
 बौबरन यँबरि बुथिस द्युत म्यूठाह
 फ़रस्तन येलि कोड काड नबस कुन
 बोनि युथुय रँट्य बेबि मंज़ थँक्यमुत्य
 थनु प्यव तमि विज़ि श्रूकाह शाराह

म्यानि ति ज़ूरे दोद येलि चोंगाह
 अस्तानन दशि थवुनन फल द्युत
 म्यॉनिस लालस मँत्य वँर ऑही
 माज़ फेक्यन खोत येलि ज़न कुन्दन
 थनु प्यव तमि विज़ि श्रूकाह शाराह



७६

कथ हसॉ कथ

कथ हसॉ कथ
यिहय अख कथ
कॅर तु म्वकुलेयि

यि छा सॉ वथ
कॅड तु कॉयिम
यि छे अख कथ
हैछ तु व्वतुलेयि
रॅछ तु शेहलेयि
तॅछ तु तेजेयि
कॅर तु म्वकुलेयि

यि छा सॉ खत
ल्यूख तु दॉयिम
यि छे अख कथ
सॅन्य तु सनुवन्य
नॅन्य तु प्रनुवन्य
वॅन्य तु ललुवन्य
कुन्य तु खनुवन्य
कॅर तु म्वकुलेयि

यि छा साँ व्यथ
 छुस नागु आगुर
 यि छे अख कथ
 अँती फिरि माय
 अँती लायि लाय
 तचर ज़न क्राय
 शिहिज ज़न छाय
 वुठव पेठ्य द्राय
 दिलस छस जाय
 छैन्य तु वँह्य वाय
 रूज़ तु वोथ न्याय
 कँर तु म्वकुलेयि

यि ज़न छनु वथ
 यि ज़न छनु खत
 यि ज़न छनु व्यथ
 मगर छय कथ
 कथ हसाँ कथ
 यिहय अख कथ
 अख शिहिज कथ
 हावि खसु वथ
 पोशि पतु वथ
 यारु संज़ सथ

स्वय हसॉ कथ
वॅर तु म्वकुलेयि

कथ यिहय कथ
मानि छुय यथ
शूबि स्वय कथ
रोज़ि स्वय न्यथ
तॅथ्य मरन पथ
मॅत्य गछन ह्यथ
स्वय रछन कथ
रुत्य छुनन च्यथ
क्रुत्य करन कथ
कथ हसॉ कथ
वॅर तु म्वकुलेयि



७७

कॅन्य तु थॅन्य

दिल छु तमि विज़ि कॅन्य गछान
 येलि नफरतुक, हसदुक, जिदुक या नखुवतुक
 वुहवान आस्यस
 नार मन्कलि मनुचि ... या आस्यस अज़रवुन
 काँसि हुंद हँस्तिस् खसुन
 या अगर क्रूदन कॅरुस रज़
 दंद हेतिन चीरुन्य
 तु बुम त्रकुजार होवुन
 माज़ फोर्योस माज़ु मछुनुय
 दिल छु तमि विज़ि कॅन्य गछान

 दिल छु तमि विज़ि कॅन्य गछान
 येलि काँसि लॉजिस हांछ अपज़िच
 येलि तसुंघ अरमान छवकुवनु आयि
 लिथुवनु आयि तॅम्य सुंज़ सादुगी
 येलि तसुंज़ मेहनत तु मश्कत
 जुव चटुन बेकार गव
 येलि अपुज़ पज़रस करान गुर
 येलि यिवान खुर लोलसुय
 दिल छु तमि विज़ि कॅन्य गछान

दिल छु तमि विज़ि कॅन्य गछान
 येलि मोत मुहिथ छुस निवान
 अडु फॅल्य गुलालन, या अगर
 कांह मोसुमा छुय बालु पानय
 बे ग्वनाह रावान
 गछान येलि मॉल्य रोस
 या युथुय ठोकर बुथ्यन क्रेहन्यार फेरान
 माजि रोस डोलान वतन
 दिल छु तमि विज़ि कॅन्य गछान

दिल छु तमि विज़ि थॅन्य गछान
 येलि गुल फवलान, बुलबुल ग्यवान
 येलि पोंपुराह पखु टासुरान
 चुह दिवान पोशस बुथिस
 येलि बौबुरन्य गुंगुराय
 शोकुक टोठ वनुवुन ह्यू गछान
 दिल छु तमि विज़ि थॅन्य गछान

दिल छु तमि विज़ि थॅन्य गछान
 येलि मॉसुमन हुंज़ु बाशि डीशिथ
 सीनु सनिरव मंज़ु खसान

खंगालु असनुक्य
 येलि ख्वखुज कॅर्य कॅर्य पकान बालक
 कडान ज़न ज़िंदुगी हुंदि ज़ेठि सफरुक
 अख आदुनुक यिवुनुक पडाव
 दिल छु तमि विज़ि थॅन्य गछान

दिल छु तमि विज़ि थॅन्य गछान
 येलि मारु मोत कांह आरु होत
 डेशान लोलस पनुनिसुय
 येलि बेहोशी मंज़ फिरान
 काँत्याह वरक

अमि लोलुचे किताबि हुंघ
 येलि बिहिथ आसान छस नखु मॉर्य मँज़
 बेयि च्वपासे तिछ खमोशी
 यथ अंदर ज़न बोज़ि अख, बेयि सुंदि दिलुच दुबुराय ताम
 दिल छु तमि विज़ि थॅन्य गछान

दिल छु मँज़्य मँज़्य थॅन्य गछान
 दिल छु बाज़े कॅन्य गछान



७८

कुल तु थॅर

कुल बु छुस बागस अंदर वुछ
 स्योद तु थोद असमान ताम
 ग्वड मे छुम मज़बूत, शेस्त्र
 अलु करुस, वुछ व्योठ तु पूठ
 तँम्य दयन दिचुनम जवॉनी
 कद मे द्युतुनम थोद तु ज्यूठ

सोंतु ब्रोंह ओसुस कुनुय ज़ोन
 तन मे ऑसुम पनु रछुय
 छुस करान शुकरानु सोंतस
 संग मे प्रोवुम मायि होत
 पोशि थॅर अख ज़ायि ज़ॅमिनस
 मेय नखय बागस अंदर
 सग दितुस रूदन तु प्रज़लॉव
 सिरिं प्रागाशन यिहँय
 ज़ून गाशन मायि मंज़लिस
 मंज़ ललव अदु यीच वॉच

यावुनस मंज़ नालु मति रोटुनस
 तु कॅर्यनम मीठ्य मे
 वुछ च्वापोर अलनु वलुनय
 आयि किथु पाँठ्य मायि मॅच
 सीनु शेहजाराह मे प्रोवुम
 बेयि फुलय बरजस्तु लॅज
 म्युल सपुन यनु प्यठु अँमिस मे
 तनु हुरान गॅयि शान साँन्य
 लोलु नागस लॅज वुज़िन्य
 यनु रॅलिथ यिम प्रान साँन्य
 अँम्य सुंदी सुत्यन बु छुस शूबान
 लूबान म्योन कद
 म्यानि सुत्यन रॉछ अँम्य सुंज़
 पोज़ छु अँम्य सुंद मान मद

 काँपुनावान छुम मे कुनि कुनि
 बद खयालाह छुम व्वथान
 योद हॅरिथ गॅयि थॅर यि म्याँनी
 कैह लग्यम मा द्दुरुनस
 अख लंडुर ह्यू, तूठ ह्यू
 कूजस अंदर गछु मा चॅमिथ

या अमा षोऒ मेय अगऱ
 ऒऒरुन ह्योतुन षानस खसुन
 बे वऱा योदुवय बु दऱासस
 कौल्य गोसस दाग दिथ

थॅर हॅरिथ षेयि चॅड लग्यस
 बागस अंदर षेयि टास दिथ
 म्वखसरन अख अॅक्य सुंदे
 सुत्यन छे दूशुन्य ऒिंदुगी
 जोरि मारान ऒूर्य रूऒिन
 दय दियिन नॅव ताऒुगी

सौंत षूशिन वौंतु रोस्तुय
 षोश नीरिन आँथु रोस्य
 मति रटन कुन्दन
 तु आँसिन हार तोत या शीनु थोस्य



७९ दिल

युथुय दिल गव शिकस लद हार मॉनिन

त्युथुय छुय आंपु व्यसुरान जानुवारन
 त्युथुय छिख ऑल्य थरि प्यठु ब्वन प्यवान वॅस्य
 त्युथुय छुख दूल पींत्यन टास नेरान
 खसान छिख तुरि कॅञ्च तीरि नेरान
 गछान छुख पॅत्य व्वंदुक वुशन्यार सोरान

युथुय दिल गव हचर ज़द वावु लद ह्यू

त्युथुय छी पोश ज़रदान टूर्य च़मठान
 त्युथुय वॅथरन प्यवान रुखु नीजर छु ज़रदान
 त्युथुय पेचानुसुय खसुवुन लगान टख
 ख्यलस लॉविस त्युथुय खरु खरु गछान च़म
 फुलय बरजस्तु सपुनान डोटु बुज्य हिश

युथुय दिल गव न्यराशाह ना-व्वमेदाह

त्युथुय छुय डुव लगान तारख नबस छट
 प्यवान छुय ज़ून गाशस ग्रहनु क्रेहन्यार
 प्रबातस ज़न मथान कांह छुय कृहुन्य मील
 करान ज़न चाँग्य अकि अकि छ्यतु खबर कुस
 तमी विज़ि छुय यि मोत अखताबु लोसान

युथुय ज़न लोलु बॅर्यतिस लॅज दिलस ग्राय

नेँदुर छय माँसुमन पाटाँस्य सपनान
 सेद्यन सादन मनोशन वथ छि रावान
 गछान छुय कुक्यलि कोस्तूरस ग्यवुन पॅत्य
 स्वतान ज़न मुशिकि बुदजन हुंज़ स्वगँदी
 मलख आबुक्य छ्यनान लूसिथ प्यवान वॅस्य

युथुय छुय दिल फुटान ज़न चुन शीशस

कमन हरुनन गछान छय चेश्मु रूज़िथ
 मशान मिनि मरि छे वतुनुय लांपु मेनुन्य
 प्यवान छलि छलि कुठ्यन हुंद गछ सरासर
 खुत्मबँद्य तालवस हचि पचि गछान ब्योन
 तु व्वस्तादन अचान छुनु सुचुन्यनुय पन

अमी दोपुमय द्वहय दिलदारु म्याने
दिलुच यिनु रावुरावख पादशॉही
दिलस यिनु रावुरावख पादशॉही
दिलाह यिनु हारुनावख रावुरावख
यिनो दिख बननु दिलुसुय ज़ांह हच़र ज़द

दिलुच आशा छि बख़्शान नूर नेत्रन
दिलस युथनो लगी ज़ांह ग्राय लालो
दिलस युथनो लगी ज़ांह ग्राय लालो

दिलाह छुय शीशु ऑव्युल रॉछ कॅर्यज़्यस
अमी दोपुमय द्वहय दिलदारु म्याने
दिलुच यिनु रावुरावख पादशॉही



८०

इन्कलाब

बरन दार्यन लबन लाद्यन वुरुस्यन तु गंजीनन
तला लीखिव बड्यव अछुरव सॅमिथ सॉरी ... 'इन्कलाब'

फेर्यन च्वन निश थॅविव पम्पोश लॉगिथ
ख्यलव सुत्यन डलस अंद कुन, तला लीखिव 'इन्कलाब'

डलुक युस पोन्थ नॉपान छुय
मंज़स गछि तथ युथुय बासुन
छु ज़न तथ नाग कॉरिथ त्रोवमुत र्वपु दथ
ज़ितनि ज़ोतान दूरि प्रज़लान 'इन्कलाब'

ओताम ऑस्य तारुकन मंज़ हल तु सतु रेश्य
तिमन ग्रहद्यन वॅथिव व्वन्य जाय बदलॉविव
थॅव्यून व्वन्य तंदलि तिथुवॅकन्य अज़ यि तारक बोक
ज़गत बुतरॉच़ प्यठ ह्योर कुन वुछिथ परि 'इन्कलाब'

प्रबातस करन येलि खेलु शुर्य इस्तादु रूज़िथ
वुठन मॉसुम असुन आस्यख
ड्यकन प्यठ आश गाशा ह्यू
तंदल यिथु वॅकन्य गछ्यख व्यस्तार दिन्य नॅव
अॅछन वाल्यन परुन तगि लॉनि अंदर 'इन्कलाब'

यि क्या बागन अंदर कपटन वॅरिथ ज़ंड
 बनाविथ छिख गुपन गुर्य बेयि हॅस्य तु हांगल
 यिमन व्वन्य शूबि नॅव कपटन
 गछन सॉलॉन्य, पर, पनुन्य, सॉरी परुन्य
 अद्यान बागस अंदर 'इन्कलाब'

संगर मालन फेक्यन
 ज़ूनि अखताबस
 चर्यन हार्यन पखन
 कुल्यन फ्रस्तन लंजन
 आसमॉन्य डबि
 प्रथ अँकिस लबि
 नट्यन नार्यन
 खरन पुलहार्यन

यिमन गछि सारिन्य लीखिथ थवुन व्वन्य 'इन्कलाब'

अमा पोज़ अख शर्त छुय यारु म्याने
 ग्वडन्य गछि युन खयालन इन्कलाब
 तव पतु गछि नज़रि आसुन इन्कलाब
 पॅतिस लाकुन्य छि वातान वॉर्य माहोलुच
 अँती यी पूर पॉठ्यन इन्कलाब
 चै कुन्दन युस वुछुथ कर ताम खाब



८१

लोसुवुन अखताबु

छु सौंचान लोसुवुन अखताबु वुन्यक्यन
 यि आलम क्याज़ि माज़ान अनि गॅटिस अज़
 दितुम मे गाश गटुकारस कॅडुम चॅड
 दप्योम गाशुच अकुय च़ादर वलख अज़
 सन्यर व्वगुन्यार युथ हमवार सपुनन
 तु युथ तुरेमुत्यन वुशनेर फेरी
 पनुन पानुय मे ज़ाजोव अज़ अवॉयुल
 हेच़ॉम सामाह सॉरिस आसमानस
 कोडुम मा थख ज़हुन्य गरु बार त्रोवुम
 दोपुम प्रथ लॅयि अंदर गोछ गाश वातुन
 मे वुज़नॉविम प्रबातस नैदरि हॅत्य लुख
 मे कडुनॉव्य जानवर सॉरी पखन वाश
 करेयोम संज़ जि टूर्यन पोश सपुनन
 दपेयोम लंजि लंजे म्यवु गॅछ्य पेन्य
 तिमय तारक लुकन यिम सावुनावान
 नैदर पावान जि युथ ज़न चूर फरुनख
 दिवान छिख आलछ्युक यिम मस मोदुर चोन
 मे ब्रॉह कुनि कांह ति मा द्रायोव ज़ांह नोन

अमा पोज लॅज यि शरबत आलुमस ट्यॅठ
 तिमन प्रवु द्वहलि गाशुच आयि मा रास
 त्युथुय चूरव लुटेरव बॉज बठ कॅर
 ग्यवुन्य हेतिहख स्यठाह ग्वन अंदुकारुक्य
 छि मा कॉमुय करुन्य कांह रोत कालस
 शॉगिव पानस तु त्रॉविव डाफ बे गम
 व्वं गव शुर्य बॉच या बेयि खानु दारेन्य
 तिमन रछि पानु परमीश्वर तॅमिस चेट्च
 छु सौंचान लोसुवुन अखताबु वुन्यक्यन
 यि आलम क्याज़ि माज़ान अनि गॅटिस अज़
 युथुय आलव द्युतुख गटुकार फॉल्यव
 कोहव पॅत्य किन्य तिमव कोड मे कुनुय कश
 च्चवापोर आयि नीरिथ रोत तारख
 ब्रॅम्यव आलम युहय गव गाश शायद
 वदान छुय लोसुवुन अखताबु वुन्यक्यन
 ब्वदुय गॅयि कवु फिरिथ यथ आलुमस अज़

मु बर गम यारु म्याने आफुताबय
 खसुन चोन रूद नय लोसुन ति रोज़्या
 छु पोज ग्वनमाथ छुनु कांह ज्योतुशी दफ
 मे वोनुमय तोति थव कन म्यानि वॉनी

यि गटुकारुय द्वहय मा रूद ज़गुतस
 वक्त यियि बेयि सुबहस आलव दिनय च़े
 गँडिथ गुल्य पूर कुन ऑही मंगन तिम
 खँसिन बेयि सिरिं सुय प्रागाश हाविन्य
 यि कँह यवु दँह्य द्वहस ओसुथ च़े कोरमुत
 च़ु वुछ तर नेरि तथ कँह चोन राव्या

पगाह यिम यिन करन कालुक्य ति तॉरीफ
 ल्यखन स्वनु मीलि सुत्यन नाव चोनुय
 दपन सिरियस वनुन क्या सिरिं सिरिये
 द्वहय पूशिन यि सोनुय गाशि आगुर

अँती कुन्दन बडी च़े ति शादमॉनी
 वुछख येलि फवलुवनिस अखताबुसुय बुथ



८२

मे छि यार वनान

चोंग

कलु प्यठु नल ताम रेह हेचुनम
येलि ठॅर्य थॅविनम अथ प्रागाशस
तिलुन्योम बदन
क्रेहनेयम तन
मॅत्य कॅर्य मे नारस व्वज़ुजारस
सुबु दम ताम ज़ोलुम जान पनुन
मे छि चोंग वनान
तिलु चोंग वनान

शमाह

मे ति रेह रॅट नालय सरि शामय
मे ति नारुक ताज कलस प्यठ थोव
व्यगुल्योस हन हन
हॉरिम खॅन्य मन
गटुकारस अख बॅड छल ज़ॉजुम
बु ति मोत गाशस देवानय
मे छि शमाह वनान
छिम शमाह वनान

लालु

छिम क्रॉर्य बिहिथ ज़न
दिलक्यन ज़ख्मन
नारुव्य छिम जामु वलिथ
प्यालु ह्यथन छुस खूनि दिलुक
मे छि लालु वनान
गुलि लालु वनान

गाश

लशि नार वुहन येलि च़ाँग्य दज़न
येलि लालु फवलन शमाह व्यगुलन
गटुकार दज़न
अथि यिनुखा पन
संगुरन हुंज़ यिमु हुमु मालु फवलन
सिरिं प्रज़लवुन तापुन्य फोट्य
मे छि गाश वनान
प्रागाश वनान

कुन्दन

कलु ठॉस्य अड्यव अदु रेह हेचुनख
थज़ुरव प्यठ पेयि तेलि नार ह्योतुन

अदु यि ति वुछतन
यि हसँ कुन्दन
छुस स्वन सपद्योमुत नारु दँज्जिथ
मे छि यार वनान
दिलदार वनान



८३ सिरु कथ

हंगु तु मंगय गटु जॅलिस मंज
 जूरि प्यठ दोद चोंग ज़न
 गाशि अंबाराह च्वापोर
 नारु तँत्य ज़न लब तु चीन्य

कालु ओबुरस ज़न फिह्यव सुत्यन
 दितुख दकु, ताफ प्यव
 सोन व्यगुलमुत, गॉम्य गामस
 गाशि चादर वलनु आय

काड कोड फ्रस्तन नबस
 सुत्यन कोरुन अथुवास ह्यू
 वाश कोड अमि बोनि फॅर्यसुय
 तल रँटिन थॅक्यमुत्य गबर

नागु रादस लॅज वुज़िन्य
 बुकु बुकु ह्योतुन आबस गछुन
 पोशि टूर्य फवलनुक सदा
 बूजुम अँछव पनुन्यव अँछव

लूज्याथाह खेन्य दिचुख तस
 ब्वछि हँतिस नीलेयि दंद
 दारि किन्य तस चाव अँज ज़न
 प्राचुवय तस लाल वँछ

माल फिरवान अख बुडाह अख
 लेफि गँत्यसुय मंज़ चँमिथ
 गाशि रछु चेश्मय अमा पोज़
 तँम्य तिथय कँन्य ड्यूठ दय
 बालु दामुन्य कटु म्वंगुर अख
 प्यांपुरारय हिश करान
 गँब बरान बबु म्वमु च़ेयम ना
 शामु चांटे म्योन लाल

दीन दुनियाह त्रोव अँम्य
 हलकॉर्य ह्यू लार्योव पतय
 शोक व्वतुल्योव लोलु बोछ
 फलवाँय गव सोदाँय गव

कागज़ी बादाम फुट येलि
 पाँन्य पानय खाँट्य ब्योन
 गोजि जूर्याह द्रायि मंज़ कनि
 लूबुवुन तय शूबुवुन

ख्यलु वॅथुर अँद्य अँद्य तु
मंज़ बाग द्राव पम्पोशाह फॅटिथ
अँड्य वॅथुर वाहरॉव्य तॅम्य तय
अँड्य वॅथुर थॉविन वॅटिथ

क्वदरतुच क्वदरथ ति पोज़, दफ
मन ति ऑखुर मायि च़ोड
म्यॉन्य वॉलिंज सॅन्य तु सनिरस
मंज़ खॅटिथ अरमान कृत्य

छुस वुछान कुन्दन बु येलि
पोत छायि पनुन्य टॉठ्य शुर्य
चेश्मु टिटुरारय, अँछर वालव
छुसख ऑही करान



८४

ज्यव कॅज छम

येमि जोशु छु टूर्यन पोश बनान
 सुय जोश जवॉनी म्यानि ति छुय
 येमि नफरतु टुख लोग कुल्य मूलन
 स्वय नफरत मे ति मिस्मार करान
 ज्यव कॅज छम वनु क्या गुलि टूर्यन
 च़मुठेमुत्य वंदु वावुय छी
 मे ति यावुन च़मुठोव वंदु वावन

येमि ताकतु छावान कलु पलनुय
 कोहु बॉल्य छि पानिक्य छूल वसान
 सुय ताकत ग्रकुवुन खून मे छुम
 कोर येम्य सरबंद्य तुलु कतुर्युव

सुय म्याँनिस खूनस शिठुरावान
 ज्यव कॅज छम वनु क्याह नागु बलन
 विह्य श्रोपुरॉव्य सोचुरॉव्य येम्य शापन
 मे ति रगु चुहमचु छे तैम्य शापन

येमि अथु गिर्दाबन ग्यूर व्वथान
 सुय वखरावान मनु मन्कलनुय
 युस वावस चारान लाकम ज़न
 सुय फुटुरावान छुम खूर्य तु हम
 ज़्यव कॅज छम वनु क्या तस मनुशस
 युस यव खोरुख यथ फहि कूटिस
 छय मारन वाल्यन सॉनी च़म

वक्तुचि द्रिकु च़ोह नागु वुजुन
 गव छ्वकु लद लोल तु दारि वोदुन
 युस रथ ज़न लछि गव रोव नु बॅल्य
 सुय अंग अनि छ्वकुलद दिलि जिगुरस
 ज़्यव कॅज छम वनु क्या असमानस
 क्यथु मनुशन स्वरुगुक नेब कोडुय
 येति तारख छी अॅछ नाटु करान

ज़्यव कॅज छम वनु क्या लोलु मॅतिस
 यस केम्य डीशिथ छुय दिल रावान
 मे ति वगुविस तल छुय सुय स्वर स्वर
 अॅछ छम अमा पोज़ स्वर्गस कुन
 दिल छुम अमा पोज़ लोलु बॅरिथ

ज्यव वॅज छम वनु क्याह यारु गुलन
ज्यव वॅज छम वनु क्याह यारु दिलन



८५

गज़ल

वनय लोलुक बु क्याह अफसानु यारय,
बन्योस अफसानु लोलुक पानु यारय ।

खोतुस वोगन्यन्य वोथुस सनिरन दिच्चम वॅन्य,
मगर म्यूलुम सु मा कुनि वानु यारय ।

अँछन अंदर मे कॅरमस जाय स्वन्दर,
मे थॅव्यमस टॉर्य दिथ ज़न ठानु यारय ।

अँछन हँदि गाशि किन्य जिगरस अंदर चाव,
मे कोरमस दिल पनुन कोरबानु यारय ।

युथुय वुछमस मे मस्तस पेच तय खम,
मे बोरमस लोल कोरमस शानु यारय ।

वन्यम बोद बुलहवस छुख, वुछ मु होकुन
दिलन वोननम, बु किथु वॅन्य मानु यारय ।

कदुर कोरनम अँछन पोशुक निगारन
मे कोरनम अँश्य फ्यर्यन दुरदानु यारय ।

तसव्वुर छुम तसुन्द ज़न च़ोंग हावान,
वतन छँकरिथ तवय नूरानु यारय।

मे द्युतनम गीत ग्यवनुक होश तय ह्यस,
बु कुन्दन छुस ग्यवस क्याह क्याह नु यारय।



८६

गज़ल

अज़ छि म्याँनी वॉर्य अँश्य फ्यर्य त्रावनस,
अज़ छि म्याँनी वॉर्य यिम छोख हावनस ।

सिर कोडुम ख्वशबो मे रॉवम पोश छुस,
वोन ज़िठ्यव अथु ख्यावुनुय अथु हावनस ।

ओसु सवु तसली दिवान तोहि राथ ताम,
अज़ बु वनु क्याह पनुनिसुय दिल रावनस ।

यँम्य शिवस कँर पूज़ पतु रामस सु फोर,
सादु मँहन्युव क्याह वनी तस रावनस ?

दिल मे छुम असुनाह कोरुम, दिल छुम वोदुम
ख्यावनस युस छुम मे सुय छुम पावनस ।

काँसि मा प्रज़नोवनस वुछनम दिलस
क्याह शरफ रूद लोल काँसी बावनस ?

कुत्य अरमान आँस्य वँथिमत्य न्यँद्री ज़न
क्याज़ि पानय अज़ लोगुस तिम सावनस ?

अँश्य फ्यर्यन मे जाय वँर चँशमन अंदर
अज़ प्यवान फ्यरि फ्यरि लँगिम मंदु छावनस ।

कूत तजरुबु वाँसि कुन्दन कूत सोन
खेलु लोकचारस तु शोखाह यावनस ।।



सोपुन तु सोंच
sópún tû sònch



त्रिलोकी नाथ दर 'कुन्दन'

इंटरनेट देवनागरी एडिशन



म.क.रैना

सितम्बर २००८